



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### **Usage guidelines**


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### **About Google Book Search**

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



So 10.227



**Harvard College Library**

THE GIFT OF

**SAMUEL ABBOTT GREEN, M.D.,**

OF BOSTON.

(Class of 1851.).

17 Nov. 1888.



OXFORD  
UNIVERSITY PRESS



LIBRARY  
UNIVERSITY OF OXFORD



PUBLII OVIDII NASONIS


F A S T I.

---

---

FROM THE TEXT OF J. B. KREBS,

CAREFULLY REVISED.



*no.*

LONDON: .

JOHN W. PARKER AND SON, WEST STRAND.

—  
MDCCLIV.

S. 10.227

11 November 1893

Gift of

Dr. Samuel A. Green

Rosby

# PUBLII OVIDII NASONIS

## FASTI.

### KALENDARIVM.

#### JANUARIUS.

- A Kal. Januarii. Jani festum, Junonia, Jovis, et Æsculapil.  
 b IV. No.  
 c III. No. Cancer occidit  
 cosmice.  
 d II. No.  
 e Nonis. Lyra oritur.  
 f VIII. Id.  
 g VII. Id.  
 A VI. Id. Festa Jani. Agonalia. Delphin oritur.  
 b V. Id. Medietas hiemis.  
 c IV. Id.  
 d III. Id. Festa Carmentis et Juturnæ.  
 e II. Id.  
 f Idubus. Festum Jovis. Redditæ sunt provincie populo Romano.  
 g XIX. Kal. Feb. Cæsar Augustus vocatur.  
 A XVIII. Kal. Sacrificium Carmentis. Festum Porrinæ et Postvertæ.  
 b XVII. Kal. Festum Concordiæ.  
 c XVI. Kal.  
 d XV. Kal. Sol in Aquario.  
 e XIV. Kal.  
 f XIII. Kal.  
 g XII. Kal.  
 A XI. Kal.  
 b X. Kal.  
 c IX. Kal. Lyra occidit.  
 d VIII. Kal. Pectus Leonis occulitur.  
 e VII. Kal.  
 f VI. Kal. Festum Castoris [et Pollucis].  
 g V. Kal.  
 A IV. Kal.  
 b III. Kal. Festum Pacis.  
 c II. Kal.

#### FEBRUARIUS.

- d Kal. Feb. Templum factum est Carmentil. Celebratur Asylum.  
 e IV. No. Lyra penitus occidit.  
 f III. No. Occidit Delphin.  
 g II. No.  
 A Nonis. Augustus dictus est pater patris. Aquarius vadit ad occasum.  
 b VIII. Id.  
 c VII. Id. [Primus dies Ferilium.]  
 d VI. Id.  
 e V. Id. Ver incipit.  
 f IV. Id. Initium Veris.  
 g III. Id. Bootes oritur: et est festum Fauni.  
 A II. Id.  
 b Idubus. Festum Jovis et Fauni. Nefastus dies Fabiorum.  
 c XVI. Kal. Martii. Anguis, Corvus, Crater oriuntur.  
 d XV. Kal. Sol intrat in Pisces. Iterum Fauni.  
 e XIV. Kal.  
 f XIII. Kal. Festum Quirini. Festum stultorum et Fornacis.  
 g XII. Kal. Feralia.  
 A XI. Kal. Caristia virorum.  
 b X. Kal. Termini.  
 c IX. Kal.  
 d VIII. Kal. Fuga Tarquinii Superbi. Veris initium.  
 e VII. Kal.  
 f VI. Kal.  
 g V. Kal.  
 A IV. Kal.  
 b III. Kal. Equiria in campo Martio.  
 c II. Kal.



## MARTIVS.

- d Kal. Martii. Festum Martia et Junonis. Ancilia feruntur. Non est bonum nubere.
- e VI. No.
- f V. No. Alter Piscium conditur. Oritur Vindemitor.
- g IV. No. Bootes citius, Vindemitor tardius occidunt cosmice.
- A III. No. Festum Vestæ. Cathedra Julii.
- b II. No. Festum Vejovis. Pegasus oritur heliace.
- c Nonis.
- d VIII. Idibus. Corona Ariadnes oritur.
- e VII. Id.
- f VI. Id.
- g V. Id.
- A IV. Id.
- b III. Id.
- c II. Id. Altera Equiria fiunt juxta Tiberim.
- d Idibus. Festum Annæ Perennæ. Julius Cæsar occisus in Capitolio.
- e XVII. Kal. Aprilis. Scorpius oritur.
- f XVI. Kal. Milvius oritur. Festum Bacchi. Vilis ancilla hederis coronata vendit populo libatum. Melle Libero patri sacrificamus. Libera toga datur. Milvius oritur chronice. Festum est Ledæorum, qui fuerunt Argivi, vel Larium.
- g XV. Kal.
- A XIV. Kal. Quinquatria Palладis captæ.
- b XIII. Kal.
- c XII. Kal.
- d XI. Kal. Sol in Arietem.
- e X. Kal. Ultimus dies Quinquastrum.
- f IX. Kal.
- g VIII. Kal. Æquinoctium vernale.
- A VII. Kal.
- b VI. Kal.
- c V. Kal. Festum Jani, Concordiæ, Pacis, et Salutis.
- d IV. Kal.
- e III. Kal.
- f II. Kal. Festa Lunæ labentis: templum in Aventino monte.
- APRILIS.
- g Kal. Aprilis. Festum Veneris et Virilis Fortune. Scorpius occidit.
- A IV. No. Pleiades oriuntur.

- b III. No. Meretrices lavantur sub myrrho. Fors Fortuna Virilis. Scorpius occidit cosmice.
- c II. No. Hebæ et Matrideorum Megalenses ludi fiunt.
- d Nonis. Festum Publicæ Fortune.
- e VIII. Id. Orion occidit chronice.
- f VII. Id. Festum Cerealium ludorum. Libra occidit cosmice. Juba victus a Julio Cæsare.
- g VI. Id.
- A V. Id.
- b IV. Id.
- c III. Id.
- d II. Id.
- e Idibus. Festum Jovis Victoris. Templum... Libertatis.
- f XVIII. Kal. Mai. Dies grandinosa. Augustus Cæsar vicit Mutinenses.
- g XVII. Kal. Forda litatur Teluri.
- A XVI. Kal. Triumphus Augusti. Hyades occidunt heliace.
- b XV. Kal. Sol in Taurum.
- c XIV. Kal. Equiria. Combustio vulpium.
- d XIII. Kal. Festa Palis, Roma condita.
- e XII. Kal.
- f XI. Kal. Festa Veneris Vinalia.
- g X. Kal.
- A IX. Kal.
- b VIII. Kal.
- c VII. Kal.
- d VI. Kal. Festum Rubiginis. Aries oritur heliace.\* Prothius oritur cosmice, occidit heliace. Tempora veris prima finita sunt.
- e V. Kal.
- f IV. Kal. Festum Floræ et Vestæ.
- g III. Kal.
- A II. Kal.
- MAIUS.
- b Kal. Maii. Amalthea capra oritur cosmice. Ara Laribus posita.
- c VI. No. Flat ventus Argestes. Hyades oriuntur cosmice. Finis Floralium.
- d V. No. Panthera Chironis oritur chronice.
- e IV. No.
- f III. No. Stellificatio Lyre. Sagittarius oritur.
- g II. No. Scorpius apparet in parte media.

- A Nonis.  
 b VIII. Id. Lemuria celebrantur. Non est bonum nubere.  
 c VII. Id. Orion occidit chronice.  
 d VI. Id. Festum Martis Bicultoris.  
 e V. Id.  
 f IV. Id.  
 g III. Id.

- A II. Id. Pleiades oriuntur heliace. Æstas incipit.  
 b Idibus. Ora Tauri oriuntur heliace. Scirpea simulacra mittuntur in Tiberim. Festum est Mercurii.  
 c XVII. Kal. Junii.  
 d XVI. Kal.  
 e XV. Kal. Sol it in Geminos. Agonia Junii fiunt.  
 f XIV. Kal. Canis Orionis exit.  
 g XIII. Kal. Lustra Vulcani fiunt.

- A XII. Kal.  
 b XI. Kal.  
 c X. Kal. Mos sacrorum pro fuga Tarquiniifaciundorum. Non modo inest fuga Tarquiniif. Inest VIII. Kal. Mart.  
 d IX. Kal. Festum Publicæ Fortunæ.  
 e VIII. Kal. Rostra aquilæ oriuntur chronice.  
 f VII. Kal. Bootes occidit heliace.  
 g VI. Kal. Hyas occidit heliace, oriens cosmicæ.

- A V. Kal.  
 b IV. Kal.  
 c III. Kal.  
 d II. Kal.

JUNIUS.

- e Kal. Junii. Festa Carnæ, Junonis Monetæ, Martis, et Tempestatif. Aquila oritur chronice.  
 f IV. No. Hyades oriuntur heliace.  
 g III. No. Bellonæ Festum.  
 A II. No. Dedicatio templi Herculis.

- b Nonis. Festum Trinomii dei Fidiif Sancif Semipatris. Malum est nubere ante Idus.  
 c VIII. Idus.  
 d VII. Id. Tergeum ursæ occidit heliace, et regis Lycaonis. Lycaonida fiunt, ludi Tiberis.  
 e VI. Id. Datum est templum Menti. Festum et Vestæ. Asinus coronatur. Ara Priapi. Priori Palladium liberatur ab igni Gallico. Mors Crassi et suorum.  
 f V. Id. Delphin oritur chronice.  
 g IV. Id. Matralia fiunt. Rutillius et Didius occiduntur. Templum Fortunæ Servius, Concordiæ Livia dedicavit.

- A III. Id.  
 b II. Id.  
 c Idibus. Jovi Invicto datum est templum. Minora Quinquatria Palladis fiunt.  
 d XVIII. Kal. Julii.  
 e XVII. Kal. Dione orta est heliace in fronte Tauri.  
 f XVI. Kal. Flat Zephyrus prosper navigantibus.  
 g XV. Kal. Sol in Cancrum. Pallas colitur in Aventina arce.  
 A XIV. Kal. Secundus ventus. Orion oritur heliace.  
 b XIII. Kal. Delphin oritur chronice. Sol in Cancrum. Volsci et Æqui vincuntur.  
 c XII. Kal. Templum datum est Summano Jovi.  
 d XI. Kal. Æsculapius, qui et dicitur Ophionchus et Serpentarius, chronice oritur.  
 e X. Kal.  
 f IX. Kal. Victus est Flaminius.  
 g VIII. Kal. Syphax vincitur. Hædrubal occiditur. Festum Fortis Fortunæ. Solstitium.  
 A VII. Kal. Festum Lartum et Jovis Statoris.  
 b VI. Kal. Orion apparet a Zona inferius. Solstitium.  
 c V. Kal. Lartum.  
 d IV. Kal. Templum Quirino factum.  
 e III. Kal.  
 f II. Kal. Festum Pieridum.



## LIBER PRIMUS.

---

|   |    |
|---|----|
| TEMPORA cum causis Latium digesta per annum,<br>Lapsaque sub terras, orta que signa canam.<br>Excipe pacato, Cæsar Germanice, vultu<br>Hoc opus, et timidæ dirige navis iter:<br>Officioque, levem non aversatus honorem,             | 5  |
| Huic tibi devoto numine dexter ades.<br>Sacra recognosces Annalibus eruta priscis,<br>Et quo sit merito quæque notata dies.<br>Invenies illic et festa domestica vobis:<br>Sæpe tibi pater est, sæpe legendus avus.                   | 10 |
| Quæque ferunt illi pictos signantia fastos,<br>Tu quoque cum Druso præmia fratre ferēs.<br>Cæsar's arma canant alii; nos Cæsar's aras,<br>Et quoscunque sacris addidit ille dies.<br>Annue conanti per laudes ire tuorum,             | 15 |
| Deque meo pavidos excute corde metus.<br>Da mihi te placidum: dederis in carmina vires;<br>Ingenium vultu statque caditque tuo.<br>Pagina iudicium docti subitura movetur<br>Principis, ut Clario missa legenda deo.                  | 20 |
| Quæ sit enim culti facundia sensimus oris,<br>Civica pro trepidis cum tulit arma reis.<br>Scimus et, ad nostras cum se tulit impetus artes,<br>Ingenii currant flumina quanta tui.<br>Si licet, et fas est, vates rege vatis habenas, | 25 |
| Auspice te felix totus ut annus eat.<br>Tempora digereret cum conditor urbis, in anno<br>Constituit menses quinque bis esse suo.<br>Scilicet arma magis, quam sidera, Romule, noras:<br>Curaque finitimos vincere major erat.         | 30 |

- Est tamen et ratio, Cæsar, quæ moverit illum :  
 Erroremque suum quo tueatur habet.  
 Quod satis est, utero matris dum prodeat infans,  
 Hoc anno statuit temporis esse satis.  
 Per totidem menses a funere conjugis uxor                    35  
 Sustinet in vidua tristia signa domo.  
 Hoc igitur vidit trabeati cura Quirini,  
 Cum rudibus populis annua jura daret.  
 Martis erat primus mensis, Venerisque secundus :  
 Hæc generis princeps, ipsius ille pater.                    40  
 Tertius a Senibus, Juvenum de nomine quartus :  
 Quæ sequitur, numero turba notata fuit.  
 At Numa nec Janum, nec avitas præterit umbras :  
 Mensibus antiquis addidit ille duos.
- NE tamen ignores variorum jura dierum ;                    45  
 Non habet officii Lucifer omnis idem.  
 Ille Nefastus erit, per quem tria verba silentur ;  
 Fastus erit, per quem lege licebit agi.  
 Neu toto perstare die sua jura putaris ;  
 Qui jam Fastus erit, mane Nefastus erat.                    50  
 Nam simul exta deo data sunt, licet omnia fari,  
 Verbaque honoratus libera prætor habet.  
 Est quoque, quo populum jus est includere septis ;  
 Est quoque, qui nono semper ab orbe redit.  
 Vindicat Ausonias Junonis cura Kalendas :                    55  
 Idibus alba Jovi grandior agna cadit.  
 Nonarum tutela deo caret. Omnibus istis,  
 Ne fallare cave, proximús Ater erit.  
 Omen ab eventu est : illis nam Roma diebus  
 Damna sub adverso tristia Marte tulit.                    60  
 Hæc mihi dicta semel, totis hærentia fastis,  
 Ne seriem rerum scindere cogar, erunt.  
 Ecce tibi faustum, Germanice, nuntiat annum,  
 Inque meo primus carmine Janus adest.  
 Jane biceps, anni tacite labentis origo,                    65  
 Solus de superis qui tua terga vides ;

- Dexter ades ducibus, quorum segura labore  
 Otia terra ferax, otia pontus agit.
- Dexter ades patribusque tuis, populoque Quirini,  
 Et resera nutu condita templa tuo. 70
- Prospera lux oritur: linguisque animisque favete:  
 Nunc dicenda bono sunt bona verba die.
- Lite vacent aures, insanaque protinus absint  
 Jurgia: differ opus, livida lingua, tuum.
- Cernis, odoratis ut luceat ignibus æther, 75  
 Et sonet accensis spica Cilissa focus?
- Flamma nitore suo templorum verberat aurum,  
 Et tremulum summa spargit in æde jubar.
- Vestibus intactis Tarpeias itur in arces:  
 Et populus festo concolor ipse suo est. 80
- Jamque novi præeunt fasces: nova purpura fulget:  
 Et nova conspicuum pondera sentit ebur.
- Colla rudes operum præbent ferienda juveni,  
 Quos aluit campis herba Falisca suis.
- Jupiter, arce sua totum cum spectat in orbem, 85  
 Nil nisi Romanum, quod tueatur, habet.
- Salve, læta dies, meliorque revertere semper,  
 A populo rerum digna potente coli.
- Quem tamen esse deum te dicam, Jane biformis?  
 Nam tibi par nullum Græcia numen habet. 90
- Ede simul causam, cur de cœlestibus unus  
 Sitque quod a tergo, sitque quod ante, vides.
- Hæc ego cum sumtis agitarem mente tabellis,  
 Lucidior visa est, quam fuit ante, domus.
- Tum sacer, ancipiti mirandus imagine, Janus 95  
 Bina repens oculis obtulit ora meis.
- Obstupui, sensique metu riguisse capillos,  
 Et gelidum subito frigore pectus erat.
- Ille tenens dextra baculum, clavemque sinistra,  
 Edidit hos nobis ore priore sonos: 100
- Disce, metu posito, vates operose dierum,  
 Quod petis, et voces percipe mente meas.
- Me Chaos antiqui (nam res sum prisca) vocabant:  
 Adspice, quam longi temporis acta canam.

- Lucidus hic aer, et, quæ tria corpora restant, 105  
 Ignis, aquæ, tellus, unus acervus erant.  
 Ut semel hæc rerum secessit lite suarum,  
 Inque novas abiit massa soluta domos;  
 Altum flamma petit; propior locus aera cepit;  
 Sederunt medio terra fretumque solo. 110  
 Tunc ego, qui fueram globus, et sine imagine moles,  
 In faciem redii dignaque membra deo.  
 Nunc quoque, confusæ quondam nota parva figuræ,  
 Ante quod est in me, postque videtur idem.  
 Accipe, quæsita quæ causa sit altera formæ: 115  
 Hanc simul ut noris, officiumque meum.  
 Quicquid ubique vides, cælum, mare, nubila, terras,  
 Omnia sunt nostra clausa patentque manu.  
 Me penes est unum vasti custodia mundi:  
 Et jus vertendi cardinis omne meum est. 120  
 Cum libuit pacem placidis emittere tectis,  
 Libera perpetuas ambulat illa vias.  
 Sanguine lethifero totus miscebitur orbis,  
 Ni teneant rigidæ condita bella seræ.  
 Præsideo foribus cœli cum mitibus Horis: 125  
 It, redit officio Jupiter ipse meo.  
 Inde vocor Janus. Cui cum Cereale sacerdos  
 Imponit libum, mixtaque farra sale;  
 Nomina ridebis: modo namque Patulcius idem,  
 Et modo sacrificio Clusius ore vocor. 130  
 Scilicet alterno voluit rudis illa vetustas  
 Nomine diversas significare vices.  
 Vis mea narrata est: causam nunc disce figuræ;  
 Jam tamen hanc aliqua tu quoque parte vides.  
 Omnis habet geminas, hinc atque hinc, janua frontes: 135  
 E quibus hæc populum spectat, at illa Larem.  
 Utque sedens vester primi prope limina tecti  
 Janitor egressus introitusque videt:  
 Sic ego prospicio cœlestis janitor aulæ  
 Eoas partes Hesperiasque simul. 140  
 Ora vides Hecates in tres vergentia partes,  
 Servet ut in ternas compita secta vias.

- Et mihi, ne flexu cervicis tempora perdam,  
Cernere non moto corpore bina licet.  
Dixerat; et vultu, si plura requirere vellem, 145  
Se mihi difficilem non fore, fassus erat.  
Sumsi animum, gratesque deo non territus egi;  
Verbaque sum, spectans, pauca locutus, humum.  
Dic age, frigoribus quare novus incipit annus,  
Qui melius per ver incipiendus erat? 150  
Omnia tunc florent: tunc est nova temporis ætas:  
Et nova de gravido palmite gemma tumet:  
Et modo formatis amicitur frondibus arbos:  
Prodit et in summum seminis herba solum:  
Et tepidum volucres concentibus aera mulcent: 155  
Ludit et in pratis luxuriatque pecus.  
Tum blandi soles: ignotaque prodit hirundo,  
Et luteum celsa sub trabe fingit opus:  
Tum patitur cultus ager, et renovatur aratro:  
Hæc anni novitas jure vocanda fuit. 160  
Quæsieram multis: non multis ille moratus,  
Contulit in versus sic sua verba duos.  
Bruma novi prima est, veterisque novissima solis:  
Principium capiunt Phœbus et annus idem.  
Post ea mirabar, cur non sine litibus esset 165  
Prima dies. Causam percipe, Janus ait.  
Tempora commisi nascentia rebus agendis,  
Totus ab auspicio ne foret annus iners.  
Quisque suas artes ob idem delibat agendo:  
Nec plus quam solitum testificatur opus. 170  
Mox ego: Cur, quamvis aliorum numina placem,  
Jane, tibi primo thura merumque fero?  
Ut per me possis aditum, qui limina servo,  
Ad quoscunque voles, inquit, habere deos.  
At cur læta tuis dicuntur verba Kalendis, 175  
Et damus alternas accipimusque preces?  
Tum deus incumbens baculo, quem dextra gerebat,  
Omnia principii, inquit, inesse solet.  
Ad primam vocem timidas advertitis aures,  
Et primum visam consulit augur avem. 180



Tempa patent auresque deûm, nec lingua caducas  
 Concipit ulla preces, dictaque pondus habent.  
 Desierat Janus : nec longa silentia feci,  
 Sed tetigi verbis ultima verba meis :  
 Quid vult palma sibi, rugosaque carica, dixi, 185  
 Et data sub niveo condita mella cado ?  
 Omen, ait, causa est, ut res sapor ille sequatur,  
 Et peragat cœptum dulcis ut annus iter.  
 Dulcia cur dentur, video ; stipis adjice causam,  
 Pars mihi de festo ne labet ulla tuo. 190  
 Risit ; et, O quam te fallunt tua sæcula, dixit,  
 Qui stipe mel sumta dulcius esse putes !  
 Vix ego Saturno quemquam regnante videbam,  
 Cujus non animo dulcia lucra forent.  
 Tempore crevit amor, qui nunc est summus, habendi : 195  
 Vix ultra, quo jam progrediatur, habet.  
 Pluris opes nunc sunt, quam prisci temporis annis,  
 Dum populus pauper, dum nova Roma fuit ;  
 Dum casa Martigenam capiebat parva Quirinum,  
 Et dabat exiguum fluminis ulva torum. 200  
 Jupiter angusta vix totus stabat in æde :  
 Inque Jovis dextra fictile fulmen erat.  
 Frondibus ornabant, quæ nunc Capitolia gemmis :  
 Pascobatque suas ipse senator oves.  
 Nec pudor in stipula placidam cepisse quietem, 205  
 Nec fœnum capiti supposuisse fuit.  
 Jura dabat populis posito modo consul aratro :  
 Et levis argenti lamina crimen erat.  
 At postquam fortuna loci caput extulit hujus,  
 Et tetigit summos vertice Roma deos ; 210  
 Creverunt et opes, et opum furiosa cupido :  
 Et, cum possideant plurima, plura volunt.  
 Quærere, ut absumant, absumta requirere certant :  
 Atque ipsæ vitiis sunt alimenta vices.  
 Sic, quibus intumuit suffusa venter ab unda, 215  
 Quo plus sunt potæ, plus sitiuntur aquæ.  
 In pretio pretium nunc est : dat census honores,  
 Census amicitias : pauper ubique jacet.

- Tu tamen, auspiciū si sit stipis utile, quæris,  
 Curque juvent nostras æra vetusta manus. 220  
 Æra dabant olim: melius nunc omen in auro est,  
 Victaque concedit prisca moneta novæ.  
 Nos quoque templa juvant, quamvis antiqua probemus,  
 Aurea; majestas convenit ista deo.  
 Laudamus veteres, sed nostris utimur annis; 225  
 Mos tamen est æque dignus uterque coli.  
 Finierat monitus. Placidis ita rursus, ut ante,  
 Clavigerum verbis alloquor ipse deum:  
 Multa quidem didici; sed cur navalis in ære  
 Altera signata est, altera forma biceps? 230  
 Noscere me duplici posses in imagine, dixit,  
 Ni vetus ipsa dies extenuaret opus.  
 Causa ratis superest: Tuscum rate venit in amnem  
 Ante pererrato falcifer orbe deus.  
 Hac ego Saturnum memini tellure receptum; 235  
 Cœlitibus regnis ab Jove pulsus erat.  
 Inde diu genti mansit Saturnia nomen:  
 Dicta quoque est Latium terra, latente deo.  
 At bona posteritas puppim servavit in ære,  
 Hospitis adventum testificata dei. 240  
 Ipse solum colui, cujus placidissima lævum  
 Radit arenosi Tibridis unda latus.  
 Hic, ubi nunc Roma est, incædua sylva virebat:  
 Tantaque res paucis pascua bubus erat.  
 Arx mea collis erat, quem cultrix nomine nostro 245  
 Nuncupat hæc ætas, Janiculumque vocat.  
 Tunc ego regnabam, patiens cum terra deorum  
 Esset, et humanis numina mista locis.  
 Nondum justitiam facinus mortale fugarat:  
 Ultima de superis illa reliquit humum. 250  
 Proque metu populum sine vi pudor ipse regebat;  
 Nullus erat, justis reddere jura, labor.  
 Nil mihi cum bello: pacem postesque tuebar:  
 Et clavem ostendens, Hæc, ait, arma gero.  
 Presserat ora deus. Tunc sic nostra ora resolvo, 255  
 Voce mea voces eliciente dei:

Cum tot sint Jani, cur stas sacratus in uno,  
 Hic ubi juncta foris templa duobus habes?  
 Ille manu mulcens propexam ad pectora barbam,  
 Protinus CEBalii rettulit arma Titi; 260  
 Utque levis custos, armillis capta Sabinis,  
 Ad summæ Tatium duxerit arcis iter.  
 Inde, velut nunc est, per quem descenditis, inquit,  
 Arduus in valles et Fora clivus erat.  
 Et jam contigerat portam, Saturnia cujus 265  
 Demserat appositas insidiosa seras.  
 Cum tanto veritus committere numine pugnam,  
 Ipse meæ movi callidus artis opus;  
 Oraque, qua pollens ope sum, fontana reclusi;  
 Sumque repentinas ejaculatus aquas. 270  
 Ante tamen gelidis subjeci sulphura venis,  
 Clauderet ut Tatio fervidus humor iter.  
 Cujus ut utilitas pulsus percepta Sabinis,  
 Quæque fuit, tuto reddita forma loco est;  
 Ara mihi posita est, parvo conjuncta sacello: 275  
 Hæc adolet flammis cum strue farra suis.  
 At cur pace lates, motisque recluderis armis?  
 Nec mora; quæsitæ reddita causa mihi.  
 Ut populò reditus pateant ad bella profecto,  
 Tota patet demta janua nostra sera. 280  
 Pace fores obdo, ne qua discedere possit:  
 Cæsareoque diu nomine clausus ero.  
 Dixit; et, attollens oculos diversa tuentes,  
 Adspexit toto quicquid in orbe fuit;  
 Pax erat: et vestri, Germanice, causa triumphæ 285  
 Tradiderat famulas jam tibi Rhenus aquas.  
 Jane, face æternos, pacem, pacisque ministros:  
 Neve suum, præsta, deserat auctor opus.  
 Quod tamen ex ipsis licuit mihi discere fastis;  
 Sacravere patres hac duo templa die. 290  
 Accepit Phœbo Nymphaque Coronide natum  
 Insula, dividua quam premit amnis aqua.  
 Jupiter in parte est. Cepit locus unus utrumque,  
 Junctaque sunt magno templa nepotis avo.

- Quid vetat et stellas, ut quæque oriturque caditque, 295  
 Dicere? promissi pars fuit ista mei.  
 Felices animos, quibus hæc cognoscere primis,  
 Inque domos superas scandere cura fuit!  
 Credibile est illos pariter vitiisque locisque  
 Altius humanis exseruisse caput. 300  
 Non Venus et vinum sublimia pectora fregit,  
 Officiumve fori, militiæve labor;  
 Nec levis ambitio, perfusaque gloria furo,  
 Magnarumve fames sollicitavit opum.  
 Admovere oculis distantia sidera terris, 305  
 Ætheraque ingenio supposuere suo.  
 Sic petitur cælum: non ut ferat Ossa Olympus,  
 Summaque Peliacus sidera tangat apex.  
 Nos quoque sub ducibus cælum metabimur illis,  
 Ponemusque suos ad stata signa dies. 310
- Ergo ubi nox aderit venturis tertia Nonis,  
 Sparsaque cælesti rore madebit humus;  
 Octipedis frustra quærantur brachia Cancri:  
 Præceps occiduas ille subivit aquas.  
 Institerint Nonæ; missi tibi nubibus atris 315  
 Signa dabunt imbres, exoriente Lyra.
- Quatuor adde dies ductis ex ordine Nonis;  
 Janus Agonali luce piandus erit.  
 Nominis esse potes succinctus causa minister,  
 Hostia cœlitibus quo feriente cadit: 320  
 Qui calido strictos tincturus sanguine cultros,  
 Semper, agatne? rogat; nec nisi jussus agit.  
 Pars, quia non veniant pecudes, sed agantur, ab actu  
 Nomen Agonalem credit habere diem.  
 Pars putat hoc festum priscis Agnalia dictum; 325  
 Una sit ut proprio littera demta loco.  
 An, quia prævisos in aqua timet hostia cultros,  
 A pecoris lux est ista notata metu?  
 Pars etiam, fieri solitis ætate priorum  
 Nomina de ludis Graia tulisse diem. 330

Et pecus antiquus dicebat Agonia sermo :  
 Veraque iudicio est ultima causa meo.  
 Utque ea nunc certa est, ita Rex placare Sacrorum  
 Numina lanigeræ conjuge debet ovis.  
 Victima, quæ dextra cecidit victrice, vocatur ; 335  
 Hostibus amotis hostia nomen habet.  
 Ante, deos homini quod conciliare valeret,  
 Far erat, et puri lucida mica salis ;  
 Nondum pertulerat lacrymatas cortice myrrhas  
 Acta per æquoreas hospita navis aquas. 340  
 Thura nec Euphrates, nec miserat India costum,  
 Nec fuerant rubri cognita fila croci.  
 Ara dabat fumos, herbis contenta Sabinis,  
 Et non exiguo laurus adusta sono.  
 Si quis erat, factis prati de flore coronis 345  
 Qui posset violas addere, dives erat.  
 Hic, qui nunc aperit percussi viscera tauri,  
 In sacris nullum culter habebat opus.  
 Prima Ceres avidæ gavisæ est sanguine porcæ,  
 Ulta suas merita cæde nocentis opes. 350  
 Nam sata vere novo teneris lactentia succis  
 Eruta setigeræ comperit ore suis.  
 Sus dederat pœnas. Exemplo territus hujus  
 Palmite debueras abstinuisse, caper.  
 Quem spectans aliquis dentes in vite prementem, 355  
 Talia non tacito dicta dolore dedit :  
 Rode, caper, vitem : tamen hinc, cum stabis ad aram,  
 In tua quod spargi cornua possit, erit.  
 Verba fides sequitur : noxæ tibi deditus hostis  
 Spargitur affuso cornua, Bacche, mero. 360  
 Culpa sui nocuit : nocuit quoque culpa capellæ.  
 Quid bos, quid placidæ commeruistis oves ?  
 Flebat Aristæus, quod apes cum stirpe necatas  
 Viderat inceptos destituisse favos.  
 Cærula quem genitrix ægre solata dolentem, 365  
 Addidit hæc dictis ultima verba suis :  
 Siste, puer, lacrymas : Proteus tua damna levabit ;  
 Quoque modo repares, quæ periire, dabit.

- Decipiat ne te versis tamen ille figuris,  
 Impediant geminas vincula firma manus. 370
- Pervenit ad vatem juvenis, resolutaque somno  
 Alligat æquorei brachia capta senis.
- Ille sua faciem transformis adulterat arte:  
 Mox domitus vinclis in sua membra redit.
- Oraque cærulea tollens rorantia barba, 375  
 Qua, dixit, repares arte, requiris, apes?  
 Obrue mactati corpus tellure juveni:  
 Quod petis a nobis, obrutus ille dabit.
- Jussa facit pastor. Fervent examina putri  
 De bove: mille animas una necata dedit. 380
- Poscit ovem fatum. Verbenas improba carpsit,  
 Quas pia dis ruris ferre solebat anus.
- Quid tuti superest, animam cum ponat in aris  
 Lanigerumque pecus, ruricolæque boves?
- Placat equo Persis radiis Hyperiona cinctum, 385  
 Ne detur celeri victima tarda deo.
- Quod semel est triplici pro virgine cæsa Dianæ,  
 Nunc quoque pro nulla virgine cerva cadit.
- Extæ canum vidi Triviæ libare Sappæos,  
 Et quicumque tuas accolit, Hæmæ, nives. 390
- Cæditur et rigido custodi ruris asellus.  
 Causa pudenda quidem est, huic tamen apta deo.
- Festa corymbiferi celebrabas, Græcia, Bacchi,  
 Tertia quæ solito tempore bruma refert.
- Di quoque cultores gelidi venerè Lycæi, 395  
 Et quicumque joci non alienus erat:  
 Panes, et in Venerem Satyrorum prona juventus:  
 Quæque colunt amnes solaque rura deæ.
- Venerat et senior pando Silenus asello,  
 Quique rubro pavidas inguine terret aves. 400
- Dulcia qui dignum nemus in convivia nacti  
 Gramine vestitis accubuere toris.
- Vina dabat Liber: tulerat sibi quisque coronam.  
 Miscendas parce rivus agebat aquas.
- Naides effusis aliæ sine pectinis usu, 405  
 Pars aderant positæ arte manuque comis.
- OID. FAST. 2

- Illa super suras tunicam collecta ministrat;  
 Altera dissuto pectus aperta sinu.  
 Exserit hæc humerum; vestem trahit illa per herbas,  
 Impediunt teneros vincula nulla pedes. 410  
 Hinc aliæ Satyris incendia mitia præbent;  
 Pars tibi, qui pinu tempora nexa geris.  
 Te quoque, inextinctæ Silene libidinis, urunt.  
 Nequitia est, quæ te non sinit esse senem.  
 At ruber, hortorum decus et tutela, Priapus 415  
 Omnibus ex illis Lotide captus erat.  
 Hanc cupit, hanc optat: sola suspirat in illa:  
 Signaque dat nutu, sollicitatque notis.  
 Fastus inest pulchris, sequiturque superbia formam;  
 Irrisum vultu despicit illa suo. 420  
 Nox erat: et, vino somnum faciente, jacebant  
 Corpora diversis victa sopore locis.  
 Lotis in herbosa, sub acernis ultima ramis,  
 Sicut erat lusu fessa quievit humo.  
 Surgit amans; animamque tenens, vestigia furtim 425  
 Suspense digitis fert taciturna gradu.  
 Ut tetigit nivæ secreta cubilia Nymphæ:  
 Ipsa sui flatus ne sonet aura, cavet.  
 Et jam finitima corpus librabat in herba:  
 Illa tamen multi plena soporis erat. 430  
 Gaudet; et a pedibus tracto velamine, vota  
 Ad sua felici cœperat ire via.  
 Ecce rudens rauco Sileni vector asellus  
 Intempestivos edidit ore sonos.  
 Territa consurgens Nymphe manibusque Priapum 435  
 Rejicit, et fugiens concitat omne nemus.  
 At deus, obscæna nimium quoque parte paratus,  
 Omnibus ad lunæ lumina risus erat.  
 Morte dedit pœnas auctor clamoris: et hinc est  
 Hellespontiaco victima grata deo. 440  
 Intactæ fueratis aves, solatia ruris,  
 Assuetum sylvis, innocuumque genus;  
 Quæ facitis nidos, quæ plumis ova fovetis,  
 Et facili dulces editis ore modos.

Sed nihil ista juvant; quia linguæ crimen habetis, 445  
 Dique putant mentes vos aperire suas.  
 Nec tamen id falsum. Nam, dis ut proxima quæque,  
 Nunc penna veras, nunc datis ore notas.  
 Tuta diu volucerum proles, tum denique cæsa est:  
 Juveruntque deos indicis exta sui. 450  
 Ergo sæpe suo conjux abducta marito  
 Uritur in calidis alba columba focis.  
 Nec defensa juvant Capitolia, quo minus anser  
 Det jecur in lances, Inachi lauta, tuas.  
 Nocte deæ Nocti cristatus cæditur ales, 455  
 Quod tepidum vigili provocat ore diem.  
 Interea Delphin clarum super æquora sidus  
 Tollitur, et patriis exserit ora vadis.  
 Postera lux hiemem medio discrimine signat:  
 Æquaque præteritæ, quæ superabit, erit. 460

Proxima prospiciet Tithono Aurora relicto  
 Arcadiæ sacrum pontificale deæ.  
 Te quoque lux eadem, Turni soror, sæde recepit,  
 Hic ubi Virginea Campus obitur aqua.  
 Unde petam causas horum moremque sacrorum? 465  
 Dirigat in medio quis mea vela freto?  
 Ipsa mone, quæ nomen habes a carmine ductum,  
 Propositoque fave, ne tuus erret honos.  
 Orta prior Luna, de se si creditur ipsi,  
 A magno tellus Arcade nomen habet. 470  
 Hic fuit Evander, qui, quanquam clarus utroque,  
 Nobilior sacræ sanguine matris erat;  
 Quæ, simul ætherios animo conceperat ignes,  
 Ore dabat vero carmina plena dei.  
 Dixerat hæc nato motus instare sibi, 475  
 Multaque præterea, tempore nacta fidem.  
 Nam juvenis, vera nimium cum matre fugatus,  
 Deserit Arcadium Parrhasiumque larem.  
 Cui genitrix flenti, Fortuna viriliter, inquit,  
 (Siste, puer, lacrymas,) ista ferenda tibi est. 480



- Sic erat in fatis: nec te tua culpa fugavit,  
 Sed deus: offenso pulsus es urbe deo.  
 Non meriti poenam pateris, sed numinis iram;  
 Est aliquid magnis crimen abesse malis.  
 Conscia mens ut cuique sua est, ita concipit intra 485  
 Pectora pro facto spemque metumque suo.  
 Nec tamen ut primus mœre mala talia passus:  
 Obruit ingentes ista procella viros.  
 Passus idem, Tyriis qui quondam pulsus ab oris  
 Cadmus in Aonia constitit exsul humo. 490  
 Passus idem Tydeus, et idem Pagasæus Iason:  
 Et quos præterea longa referre mora est.  
 Omne solum forti patria est; ut piscibus æquor:  
 Ut volucris, vacuo quicquid in orbe patet.  
 Nec fera tempestas toto tamen horret in anno: 495  
 Et tibi, crede mihi, tempora veris erunt.  
 Vocibus Evander firmata mente parentis  
 Nave secat fluctus, Hesperiamque tenet.  
 Jamque ratem doctæ monitu Carmentis in amnem  
 Egerat, et Tuscis obvius ibat aquis. 500  
 Fluminis illa latus, cui sunt vada juncta Terenti,  
 Adspicit, et sparsas per loca sola casas.  
 Utque erat, immissis puppim stetit ante capillis,  
 Continuitque manum torva regentis iter.  
 Et procul in dextram tendens sua brachia ripam, 505  
 Pineæ non sano ter pede texta ferit.  
 Neve daret saltum properans insistere terræ,  
 Vix est Evandri vixque retenta manu.  
 Dique petitorum, dixit, salvete locorum;  
 Tuque novos cœlo terra datura deos; 510  
 Fluminaque, et fontes, quibus utitur hospita tellus,  
 Et nemorum Nymphæ, Naiadumque chori;  
 Este bonis avibus visi natoque mihique:  
 Ripaque felici tacta sit ista pede.  
 Fallor? an hi fient ingentia mœnia colles? 515  
 Juraque ab hac terra cætera terra petet?  
 Montibus his olim totus promittitur orbis.  
 Quis tantum fati credat habere locum?

- Et jam Dardaniæ tangent hæc littora pinus.  
 Hic quoque causa novi fœmina Martis erit. 520  
 Care nepos, Palla, funesta quid induis arma?  
 Indue: non humili vindice cæsus eris.  
 Victa tamen vinces, eversaque Troja resurges;  
 Obruet hostiles ista ruina domos.  
 Urite victrices Neptunia Pergama flammæ; 525  
 Num minus hic toto est altior orbe cinis?  
 Jam pius Æneas sacra, et sacra altera patrem,  
 Afferet: Iliacos excipe, Vesta, deos.  
 Tempus erit, cum vos, orbemque tuebitur idem:  
 Et fient ipso sacra colente deo: 530  
 Et penes Augustos patriæ tutela manebit.  
 Hanc fas imperii frena tenere domum.  
 Inde nepos natusque dei, licet ipse recuset,  
 Pondera cœlesti mente paterna feret.  
 Utque ego perpetuis olim sacrabor in aris, 535  
 Sic Augusta novum Julia numen erit.  
 Talibus ut dictis nostros descendit ad annos,  
 Substitit in medios præscia lingua sonos.  
 Puppibus egressus Latia stetit exsul in herba.  
 Felix, exsilium cui locus ille fuit! 540  
 Nec mora longa fuit. Stabant nova tecta: nec alter  
 Montibus Ausoniis Arcade major erat.  
 Ecce boves illuc Erytheidas applicat heros,  
 Emensus longi claviger orbis iter.  
 Dumque huic hospitium domus est Tegeæa, vagantur  
 Incustoditæ læta per arva boves. 546  
 Mane erat: excussus somno Tirynthius hospes  
 De numero tauros sentit abesse duos.  
 Nulla videt taciti quærens vestigia furti;  
 Traxerat aversos Cacus in antra feros; 550  
 Cacus, Aventinæ timor atque infamia sylvæ,  
 Non leve finitimis hospitibusque malum.  
 Dira viro facies; vires pro corpore; corpus  
 Grande: pater monstri Mulciber hujus erat.  
 Proque domo longis spelunca recessibus ingens 555  
 Abdita, vix ipsis invenienda feris.

- Ora super postes affixaque brachia pendent,  
 Squalidaque humanis ossibus albet humus.  
 Servata male parte bouum Jove natus abibas :  
 Mugitum rauco furta dedere sono. 560
- Accipio revocamen, ait; vocemque secutus  
 Impia per sylvas ultor ad antra venit.  
 Ille aditum fracti præstruxerat objice montis :  
 Vix juga movissent quinque bis illud opus.  
 Nititur hic humeris, (cælum quoque sederat illis,) 565  
 Et vastum motu collabefactat onus.
- Quod simul evulsum est, fragor æthera terruit ipsum,  
 Ictaque subsedit pondere molis humus.  
 Prima movet Cacus collata prælia dextra,  
 Remque ferox saxis stipitibusque gerit. 570
- Quis ubi nil agitur, patrias male fortis ad artes  
 Confugit, et flammæ ore sonante vomit.  
 Quas quoties proflat, spirare Typhoea credas,  
 Et rapidum Ætnæo fulgur ab igne jaci.  
 Occupat Alcides: adductaque clava trinodis 575  
 Ter quater adversi sedit in ore viri.
- Ille cadit, mixtosque vomit cum sanguine fumos,  
 Et lato moriens pectore plangit humum.  
 Immolat ex illis taurum tibi, Jupiter, unum  
 Victor, et Evandrum ruricolæ vocat. 580
- Constituitque sibi, quæ Maxima dicitur, aram,  
 Hic ubi pars urbis de bove nomen habet.  
 Nec tacet Evandri mater, prope tempus adesse,  
 Hercule quo tellus sit satis usa suo.  
 At felix vates, ut dîs gratissima vixit, 585  
 Possidet hunc Jani sic dea mense diem.
- Idivis in magni castus Jovis æde sacerdos  
 Semimaris flammis viscera libat ovis :  
 Redditaque est omnis populo provincia nostro :  
 Et tuus Augusto nomine dictus avus. 590
- Perlege dispositas generosa per atria ceras ;  
 Contigerunt nulli nomina tanta viro.

- Africa victorem de se vocat: alter Isauras,  
 Aut Cretum domitas testificatur opes.  
 Hunc Numidæ faciunt, illum Messana superbum: 595  
 Ille Numantina traxit ab urbe notam.  
 Et mortem et nomen Druso Germania fecit.  
 Me miserum, virtus quam brevis illa fuit!  
 Si petat a victis, tot sumat nomina Cæsar,  
 Quot numero gentes maximus orbis habet. 600  
 Ex uno quidam celebres, aut torquis ademptæ,  
 Aut corvi titulos auxiliariis habent.  
 Magne, tuum nomen rerum mensura tuarum est:  
 Sed qui te vicit, nomine major erat.  
 Nec gradus est ultra Fabios cognominis ullus; 605  
 Illa domus meritis Maxima dicta suis.  
 Sed tamen humanis celebrantur honoribus omnes;  
 Hic socium summo cum Jove nomen habet.  
 Sancta vocant augusta patres: augusta vocantur  
 Templâ, sacerdotum rite dicata manu. 610  
 Hujus et augurium dependet origine verbi,  
 Et quodcunque sua Jupiter auget ope.  
 Augeat imperium nostri ducis, augeat annos:  
 Protegat et vestras quærna corona fores.  
 Auspicibusque deis tanti cognominis hæres 615  
 Omine suscipiat, quo pater, orbis onus.
- Respiciet Titan actas ubi tertius Idus,  
 Fient Parrhasiæ sacra relata deæ.  
 Nam prius Ausonias matres carpenta vehebant;  
 Hæc quoque ab Evandri dicta parente reor. 620  
 Mox honor eripitur; matronaque destinat omnis  
 Ingratos nulla prole novare viros.  
 Neve daret partus, ictu temeraria cæco  
 Visceribus crescens excutiebat onus.  
 Corripuisse patres ausas immitia nuptas, 625  
 Jus tamen exemptum restituisse, ferunt.  
 Binaque nunc pariter Tegeææ sacra parenti  
 Pro pueris fieri virginibusque jubent.

- Scortea non illi fas est inferre sacello,  
 Ne violent puros exanimata focos. 630
- Si quis amas ritus veteres, adsiste precanti:  
 Nomina percipies non tibi nota prius.  
 Porrimum placantur Postvertaque, sive sorores,  
 Sive fugæ comites, Mænali Nympha, tuæ.  
 Altera, quod porro fuerat, cecinisse putatur, 635  
 Altera versurum postmodo quicquid erat.
- Candida te niveo posuit lux proxima templo,  
 Qua fert sublimes alta Moneta gradus:  
 Nunc bene prospicies Latiam, Concordia, turbam;  
 Nunc te sacratæ restituere manus. 640
- Furius antiquam populi superator Etrusci  
 Voverat, et voti solverat ante fidem.  
 Causa, quod a patribus sumtis secesserat armis  
 Vulgus, et ipsa suas Roma timebat opes. 645
- Causa recens melior: passos Germania crines  
 Porrigit auspiciis, dux venerande, tuis.  
 Inde triumphatæ libasti munera gentis,  
 Templaque fecisti, quam colis ipse, deæ.  
 Hæc tua constituit Genitrix et rebus et ara,  
 Sola toro magni digna reperta Jovis. 650
- Hæc ubi transierint; Capricorno, Phœbe, relicto,  
 Per juvenis cures signa gerentis aquam.
- Septimus hinc Oriens cum se demiserit undis,  
 Fulgebit toto jam Lyra nulla polo.
- Sidere ab hoc, ignis venienti nocte, Leonis 655  
 Qui micat in medio pectore, mersus erit.
- Ter quater evolvi signantes tempora fastos,  
 Nec Sementiva est ulla reperta dies:  
 Cum mihi, sensit enim, Lux hæc indicitur, inquit  
 Musa; quid a fastis non stata sacra petis? 660
- Utque dies incerta sacro, sic tempora certa,  
 Seminibus jactis est ubi fetus ager.

- State coronati plenum ad præsepe juveni;  
 Cum tepido vestrum vere redibit opus.
- Rusticus emeritum palo suspendat aratrum; 665  
 Omne reformidat frigida vulnus humus.  
 Villice, da requiem terræ, semente peracta;  
 Da requiem, terram qui coluere, viris.
- Pagus agat festum: pagum lustrate, coloni,  
 Et date paganis annua liba focis. 670  
 Placentur matres frugum Tellusque Ceresque,  
 Farre suo gravidæ visceribusque suis.  
 Officium commune Ceres et Terra tuentur:  
 Hæc præbet causam frugibus, illa locum.  
 Consortes operum, per quas correctæ vetustas, 675  
 Quærnaque glans victa est utiliore cibo;  
 Frugibus immensis avidos satiate colonos,  
 Ut capiant cultus præmia digna sui.  
 Vos date perpetuos teneris sementibus auctus:  
 Nec nova per gelidas herba sit usta nives. 680  
 Cum serimus, cælum ventis aperite serenis:  
 Cum latet, ætheria spargite semen aqua.  
 Neve graves cultis Cerealia dona, cavete,  
 Agmine læsuro depopulentur aves.  
 Vos quoque subjectis, formicæ, parcite granis: 685  
 Post messem prædæ copia major erit.  
 Interea crescat scabræ robiginis expers,  
 Nec vitio cæli palleat ægra seges.  
 Et neque deficiat macie, neque pinguior æquo  
 Divitiis pereat luxuriosa suis. 690  
 Et careant loliis oculos vitiantibus agri,  
 Nec sterilis culto surgat avena solo.  
 Triticeos fetus, passuraque farra bis ignem,  
 Hordeaque ingenti fœnore reddat ager.  
 Hoc ego pro vobis, hoc vos optate coloni: 695  
 Efficiantque ratas utraque diva preces.  
 Bella diu tenuere viros: erat aptior ensis  
 Vomere; cedebat taurus arator equo.  
 Sarcula cessabant: versique in pila ligones,  
 Factaque de rastro pondere cassis erat. 700

Gratia dis, domuique tuæ! religata catenis  
 Jampridem nostro sub pede bella jacent.  
 Sub juga bos veniat; sub terris semen aratas;  
 Pax Cererem nutrit: pacis alumna Ceres.

At quæ venturas præcedet sexta Kalendas, 705  
 Hac sunt Ledæis templa dicata deis.  
 Fratibus illa deis fratres de gente deorum  
 Circa Juturnæ composuere lacus.

Ipsum nos carmen deducit Pacis ad aram.  
 Hæc erit a mensis fine secunda dies. 710  
 Frondibus Actiacis comtos redimita capillos,  
 Pax, ades, et toto mitis in orbe mane.  
 Dum desint hostes, desit quoque causa triumphî;  
 Tu ducibus bello gloria major eris.

Sola gerat miles, quibus arma coerceat, arma: 715  
 Canteturque fera nil nisi pompa tuba.  
 Horreat Æneadas et primus et ultimus orbis;  
 Si qua parum Romam terra timebit, amet.  
 Thura, sacerdotes, pacalibus addite flammis,  
 Albaque percussa victima fronte cadat. 720

Utque domus, quæ præstat eam, cum Pace perennet,  
 Ad pia propensos vota rogate deos.  
 Sed jam prima mei pars est exacta laboris:  
 Cumque suo finem mense libellus habet.

## LIBER SECUNDUS.

- JANUS habet finem: cum carmine crescit et annus;  
Alter ut hinc mensis, sic liber alter eat.  
Nunc primum velis, elegi, majoribus itis:  
Exiguum, memini, nuper eratis opus.  
Certe ego vos habui faciles in amore ministros, 5  
Cum lusit numeris prima juvenita suis.  
Idem sacra cano, signataque tempora fastis.  
Ecquis ad hæc illinc crederet esse viam?  
Hæc mea militia est: ferimus quæ possumus arma:  
Dextraque non omni munere nostra vacat. 10  
Si mihi non valido torquentur pila lacerto,  
Nec bellatoris terga premuntur equi;  
Nec galea tegimur, nec acuto cingimur ense;  
His habilis telis quilibet esse potest:  
At tua prosequimur studioso pectore, Cæsar, 15  
Nomina, per titulos ingredimurque tuos.  
Ergo ades, et placido paulum mea munera vultu  
Respice, pacando si quid ab hoste vacat.
- Februa Romani dixere piamina patres:  
Nunc quoque dant verbo plurima signa fidem. 20  
Pontifices ab rege petunt et flamine lanas,  
Quis veteri lingua Februa nomen erat.  
Quæque capit lictor domibus purgamina certis,  
Torrída cum mica farra, vocantur idem.  
Nomen idem ramo, qui, cæsus ab arbore pura, 25  
Casta sacerdotum tempora fronde tegit.  
Ipse ego Flaminicam poscentem februa vidi:  
Februa poscenti pinea virga data est.  
Denique quodcunque est, quo pectora nostra piatur,  
Hoc apud intonsos nomen habebat avos. 30



- Mensis ab his dictus, secta quia pelle Luperci  
 Omne solum lustrant, idque piamen habent.  
 Aut quia placatis sunt tempora pura sepulchris,  
 Tunc cum ferales præteriere dies.  
 Omne nefas, omnemque mali purgamina causam 35  
 Credebant nostri tollere posse senes.  
 Græcia principium moris fuit. Illa nocentes  
 Impia lustratos ponere facta putat.  
 Actoriden Peleus, ipsum quoque Pelea Phoci  
 Cæde per Hæmonias solvit Acastus aquas. 40  
 Vectam frenatis per inane draconibus Ægeus  
 Credulus immerita Phasida iuvit ope.  
 Amphiaraides Naupactoo Acheloo,  
 Solve nefas, dixit; solvit et ille nefas.  
 Ah nimium faciles, qui tristia crimina cædis 45  
 Fluminea tolli posse putetis aqua!  
 Sed tamen, antiqui ne nescius ordinis erres,  
 Primus, ut est, Jani mensis et ante fuit.  
 Qui sequitur Janum, veteris fuit ultimus anni.  
 Tu quoque sacrorum, Termine, finis eras. 50  
 Primus enim Jani mensis, quia janua prima est;  
 Qui sacer est imis Manibus, imus erat.  
 Postmodo creduntur spatio distantia longo  
 Tempora bis quini continuasse viri.
- Principio mensis, Phrygiæ contermina Matri 55  
 Sospita delubris dicitur aucta novis.  
 Nunc ubi sint illis, quæris, sacrata Kalendis  
 Tempa deæ? longo procubuere die.  
 Cætera ne simili caderent labefacta ruina,  
 Cavit sacrati provida cura ducis: 60  
 Sub quo delubris sentitur nulla senectus.  
 Nec satis est homines, obligat ille deos.  
 Templorum positor, templorum sancte repostor,  
 Sit superis, opto, mutua cura tui.  
 Dent tibi cœlestes, quot tu cœlestibus, annos, 65  
 Proque tua maneant in statione domo.

Tum quoque vicini lucus celebratur Asyli,  
 Qua petit æquoreas advena Tibris aquas.  
 Ad penetrale Numæ, Capitolinumque Tonantem,  
 Inque Jovis summa cæditur arce bidens. 70  
 Sæpe graves pluvias adoportus nubibus Auster  
 Concitat, aut posita sub nive terra latet.

Proximus Hesperias Titan abiturus in undas  
 Gemmea purpureis cum juga demit equis;  
 Illa nocte aliquis, tollens ad sidera vultum, 75  
 Dicit, Ubi est hodie, quæ Lyra fulsit heri?  
 Dumque Lyram quæret, medii quoque terga Leonis  
 In liquidas subito mersa notabit aquas.

Quem modo cælatum stellis Delphina videbas,  
 Is fugiet visus nocte sequente tuos. 80  
 Seu fuit occultis felix in amoribus index;  
 Lesbida cum domino seu tulit ille lyram.  
 Quod mare non novit, quæ nescit Ariona tellus?  
 Carmine currentes ille tenebat aquas.  
 Sæpe sequens agnam lupus est hac voce retentus; 85  
 Sæpe avidum fugiens restitit agna lupum:  
 Sæpe canes leporesque umbra cubuere sub una:  
 Et stetit in saxo proxima cerva leæ:  
 Et sine lite loquax cum Palladis alite cornix  
 Sedit: et accipitri juncta columba fuit. 90  
 Cynthia sæpe tuis fertur, vocalis Arion,  
 Tanquam fraternis obstupuisse modis.  
 Nomen Arionum Siculas impleverat urbes;  
 Captaque erat lyricis Ausonis ora sonis.  
 Inde domum repetens puppim conscendit Arion, 95  
 Atque ita quæsitâ arte ferebat opes.  
 Forsitan, infelix, ventos undamque timebas;  
 At tibi nave tua tutius æquor erat.  
 Namque gubernator dstricto constitit ense,  
 Cæteraque armata conscia turba manu. 100  
 Quid tibi cum gladio? dubiam rege, navita, pinum;  
 Non sunt hæc digitis arma tenenda tuis.

Ille metu pavidus, Mortem non deprecor, inquit;  
 Sed liceat sumta pauca referre lyra.  
 Dant veniam, ridentque moram. Caput ille coronam;  
 Quæ possit crines, Phœbe, decere tuos. 106  
 Induerat Tyrio bis tinctam murice pallam:  
 Reddidit icta suos pollice chorda sonos.  
 Flebilibus veluti numeris canentia dura  
 Trajectus penna tempora cantat olor. 110  
 Protinus in medias ornatus desilit undas;  
 Spargitur impulsa cœrula puppis aqua.  
 Inde (fide majus) tergo delphina recurvo  
 Se memorant oneri supposuisse novo.  
 Ille sedens citharamque tenet, pretiumque vehendi 115  
 Cantat, et æquoreas carmine mulcet aquas.  
 Di pia facta vident. Astris delphina recepit  
 Jupiter, et stellas jussit habere novem.

Nunc mihi mille sonos, quoque est memoratus Achilles,  
 Vellem, Mæonide, pectus inesse tuum. 120  
 Dum canimus sacras alterno carmine Nonas:  
 Maximus hinc fastis accumulatur honos.  
 Deficit ingenium, majoraque viribus urgent;  
 Hæc mihi præcipuo est ore canenda dies.  
 Quid volui demens elegis imponere tantum 125  
 Ponderis? heroi res erat ista pedis.  
 Sancte Pater Patriæ, tibi plebs, tibi curia nomen  
 Hoc dedit; hoc dedimus nos tibi nomen eques.  
 Res tamen ante dedit. Sero quoque vera tulisti  
 Nomina: jam pridem tu pater orbis eras. 130  
 Hoc tu per terras, quod in æthere Jupiter alto,  
 Nomen habes. Hominum tu pater, ille deûm.  
 Romule, concedas: facit hic tua magna tuendo  
 Mœnia; tu dederas transilienda Remo.  
 Te Tatius, parvique Cures, Cœninaque sensit; 135  
 Hoc duce Romanum est solis utrumque latus.  
 Tu breve nescio quid victæ telluris habebas;  
 Quodcunque est alto sub Jove, Cæsar habet.

Tu rapis, hic castas duce se jubet esse maritas;  
 Tu recipis luco, submovet ille nefas. 140  
 Vis tibi grata fuit; florent sub Cæsare leges;  
 Tu Domini nomen, Principis ille tenet.  
 Te Remus incusat; veniam dedit hostibus ille;  
 Cœlestem fecit te pater; ille patrem.  
 Jam puer Idæus media tenus eminet alvo, 145  
 Et liquidas mixto nectare fundit aquas.  
 En etiam, si quis Borean horrere solebat,  
 Gaudeat; a Zephyris mollior aura venit.

Quintus ab æquoreis nitidum jubar extulit undis  
 Lucifer, et primi tempora veris erunt. 150  
 Ne fallare tamen; restant tibi frigora, restant:  
 Magnaque discedens signa reliquit hiems.

Tertia nox veniat: Custodem protinus Ursæ  
 Adspicias geminos exseruisse pedes.  
 Inter Hamadryadas jaculatricemque Dianam 155  
 Callisto sacri pars fuit una chori.  
 Illa deæ tangens arcus, Quos tangimus, arcus,  
 Este meæ testes virginitatis, ait.  
 Cynthia laudavit, Promissaque fœdera serva,  
 Et comitum princeps tu mihi, dixit, eris. 160  
 Fœdera servasset, si non formosa fuisset.  
 Cavet mortales; ab Jove crimen habet.  
 Mille feras Phœbe sylvis venata redibat,  
 Aut plus, aut medium sole tenente diem.  
 Ut tetigit lucum, (densa niger ilice lucus; 165  
 In medio gelidæ fons erat altus aquæ:)  
 Hac, ait, in sylvâ, virgo Tegeæa, lavemur:  
 Erubuit falso virginis illa sono.  
 Dixerat et Nymphis: Nymphæ velamina ponunt;  
 Hanc pudet, et tardæ dat mala signa moræ. 170  
 Exuerat tunicas: uteri manifesta tumore  
 Proditur indicio ponderis ipsa sui.  
 Cui dea, Virgineos, perjura Lycaoni, cœtus  
 Desere, nec castas pollue, dixit, aquas.

|  |     |
|--|-----|
| Luna novum decies implebat cornibus orbem :              | 175 |
| Quæ fuerat virgo credita, mater erat.                    |     |
| Læsa furit Juno, formam mutatque puellæ.                 |     |
| Quid facis? invito pectore passa Jovem est.              |     |
| Utque feræ vidit turpes in pellice vultus,               |     |
| Hujus in amplexus Jupiter, inquit, eat.                  | 180 |
| Ursa per incultos errabat squalida montes,               |     |
| Quæ fuerat summo nuper amanda Jovi.                      |     |
| Jam tria lustra puer furto conceptus agebat,             |     |
| Cum mater nato est obvia facta suo.                      |     |
| Illa quidem, tanquam cognosceret, adstitit amens,        | 185 |
| Et gemuit: gemitus verba parentis erant.                 |     |
| Hanc puer ignarus jaculo fixisset acuto;                 |     |
| Ni foret in superas raptus uterque domos.                |     |
| Signa propinqua micant. Priore est, quam dicimus Arcton; |     |
| Arctophylax formam terga sequentis habet.                | 190 |
| Sævit adhuc, canamque rogat Saturnia Tethyn,             |     |
| Mænaliæ tactis ne lavet Arcton aquis.                    |     |
| <br>   |     |
| Idibus agrestis fumant altaria Fauni,                    |     |
| Hic ubi discretas insula rumpit aquas.                   |     |
| Hæc fuit illa dies, in qua Veientibus arvis              | 195 |
| Ter centum Fabii, ter cecidere duo.                      |     |
| Una domus vires et onus susceperat urbis :               |     |
| Sumunt gentiles arma professa manus.                     |     |
| Egreditur castris miles generosus ab isdem,              |     |
| E quis dux fieri quilibet aptus erat.                    | 200 |
| Carmentis portæ dextro via proxima Jano est.             |     |
| Ire per hanc noli, quisquis es; omen habet.              |     |
| Illa fama refert Fabios exisse trecentos.                |     |
| Porta vacat culpa, sed tamen omen habet.                 |     |
| Ut celeri passu Cremeram tetigere rapacem,               | 205 |
| (Turbidus hibernis ille fluebat aquis.)                  |     |
| Castra loco ponunt; dstrictis ensibus ipsi               |     |
| Tyrrenum valido Marte per agmen eunt.                    |     |
| Non aliter, quam cum Libyca de rupe leones               |     |
| Invadunt sparsos lata per arva greges.                   | 210 |

Diffugiunt hostes, inhonestaque vulnera tergo  
 Accipiunt: Tusco sanguine terra rubet.  
 Sic iterum, sic sæpe cadunt. Ubi vincere aperte  
 Non datur, insidias armaque cæca parant.  
 Campus erat: campi claudebant ultima colles, 215  
 Sylvaque montanas occulere apta feras.  
 In medio paucos, armenta que rara relinquunt;  
 Cætera virgultis abdita turba latet.  
 Ecce, velut torrens undis pluvialibus auctus,  
 Aut nive, quæ Zephyro victa tepente fluit, 220  
 Per sata perque vias fertur, nec, ut ante solebat,  
 Riparum clausas margine finit aquas:  
 Sic Fabii latis vallem discursibus implent;  
 Quosque vident, spernunt: nec metus alter inest.  
 Quo ruitis, generosa domus? male creditur hosti. 225  
 Simplex nobilitas, perfida tela cave.  
 Fraude perit virtus. In apertos undique campos  
 Prosiliunt hostes, et latus omne tenent.  
 Quid facient pauci contra tot millia fortes?  
 Quidve, quod in misero tempore restet, habent? 230  
 Sicut aper, sylvis longe Laurentibus actus,  
 Fulmineo celeres dissipat ore canes;  
 Mox tamen ipse perit: sic non moriuntur inulti;  
 Vulneraque alterna dantque feruntque manu.  
 Una dies Fabios ad bellum miserat omnes: 235  
 Ad bellum missos perdidit una dies.  
 Ut tamen Herculeæ superessent semina gentis,  
 Credibile est ipsos consuluisse deos.  
 Nam puer impubes, et adhuc non utilis armis,  
 Unus de Fabia gente relictus erat. 240  
 Scilicet ut posses olim tu, Maxime, nasci,  
 Cui res cunctando restituenda foret.

Continuata loco tria sidera, Corvus et Anguis,  
 Et medius Crater inter utrumque jacet.  
 Idibus illa latent: oriuntur nocte sequenti. 245  
 Quæ sibi cur tria sint consociata canam.

- Forte Jovi festum Phœbus solenne parabat:  
 Non faciet longas fabula nostra moras.  
 I mea, dixit, avis, ne quid pia sacra moretur,  
 Et tenuem vivis fontibus affer aquam. 250  
 Corvus inauratum pedibus cratera recurvis  
 Tollit, et aërium pervolat altus iter.  
 Stabat adhuc duris ficus densissima pomis:  
 Tentat eam rostro; non erat apta legi.  
 Immemor imperii sedisse sub arbore fertur, 255  
 Dum fierent tarda dulcia poma mora.  
 Jamque satur, nigris longum rapit unguibus hydrum,  
 Ad dominumque redit, fictaque verba refert:  
 Hic mihi causa moræ, vivarum obsessor aquarum:  
 Hic tenuit fontes, officiumque meum. 260  
 Addis, ait, culpæ mendacia, Phœbus, et audes  
 Fatidicum verbis fallere velle deum?  
 At tibi, dum lactens hærebit in arbore ficus,  
 De nullo gelidæ fonte bibantur aquæ.  
 Dixit: et antiqui monumenta perennia facti 265  
 Anguis, Avis, Crater, sidera juncta micant.
- Tertia post Idus nudos Aurora Lupercos  
 Adspicit: et Fauni sacra bicornis eunt.  
 Dicite, Pierides, sacrorum quæ sit origo,  
 Attigerint Latias unde petita domos. 270  
 Pana deum pecoris veteres coluisse feruntur  
 Arcades; Arcadiis plurimus ille jugis.  
 Testis erit Pholoe, testes Stymphalides undæ,  
 Quique citis Ladon in mare currit aquis,  
 Cinctaque pinetis nemoris juga Nonacrini, 275  
 Altaque Cyllene, Parthasiæque nives.  
 Pan erat armenti custos, Pan numen equarum:  
 Munus ob incolumes ille ferebat oves.  
 Transtulit Evander sylvestria numina secum.  
 Hic, ubi nunc urbs est, tum locus urbis erat. 280  
 Inde deum colimus, devectaque sacra Pelasgis.  
 Flamen ad hæc prisco more Dialis erat.

Cur igitur currant, et cur (sic currere mos est)

Nuda ferant posita corpora veste, rogas?

Ipsè deus velox discurrere gaudet in altis 285

Montibus, et subitas concitat ille feras.

Ipsè deus nudus nudos jubet ire ministros:

Nec satis ad cursum commoda vestis erat.

Ante Jovem genitum terras habuisse feruntur

Arcades: et Luna gens prior illa fuit. 290

Vita feræ similis, nullos agitata per usus:

Artis adhuc expers, et rude vulgus erat.

Pro domibus frondes norant, pro frugibus herbas:

Nectar erat palmis hausta duabus aqua.

Nullus anhelabat sub adunco vomere taurus: 295

Nulla sub imperio terra colentis erat:

Nullus adhuc erat usus equi: se quisque ferebat.

Ibat ovis lana corpus amicta sua.

Sub Jove durabant, et corpora nuda gerebant,

Docta graves imbres et tolerare Notos. 300

Nunc quoque detecti referunt monumenta vetusti

Moris, et antiquas testificantur opes.

Sed cur præcipue fugiat velamina Faunus,

Traditur antiqui fabula plena joci.

Forte comes dominæ juvenis Tiryntius ibat: 305

Vidit ab excelso Faunus utrumque jugo.

Vidit, et incaluit, Montanaque numina, dixit,

Nil mihi vobiscum est: hæc meus ardor erit.

Ibat odoratis humeros perfusa capillis

Mæonis, aurato conspicienda sinu. 310

Aurea pellebant rapidos umbracula soles;

Quæ tamen Herculeæ sustinere manus.

Jamque nemus Bacchi, Tmoli vineta, tenebat,

Hesperus et fusco roscidus ibat equo;

Antra subit tophis laqueataque pumice vivo. 315

Garrulus in primo limine rivus erat.

Dumque parant epulas potandaque vina ministri,

Cultibus Alciden instruit illa suis.

Dat tenues tunicas, Gætulo murice tinctas:

Dat teretem zonam, qua modo cincta fuit. 320



- Ventre minor zona est: tunicarum vincla relaxat,  
 Ut possit vastas exseruisse manus.
- Fregerat armillas non illa ad brachia factas:  
 Stringebant magnos vincula parva pedes.
- Ipsa capit clavamque gravem, spoliumpque leonis, 325  
 Conditaque in pharetra tela minora sua.
- Sic epulis functi, sic dant sua corpora somno;  
 Et positis juxta secubuere toris.
- Causa: repertori vitis pia sacra parabant,  
 Quæ facerent pure, cum foret orta dies. 330
- Noctis erat medium; (quid non amor improbus audet?)  
 Roscida per tenebras Faunus ad antra venit.
- Utque videt somno comites vinoque solutos,  
 Spem capit in dominis esse soporis idem.
- Intrat, et huc illuc temerarius errat adulter: 335  
 Et præfert cautas subsequiturque manus.
- Venerat ad strati captata cubilia lecti;  
 Et prima felix sorte futurus erat.
- Ut tetigit fulvi setis hirsuta leonis  
 Vellera, pertimuit, sustinuitque manum; 340
- Attonitusque metu riguit, ut sæpe viator  
 Turbatum viso retulit angue pedem.
- Inde tori, qui junctus erat, velamina tangit  
 Mollia, mendaci decipiturque nota.
- Interea tunicas ora subducit ab ima: 345  
 Horrebant densis aspera crura pilis.
- Cætera tentantem cubito Tirynthius heros  
 Reppulit, et summo decedit ille toro.
- Fit sonus: inclamat comites, et lumina poscit  
 Mæonis. Illatis ignibus acta patent. 350
- Ille gemit lecto graviter dejectus ab alto:  
 Membraque de dura vix sua tollit humo.
- Ridet et Alcides, et qui videre jacentem;  
 Ridet amatorem Lyda puella suum.
- Veste deus lusus fallentes lumina vestes 355  
 Non amat, et nudos ad sua sacra vocat.

Adde peregrinis causas, mea Musa, Latinas :

Inque suo noster pulvere currat equus.

Cornipedi Fauno cæssa de more capella

Venit ad exiguas turba vocata dapes. 360

Dumque sacerdotes verubus transsuta salignis

Extæ parant, medias sole tenente vias ;

Romulus, et frater, pastoralisque juvenus,

Solibus et campo corpora nuda dabant :

Cæstibus, et jaculis, et missi pondere saxi 365

Brachia per lusus experienda dabant.

Pastor ab excelso, Per devia rura juvencos,

Romule, prædones, eripe, dixit, agunt.

Longum erat armari. Diversis exit uterque

Partibus. Accursu præda recepta Remi. 370

Ut rediit, verubus stridentia detrahit extæ ;

Atque ait, Hæc certe non nisi victor edet.

Dicta facit, Fabiique simul. Venit irritus illuc

Romulus, et mensas ossaque nuda videt.

Risit ; et indoluit Fabios potuisse Remumque 375

Vincere, Quinctilios non potuisse suos.

Fama manet facti : posito velamine currunt,

Et memorem famam, quod bene cessit, habet.

Forsitan et quæras, cur sit locus ille Lupercal,

Quæve diem tali nomine causa notet. 380

Ilia Vestalis coelestia semina partu

Ediderat, patruo regna tenente suo.

Is jubet auferri parvos, et in amne necari.

Quid facis ? ex istis Romulus alter erit.

Jussa recusantes peragunt lacrymosa ministri ; 385

Flent tamen, et geminos in loca jussa ferunt.

Albula, quem Tibrin mersus Tiberinus in unda

Reddidit, hibernis forte tumebat aquis.

Hic, ubi nunc fora sunt, lintres errare videres,

Quaque jacent valles, Maxime Circe, tuæ. 390

Huc ubi venerunt, (neque enim procedere possunt

Longius,) ex illis unus, an alter, ait :

At quam sunt similes ! at quam formosus uterque !

Plus tamen ex illis iste vigoris habet.

- Si genus arguitur vultu, ni fallit imago, 395  
 Nescio quem vobis suspicor esse deum.  
 At si quis vestræ deus esset originis auctor,  
 In tam præcipiti tempore ferret opem.  
 Ferret opem certe, si non ope mater egeret,  
 Quæ facta est uno mater et orba die. 400  
 Nata simul, peritura simul, simul ite sub undas  
 Corpora. Desierat; deposuitque sinu.  
 Vagierunt clamore pari: sentire putares.  
 Hi redeunt udis in sua tecta genis.  
 Sustinet impositos summa cavus alveus unda. 405  
 Heu quantum fati parva tabella vehit!  
 Alveus in limo sylvia appulsus opacis,  
 Paullatim fluvio deficiente, sedet.  
 Arbor erat: remanent vestigia, quæque vocatur  
 Rumina nunc ficus, Romula ficus erat. 410  
 Venit ad expositos (mirum) lupa feta gemellos.  
 Quis credat pueris non nocuisse feram?  
 Non nocuisse parum est; prodest quoque: quos lupa  
 nutrit,  
 Perdere cognatæ sustinuere manus.  
 Constitit, et cauda teneris blanditur alumnis, 415  
 Et fingit lingua corpora bina sua.  
 Marte satos scires; timor abfuit. Ubera ducunt,  
 Nec sibi promissi lactis aluntur ope.  
 Illa loco nomen fecit, locus ipse Lupercis.  
 Magna dati nutrix præmia lactis habet. 420  
 Quid vetat Arcadio dictos a monte Lupercos?  
 Faunus in Arcadia templa Lycæus habet.  
 Nupta, quid exspectas? non tu pollentibus herbis,  
 Nec prece, nec magico carmine mater eris.  
 Excipe fecundæ patienter verbera dextræ; 425  
 Jam socer optati nomen habebit avi.  
 Nam fuit illa dies, dura cum sorte maritæ  
 Beddebant uteri pignora rara sui.  
 Quid mihi, clamabat, prodest rapuisse Sabinas,  
 Romulus? (hoc illo scepra tenente fuit:) 430

- Si mea non vires, sed bellum injuria fecit,  
 Utilius fuerat non habuisse nurus.  
 Monte sub Esquihio, multis incæduus annis,  
 Junonis magnæ nomine lucus erat.  
 Huc ubi venerunt, pariter nuptæque virique 435  
 Suppliciter posito procubuere genu.  
 Cum subito motæ tremuere cacumina sylvæ,  
 Et dea per lucos mira locuta suos.  
 Italidas matres, inquit, sacer hircus inito.  
 Obstupuit dubio territa turba sono. 440  
 Augur erat: nomen longis intercidit annis.  
 Nuper ab Etrusca venerat exsul humo.  
 Ille caprum mactat: jussæ sua terga maritæ  
 Pellibus exsectis percutienda dabant.  
 Luna resumebat decimo nova cornua motu, 445  
 Virque pater subito, nuptaque mater erat.  
 Gratia Lucinæ: dedit hæc tibi nomina lucus;  
 Aut quia principium tu, dea, lucis habes.  
 Parce precor gravidis, facilis Lucina, puellis,  
 Maturumque utero molliter effer onus. 450
- Orta dies fuerit; tu desine credere ventis;  
 Perdidit illius temporis aura fidem.  
 Flamina non constant: et sex reserata diebus  
 Carceris Æolii janua laxa patet.
- Jam levis obliqua subsedit Aquarius urna. 455  
 Proximus ætherios excipe, Piscis, equos.  
 Te memorant fratremque tuum (nam juncta micatis  
 Signa) duos tergo sustinuisse deos.  
 Terribilem quondam fugiens Typhona Dione,  
 Tunc cum pro cælo Jupiter arma tulit, 460  
 Venit ad Euphraten comitata Cupidine parvo,  
 Inque Palæstinæ margine sedit aquæ.  
 Populus et cannæ riparum summa tenebant:  
 Spemque dabant salices, hos quoque posse tegi.  
 Dum latet, insonuit vento nemus. Illa timore 465  
 Pallet, et hostiles credit adesse manus.

Utque sinu natum tenuit, Succurrite, Nymphæ,  
 Et dis auxilium ferte duobus, ait.  
 Nec mora; prosiluit. Pisces subiere gemelli;  
 Pro quo nunc dignum sidera munus habent. 470  
 Inde nefas ducunt genus hoc imponere mensis,  
 Nec violant timidi piscibus ora Syri.

Proxima lux vacua est: at tertia dicta Quirino.  
 Qui tenet hoc nomen, Romulus ante fuit.  
 Sive quod hasta *curis* priscis est dicta Sabinis, 475  
 Bellicus a telo venit in astra deus;  
 Sive suum regi nomen posuere Quirites;  
 Seu quia Romanis junxerat ille Cures.  
 Nam pater armipotens, postquam nova moenia vidit,  
 Multaque Romulea bella peracta manu, 480  
 Jupiter, inquit, habet Romana potentia vires:  
 Sanguinis officio non eget illa mei.  
 Redde patri natum: quamvis intercidit alter,  
 Pro se, proque Remo, qui mihi restat, erit.  
 Unus erit, quem tu tolles in cœrula cœli, 485  
 Tu mihi dixisti: sint rata dicta Jovis.  
 Jupiter annuerat. Nutu tremefactus uterque  
 Est polus, et cœli pondera sensit Atlas.  
 Est locus, antiqui Capream dixere paludem;  
 Forte tuis illic, Romule, jura dabas. 490  
 Sol fugit, et removent subeuntia nubila cœlum:  
 Et gravis effusis decidit imber aquis.  
 Hinc tonat, hinc missis abrumpitur ignibus æther.  
 Fit fuga, rex patriis astra petebat equis.  
 Luctus erat, falsæque Patres in crimine cædis; 495  
 Hæsissetque animis forsitan illa fides;  
 Sed Proculus Longa veniebat Julius Alba;  
 Lunaque fulgebat, nec facis usus erat:  
 Cum subito motu nubes crepuere sinistrae.  
 Rettulit ille gradus, horrueruntque comæ. 500  
 Pulcher, et humano major, trabeaque decorus  
 Romulus in media visus adesse via;

- Et dixisse simul, Prohibe lugere Quirites;  
 Nec violent lacrymis numina nostra suis.  
 Thura ferant, placentque novum pia turba Quirinum,  
 Et patrias artes militiamque colant. 506  
 Jussit, et in tenues oculis evanuit auras.  
 Convocat hic populos, jussaque verba refert.  
 Templâ deo fiunt: collis quoque dictus ab illo;  
 Et referunt certi sacra paterna dies. 510  
 Lux quoque cur eadem Stultorum festa vocetur,  
 Accipe: parva quidem causa, sed apta subest.  
 Non habuit tellus doctos antiqua colonos:  
 Lassabant agiles aspera bella viros.  
 Plus erat in gladio, quam curvo laudis aratro; 515  
 Neglectus domino pauca ferebat ager.  
 Farra tamen veteres jaciebant, farra metebant:  
 Primitias Cereri farra resecta dabant.  
 Usibus admoniti flammis torrenda dedere,  
 Multaque peccato damna tulere suo. 520  
 Nam modo verrebant nigras pro farre favillas;  
 Nunc ipsas igni corripuere casas.  
 Facta dea est Fornax: læti Fornace coloni  
 Orant, ut fruges temperet illa suas.  
 Curio legitimis nunc Fornacalia verbis 525  
 Maximus indicit: nec stata sacra facit:  
 Inque Foro, multa circum pendente tabella,  
 Signatur certa curia quæque nota.  
 Stultaque pars populi, quæ sit sua curia, nescit;  
 Sed facit extrema sacra relata die. 530
- Est honor et tumulis. Animas placate paternas,  
 Parvaque in extinctas munera ferte pyras.  
 Parva petunt Manes: pietas pro divite grata est  
 Munere: non avidos Styx habet ima deos.  
 Tegula porrectis satis est velata coronis, 535  
 Et sparsæ fruges, parcaque mica salis,  
 Inque mero mollita Ceres, violæque solutæ.  
 Hæc habeat media testa relicta via.

- Nec majora veto : sed et his placabilis umbra est.  
 Adde preces, positis et sua verba focus. 540
- Hunc morem Æneas, pietatis idoneus auctor,  
 Attulit in terras, juste Latine, tuas.  
 Ille patris Genio sollennia dona ferebat;  
 Hinc populi ritus edidicere pios.
- At quondam, dum longa gerunt pugnacibus armis  
 Bella, parentales deseruere dies. 546
- Non impune fuit : nam dicitur omnia ab isto  
 Roma suburbanis incaluisse rogis.  
 Vix equidem credo ; bustis exisse feruntur,  
 Et tacitæ questi tempore noctis avi. 550
- Perque vias urbis, Latiosque ululasse per agros  
 Deformes animas, vulgus inane, ferunt.  
 Post ea præteriti tumultus redduntur honores ;  
 Prodigis que venit funeribusque modus.
- Dum tamen hæc fiunt, viduæ cessate puellæ : 555  
 Expectet puros pinea tæda dies.  
 Nec tibi, quæ cupidæ matura videbere matri,  
 Comat virgineas hasta recurva comas.
- Conde tuas, Hymenææ, faces, et ab ignibus atris  
 Aufer ; habent alias mæsta sepulcra faces. 560
- Di quoque templorum foribus celentur opertis :  
 Thure vacent aræ, stentque sine igne foci.  
 Nunc animæ tenues, et corpora functa sepulcris  
 Errant : nunc posito pascitur umbra cibo.
- Nec tamen hæc ultra, quam tot de mense supersint  
 Luciferi, quot habent carmina nostra pedes. 566
- Hanc, quia justa ferunt, dixere Feralia lucem.  
 Ultima placandis manibus illa dies.
- Ecce anus in mediis residens annosa puellis  
 Sacra facit Tacitæ ; vix tamen ipsa tacet. 570
- Et digitis tria thura tribus sub limine ponit,  
 Qua brevis occultum mus sibi fecit iter.  
 Tum cantata ligat cum fusco licia rhombo,  
 Et septem nigras versat in ore fabas.
- Quodque pice adstrinxit, quod acu trajecit ahena,  
 Obsutum mænæ torret in igne caput. 576

Vina quoque instillat. Vini quodeunque relictum est,  
 Aut ipsa aut comites, plus tamen ipsa, bibit.  
 Hostiles linguas inimicaque vinximus ora,  
 Dicit, discedens, ebriaque exit anus. 580  
 Forsitan a nobis, quæ sit Dea Muta, requiras.  
 Disce, per antiquos quæ mihi nota senes.  
 Jupiter, indomito Juturnæ captus amore,  
 Multa tulit, tanto non patienda deo.  
 Illa modo in sylvis inter coryleta latebat; 585  
 Nunc in cognatas desiliebat aquas.  
 Convocat hinc Nymphas, Latium, quocunq;ue tenebas,  
 Et jacit in medio talia verba choro:  
 Invidet ipsa sibi, vitatque, quod expedit illi,  
 Vestra soror summo jungere membra deo. 590  
 Consulite ambobus: nam quæ mea magna voluptas,  
 Utilitas vestræ magna sororis erit.  
 Vos illi in prima fugienti obsistite ripa,  
 Ne sua fluminea corpora mergat aqua.  
 Dixerat: annuerunt Nymphæ Tiberinides omnes, 595  
 Quæque colunt thalamos, Illa diva, tuos.  
 Forte fuit Nais, Lara nomine: prima sed illi  
 Dicta bis antiquum syllaba nomen erat,  
 Ex vitio positum. Sæpe illi dixerat Almo,  
 Nata, tene linguam; nec tamen illa tenet. 600  
 Quæ, simul ac tetigit Juturnæ stagna sororis,  
 Effuge, ait, ripas; dicta refertque Jovis.  
 Illa etiam Junonem adiit; miserataque nuptam,  
 Naida Juturnam vir tuus, inquit, amat.  
 Jupiter intumuit: quaque est non usa modeste, 605  
 Eripuit linguam, Mercuriumque vocat;  
 Duc, ait, ad manes; locus ille silentibus aptus.  
 Nympha, sed infernæ Nympha paludis, erit.  
 Jussa Jovis fiunt; accepit lucus euntes;  
 Dicitur illa duci tum placuisse deo. 610  
 Vim parat hic: vultu pro verbis illa precatur,  
 Et frustra muto nititur ore loqui.  
 Fitque gravis; geminosque parit, qui compita servant,  
 Et vigilant nostra semper in urbe, Lares.



- Proxima cognati dixere Caristia cari, 615  
 Et venit ad socias turba propinqua dapes.  
 Scilicet a tumultis, et, qui periere, propinquis,  
 Protinus ad vivos ora referre juvat:  
 Postque tot amissos, quicquid de sanguine restat,  
 Adspicere, et generis dinumerare gradus. 620  
 Innocui veniant: procul hinc, procul impius esto  
 Frater, et in partus mater acerba suos:  
 Cui pater est vivax, qui matris digerit annos:  
 Quæ premit invisam socrus iniqua nurum.  
 Tantalidæ fratres absint, et Iasonis uxor, 625  
 Et quæ ruricolis semina tosta dedit:  
 Et soror, et Procne, Tereusque duabus iniquus:  
 Et quicumque suas per scelus auget opes.  
 Dis generis date thura bonis; Concordia fertur  
 Illo præcipue mitis adesse die. 630  
 Et libate dapes: ut grati pignus honoris  
 Nutriat incinctos missa patella Lares.  
 Jamque ubi suadebit placidos nox ultima somnos,  
 Larga precaturi sumite vina manu:  
 Et, Bene vos, patriæ, bene te, pater, optime Cæsar,  
 Dicite, suffuso per sacra verba mero. 636
- Nox ubi transierit, solito celebretur honore,  
 Separat indicio qui deus arva suo.  
 Termine, sive lapis, sive es defossus in agro  
 Stipes ab antiquis, sic quoque numen habes. 640  
 Te duo diversa domini pro parte coronant;  
 Binaque sarta tibi, binaque liba ferunt.  
 Ara fit: huc ignem curto fert rustica testu  
 Sumtum de tepidis ipsa colona focis.  
 Ligna senex minuit, concisaque construit alte: 645  
 Et solida ramos figere pugnat humo.  
 Dum sicco primas irritat cortice flammæ,  
 Stat puer, et manibus lata canistra tenet.  
 Inde, ubi ter fruges medios immisit in ignes,  
 Porrigit incisos filia parva favos. 650

Vina tenent alii: libantur singula flammis.

Spectant, et linguis candida turba favent.

Spargitur et cæsa communis Terminus agna;

Nec queritur, lactens cum sibi porca datur.

Conveniunt, celebrantque dapes vicinia simplex, 655

Et cantant laudes, Termine sancte, tuas.

♣ Tu populos, urbesque, et regna ingentia finis:

Omnis erit sine te litigiosus ager.

Nulla tibi ambitio est: nullo corrumperis auro.

Legitima servas credita rura fide. 660

Si tu signasses olim Thyreatida terram,

Corpora non leto missa trecenta forent:

Nec foret Othryades congestis lectus in armis.

O quantum patriæ sanguinis ille dedit!

Quid, nova cum fierent Capitolia? nempe deorum

Cuncta Jovi cessit turba, locumque dedit. 666

Terminus, ut veteres memorant, inventus in æde

Restitit: et magno cum Jove templa tenet.

Nunc quoque, se supra ne quid nisi sidera cernat,

Exiguum templi tecta foramen habent. 670

♣ Termine, post illud levitas tibi libera non est:

Qua positus fueris in statione, mane.

Nec tu vicino quicquam concede roganti;

Ne videre hominem præposuisse Jovi.

Et seu vomeribus, seu tu pulsabere rastris, 675

Clamato, Meus est hic ager, ille tuus.

Est via, quæ populum Laurentes ducit in agros,

Quondam Dardanio regna petita duci.

Illac lanigeri pecoris tibi, Termine, fibris

Sacra videt fieri sextus ab Urbe lapis. 680

Gentibus est aliis tellus data limite certo;

Romanæ spatium est Urbis et orbis idem.

♣ Nunc dicenda mihi Regis fuga. Traxit ab illa

Sextus ab extremo nomina mense dies.

Ultima Tarquinius Romanæ gentis habebat 685

Regna, vir injustus, fortis ad arma tamen.

Ceperat hic alias, alias everterat urbes;  
 Et Gabios turpi fecerat arte suos.  
 Namque trium minimus, proles manifesta Superbi,  
 In medios hostes nocte silente venit. 690  
 Nudarant gladios: Occidite, dixit, inermem;  
 Hoc cupiant fratres, Tarquiniusque pater;  
 Qui mea crudeli laceravit verbere terga.  
 Dicere ut hoc posset, verbera passus erat.  
 Luna fuit. Spectant juvenem, gladiosque recondunt:  
 Tergaque, deducta veste, notata vident. 696  
 Flent quoque, et ut secum tueatur bella, precantur.  
 Callidus ignaris annuit ille viris.  
 Jamque potens, misso genitorem appellat amico,  
 Prodendi Gabios quod sibi monstret iter. 700  
 Hortus odoratis suberat cultissimus herbis,  
 Sectus humum rivo lene sonantis aquæ.  
 Illic Tarquinius mandata latentia nati  
 Accipit, et virga lilia summa metit.  
 Nuntius ut rediit, decussaque lilia dixit; 705  
 Filius, Agnosco jussa parentis, ait.  
 Nec mora: principibus cæsis ex urbe Gabina,  
 Traduntur ducibus mœnia nuda suis.  
 Ecce (nefas visu) mediis altaribus anguis  
 Exit, et exstinctis ignibus exta rapit. 710  
 Consulitur Phœbus. Sors est ita reddita: Matri  
 Qui dederit princeps oscula, victor erit.  
 Oscula quisque suæ matri properata tulerunt,  
 Non intellecto credula turba deo.  
 Brutus erat stulti sapiens imitator, ut esset 715  
 Tutus ab insidiis, dire Superbe, tuis.  
 Ille, jacens pronus, matri dedit oscula terræ,  
 Creditus offenso procubuisse pede.  
 Cingitur interea Romanis Ardea signis,  
 Et patitur lentas obsidione moras. 720  
 Dum vacat, et metuunt hostes committere pugnam,  
 Luditur in castris: otia miles agit.  
 Tarquinius juvenis socios dapibusque meroque  
 Accipit, atque illis rege creatus ait:

- Dum nos difficilis pigro tenet Ardea bello, 725  
 Nec sinit ad patrios arma referre deos;  
 Ecquid in officio torus est socialis? et ecquid  
 Conjugibus nostris mutua cura sumus?  
 Quisque suam laudant: studiis certamina crescent,  
 Et fervent multo linguaque corque mero. 730
- Surgit, cui clarum dederat Collatia nomen;  
 Non opus est verbis, credite rebus, ait.  
 Nox superest: tollamur equis, Urbemque petamus.  
 Dicta placent; frenis impediuntur equi.  
 Pertulerant dominos. Regalia protinus illi 735  
 Tecta petunt; custos in fore nullus erat.  
 Ecce nurum regis fuis per colla coronis  
 Inveniunt posito pervigilare mero.  
 Inde cito passu petitur Lucretia. Nebat:  
 Ante torum calathi lanaque mollis erant. 740
- Lumen ad exiguum famulæ data pensa trahebant;  
 Inter quas tenui sic ait ipsa sono:  
 Mittenda est domino (nunc, nunc properate, puellæ)  
 Quamprimum nostra facta lacerna manu.  
 Quid tamen audistis? nam plura audire soletis: 745  
 Quantum de bello dicitur esse super?  
 Postmodo victa cades: melioribus, Ardea, restas,  
 Improba, quæ nostros cogis abesse viros.  
 Sint tantum reduces. Sed enim temerarius ille  
 Est meus, et stricto quolibet ense ruit. 750
- Mens abit, et morior, quoties pugnantis imago  
 Me subit: et gelidum pectora frigus habet.  
 Desinit in lacrymas, intentaque fila remittit,  
 In gremio vultum deposuitque suum.  
 Hoc ipsum decuit: lacrymæ decuere pudicam: 755  
 Et facies animo dignaque parque fuit.  
 Pone metum, venio, conjux ait. Illa revixit;  
 Deque viri collo dulce pendit onus.
- Interea juvenis furiales regius ignes  
 Concipit, et cæco raptus amore furit. 760  
 Forma placet, niveusque color, flavique capilli;  
 Quique aderat nulla factus ab arte decor.

- Verba placent, et vox; et quod corrumpere non est:  
 Quoque minor spes est, hoc magis ille cupit.  
 Jam dederat cantum lucis prænuntius ales; 765  
 Cum referunt juvenes in sua castra pedem.  
 Carpitur attonitos absentis imagine sensus  
 Ille: recordanti plura magisque placent.  
 Sic sedit: sic culta fuit: sic stamina nevit:  
 Neglectæ collo sic jacuere comæ: 770  
 Hos habuit vultus: hæc illi verba fuere:  
 Hic decor, hæc facies, hic color oris erat.  
 Ut solet a magno fluctus languescere flatu;  
 Sed tamen a vento, qui fuit, unda tumet:  
 Sic, quamvis aberat placitæ præsentia formæ, 775  
 Quem dederat præsens forma, manebat amor.  
 Ardet; et injusti stimulis agitated amoris  
 Comparat indigno vimque dolumque toro.  
 Exitus in dubio est: audebimus ultima, dixit.  
 Viderit, audentes forsne deusne juvet. 780  
 Cepimus audendo Gabios quoque. Talia fatus  
 Ense latus cingit, tergaque pressit equi.  
 Accipit ærata juvenem Collatia porta,  
 Condere jam vultus sole parante suos.  
 Hostis, ut hospes, init penetralia Collatini: 785  
 Comiter excipitur; sanguine junctus erat.  
 Quantum animis erroris inest! parat inscia rerum  
 Infelix epulas hostibus illa suis.  
 Functus erat dapibus: poscunt sua tempora somni.  
 Nox erat, et tota lumina nulla domo. 790  
 Surgit, et auratum vagina liberat ensem:  
 Et venit in thalamos, nupta pudica, tuos.  
 Utque torum pressit; Ferrum, Lucretia, mecum est:  
 Natus, ait, regis, Tarquiniusque vocor.  
 Illa nihil: neque enim vocem viresque loquendi,  
 Aut aliquid toto pectore mentis habet. 796  
 Sed tremit, ut quondam stabulis deprensa relictis,  
 Parva sub infesto cum jacet agna lupo.  
 Quid faciat? pugnet? vincetur fœmina pugna.  
 Clamet? at in dextra, qui necet, ensis adest. 800

- Effugiat? positis urgentur pectora palmis,  
 Nunc primum externa pectora tacta manu.  
 Instat amans hostis precibus, pretioque, minisque;  
 Nec prece, nec pretio, nec movet ille minis.  
 Nil agis; eripiam, dixit, pro crimine vitam: 805  
 Falsus adulterii testis adulter erit.  
 Interimam famulum, cum quo depreſſa fereris.  
 Succubuit famæ victa puella metu.  
 Quid victor gaudes? hæc te victoria perdet.  
 Heu quanto regnis nox stetit una tuis! 810  
 Jamque erat orta dies: passis sedet illa capillis,  
 Ut solet ad nati mater itura rogum.  
 Grandævumque patrem fido cum conjuge castris  
 Evocat: et posita venit uterque mora.  
 Utque vident habitum; quæ luctus causa, requirunt:  
 Cui paret exsequias, quove sit icta malo. 816  
 Illa diu reticet, pudibundaque celat amictu  
 Ora: fluunt lacrymæ more perennis aquæ.  
 Hinc pater, hinc conjux lacrymas solantur, et orant,  
 Indicet: et cæco flentque paventque metu. 820  
 Ter conata loqui, ter destitit: ausaque quarto,  
 Non oculos adeo sustulit illa suos.  
 Hoc quoque Tarquinio debebimus? eloquar, inquit,  
 Eloquar infelix dedecus ipsa meum.  
 Quæque potest narrat. Restabant ultima; flevit, 825  
 Et matronales erubuere genæ.  
 Dant veniam facto genitor conjuxque coacto.  
 Quam, dixit, veniam vos datis, ipsa nego.  
 Nec mora; celato figit sua pectora ferro;  
 Et cadit in patrios sanguinolenta pedes. 830  
 Tunc quoque, jam moriens, ne non procumbat honeste  
 Respicit. Hæc etiam cura cadentis erat.  
 Ecce super corpus communia damna gementes,  
 Obliti decoris, virque paterque jacent.  
 Brutus adest; tandemque animo sua nomina fallit:  
 Fixaque semanimi corpore tela rapit. 836  
 Stillantemque tenens generoso sanguine cultrum,  
 Edidit impavidos ore minante sonos:  
 OVID. FAST. 4

Per tibi ego hunc juro fortem castumque cruorem,  
 Perque tuos manes, qui mihi numen erunt; 840  
 Tarquinius poenas profuga cum stirpe daturum.  
 Jam satis est virtus dissimulata diu.  
 Illa jacens ad verba oculos sine lumine movit;  
 Visaque concussa dicta probare coma.  
 Fertur in exsequias animi matrona virilis, 845  
 Et secum lacrymas invidiamque trahit.  
 Vulnus inane patet. Brutus clamore Quirites  
 Concitat, et regis facta nefanda refert.  
 Tarquinius cum prole fugit. Capit annua consul  
 Jura. Dies regnis illa suprema fuit. 850

Fallimur? an veris prænuntia venit hirundo,  
 Et metuit, ne qua versa recurrat hiems?  
 Sæpe tamen, Procne, nimium properasse quereris,  
 Virque tuo Tereus frigore lætus erit.

Jamque duæ restant noctes de mense secundo, 855  
 Marsque citos junctis curribus urget equos:  
 Ex vero positum permansit Equiria nomen,  
 Quæ deus in Campo prospicit ipse suo.  
 Jure venis, Gradive; locum tua tempora poscunt;  
 Signatusque tuo nomine mensis adest. 860  
 Venimus in portum, libro cum mense peracto.  
 Naviget hinc alia jam mihi linter aqua.

## LIBER TERTIUS.

- BELLICE, depositis clypeo paulisper et hasta,  
Mars, ades, et nitidas casside solve comas.  
Forsitan ipse roges, quid sit cum Marte poetæ.  
A te, qui canitur, nomina mensis habet.  
Ipse vides manibus peragi fera bella Minervæ. 5  
Num minus ingenuis artibus illa vacat?  
Palladis exemplo ponendæ tempora sume  
Cuspidis. Invenies et quod inermis agas.  
Tum quoque inermis eras, cum te Romana sacerdos  
Cepit, ut huic Urbi semina digna dares. 10  
Iliæ Vestalis (quid enim vetat inde moveri?)  
Sacra lavaturas mane petebat aquas.  
Ventum erat ad molli declivem tramite ripam:  
Ponitur e summa fictilis urna coma.  
Fessa resedit humi, ventosque accepit aperto 15  
Pectore, turbatas restituitque comas.  
Dum sedet; umbrosæ salices, volucresque canoræ  
Fecerunt somnos, et leve murmur aquæ.  
Blanda quies victis furtim subrepat ocellis,  
Et cadit a mento languida facta manus. 20  
Mars videt hanc, visamque cupit, potiturque cupitam:  
Et sua divina furta fefellit ope.  
Somnus abit: jacet illa gravis. Jam scilicet intra  
Viscera, Romanæ conditor urbis, eras.  
Languida consurgit; nec scit cur languida surgat: 25  
Et peragit tales arbore nixa sonos:  
Utile sit faustumque, precor, quod imagine somni  
Vidimus. An somno clarius illud erat?  
Ignibus Iliacis aderam: cum lapsa capillis  
Decidit ante sacros lanea vitta focos. 30



Inde duæ pariter, visu mirabile, palmæ  
 Surgunt. Ex illis altera major erat:  
 Et gravibus ramis totum protexerat orbem;  
 Contigeratque nova sidera summa coma.  
 Ecce meus ferrum patruus molitur in illas! 35  
 Terreor admonitu; corque timore micat.  
 Martia picus avis gemino pro stipite pugnant,  
 Et lupa. Tuta per hos utraque palma fuit.  
 Dixerat; et plenam non firmis viribus urnam  
 Sustulit. Implerat, dum sua visa refert. 40  
 Interea crescente Remo, crescente Quirino,  
 Cælesti tumidus pondere venter erat.  
 Quo minus emeritis exiret cursibus annus,  
 Restabant nitido jam duo signa deo.  
 Sylvia fit mater; Vestæ simulacra feruntur 45  
 Virgineas oculis opposuisse manus.  
 Ara deæ certe tremuit pariente ministra,  
 Et subiit cineres territa flamma suos.  
 Hæc ubi cognovit contemtor Amulius æqui,  
 (Nam raptas fratri victor habebat opes,) 50  
 Amne jubet mergi geminos. Scelus unda refugit:  
 In sicca pueri destituuntur humo.  
 Lacte quis infantes nescit crevisse ferino,  
 Et picum expositis sæpe tulisse cibos?  
 Non ego te, tantæ nutrix Larentia gentis, 55  
 Nec taceam vestras, Faustule pauper, opes.  
 Vester honos veniet, cum Larentalia dicam;  
 Acceptus geniis illa December habet.  
 Martia ter senos proles adoleverat annos:  
 Et suberat flavæ jam nova barba comæ. 60  
 Omnibus agricolis armentorumque magistris  
 Iliadæ fratres jura petita dabant.  
 Sæpe domum veniunt prædonum sanguine læti,  
 Et redigunt actos in sua rura boves.  
 Ut genus audierunt, animos pater editus auget, 65  
 Et pudet in paucis nomen habere casis:  
 Romuleoque cadit trajectus Amulius ense:  
 Regnaque longævo restituantur avo.

- Mœnia conduntur: quæ, quamvis parva fuerunt,  
 Non tamen expedit transiluisse Remo. 70  
 Jam, modo qua fuerant sylvæ, pecorumque recessus,  
 Urbs erat; æternæ cum pater urbis ait:  
 Arbiter armorum, de cuius sanguine natus  
 Credor; et ut credar, pignora certa dabo:  
 A te principium Romano ducimus anno: 75  
 Primus de patrio nomine mensis eat.  
 Vox rata fit, patrioque vocat de nomine mensem.  
 Dicitur hæc pietas grata fuisse deo.  
 Et tamen ante omnes Martem coluere priores;  
 Hoc dederat studiis bellica turba suis. 80  
 Pallada Cecropidæ, Minoa Creta Dianam,  
 Vulcanum tellus Hypsipylea colit:  
 Junonem Sparte, Pelopeiadesque Mycenæ:  
 Pinigerum Fauni Mœnalis ora caput.  
 Mars Latio venerandus erat, quia præsidet armis. 85  
 Arma feræ genti remque decusque dabant.  
 Quod si forte vacas, peregrinos inspicere fastos;  
 Mensis in his etiam nomine Martis erit.  
 Tertius Albanis, quintus fuit ille Faliscis:  
 Sextus apud populos, Hernica terra, tuos. 90  
 Inter Aricinos, Albanaque tempora constant,  
 Factaque Telegoni mœnia celsa manu.  
 Quintum Laurentes, bis quintum Æquicolus asper,  
 A tribus hunc primum turba Curensis habet.  
 Et tibi cum proavis, miles Peligne, Sabinis 95  
 Convenit: hic genti quartus utrique deus.  
 Romulus, hos omnes ut vinceret ordine saltem,  
 Sanguinis auctori tempora prima dedit.  
 Nec totidem veteres, quot nunc, habuere Kalendas:  
 Ille minor geminis mensibus annus erat. 100  
 Nondum tradideras victas victoribus artes,  
 Græcia, facundum sed male forte genus.  
 Qui bene pugnabat, Romanam noverat artem:  
 Mittere qui poterat pila, disertus erat.  
 Quis tunc aut Hyadas, aut Pleiadas Atlanteas 105  
 Senserat, aut geminos esse sub axe polos?

- Esse duas Arctos, quarum Cynosura petatur  
Sidoniis, Helicen Graia carina notet?  
Signaque, quæ longo frater percenseat anno,  
Ire per hæc uno mense sororis equos? 110  
Libera currebant, et inobservata per annum  
Sidera: constabat sed tamen esse deos.  
Non illi cœlo labentia signa movebant,  
Sed sua; quæ magnum perdere crimen erat.  
Illa quidem fœno: sed erat reverentia fœno, 115  
Quantum nunc aquilas cernis habere tuas.  
Pertica suspensos portabat longa maniplos;  
Unde manipularis nomina miles habet.  
Ergo animi indociles, et adhuc ratione carentes  
Mensibus egerunt lustra minora decem. 120  
Annus erat, decimum cum luna repleverat orbem.  
Hic numerus magno tunc in honore fuit.  
Seu quia tot digiti, per quos numerare solemus;  
Seu quia bis quino fœmina mense parit;  
Seu quod adusque decem numero crescente venitur; 125  
Principium spatii sumitur inde novis.  
Inde pares centum denos secrevit in orbis  
Romulus, hastatos instituitque decem.  
Et totidem princeps, totidem pilanus, habebat  
Corpora, legitimo quique merebat equo. 130  
Quin etiam partes totidem Titiensibus idem,  
Quosque vocant Ramnes, Luceribusque dedit.  
Assuetos igitur numeros servavit in anno.  
Hoc luget spatio fœmina mæsta virum.  
Neu dubites, primæ fuerint quin ante Kalendæ 135  
Martis; ad hæc animum signa referre potes.  
Laurea Flaminibus, quæ toto perstitit anno,  
Tollitur, et frondes sunt in honore novæ.  
Janua nunc regis posita viret arbore Phœbi:  
Ante tuas fit idem, curia prisca, fores. 140  
Vesta quoque ut folio niteat velata recenti,  
Cedit ab Iliacis laurea cana focus.  
Adde, quod arcana fieri novus ignis in sæde  
Dicitur, et vires flamma resecta capit.

- Nec mihi parva fides, annos hinc isse priores, 145  
 Anna quod hoc cœpta est mense Perenna coli.  
 Hinc etiam veteres initi memorantur honores  
 Ad spatium belli, perfide Pœne, tui.  
 Denique quintus ab hoc fuerat Quintilis: et inde  
 Incipit, a numero nomina quisquis habet. 150  
 Primus, oliviferis Romam deductus ab arvis,  
 Pompilius menses sensit abesse duos.  
 Sive hoc a Samio doctus, qui posse renasci  
 Nos putat; Egeria sive monente sua.  
 Sed tamen errabant etiamnum tempora; donec 155  
 Cæsaris in multis hæc quoque cura fuit.  
 Non hæc ille deus tantæque propaginis auctor  
 Credidit officii esse minora suis:  
 Promissumque sibi voluit prænoscere cœlum;  
 Nec deus ignotas hospes inire domos. 160  
 Ille moras solis, quibus in sua signa rediret,  
 Traditur exactis disposuisse notis.  
 Is decies senos tercentum et quinque diebus  
 Junxit, et e pleno tempora quarta die.  
 Hic anni modus est. In lustrum accedere debet, 165  
 Quæ consummatur partibus, una dies.
- Si licet occultos monitus audire deorum  
 Vatibus; ut certe fama licere putat:  
 Cum sis officii, Gradive, virilibus aptus,  
 Dic mihi, matronæ cur tua festa colant. 170  
 Sic ego: sic posita dixit mihi casside Mavors,  
 Sed tamen in dextra missilis hasta fuit;  
 Nunc primum studiis pacis, deus utilis armis,  
 Advocor, et gressus in nova castra fero.  
 Nec piget incepti. Juvat hac quoque parte morari: 175  
 Hoc solam ne se posse Minerva putet.  
 Disce, Latinorum vates operose dierum,  
 Quod petis: et memori pectore dicta nota.  
 Parva fuit, si prima velis elementa referre,  
 Roma; sed in parva spes tamen hujus erat. 180

- Mœnia jam stabant, populis angusta futuris,  
 Credita sed turbæ tunc nimis ampla suæ.  
 Quæ fuerit nostri, si quæris, regia nati;  
 Adspice de canna straminibusque domum.  
 In stipula placidi carpebat munera somni: 185  
 Et tamen ex illo venit in astra toro.  
 Jamque loco majus nomen Romanus habebat:  
 Nec conjux illi, nec socer ullus erat.  
 Spernebant generos inopes vicinia dives:  
 Et male credebar sanguinis auctor ego. 190  
 In stabulis habitasse, boves pavisse, nocebat,  
 Jugeraque inculti pauca tenere soli.  
 Cum pare quæque suo coeunt volucresque feræque:  
 Atque aliquam, de qua procreet, anguis habet.  
 Extremis dantur connubia gentibus: at, quæ 195  
 Romano vellet nubere, nulla fuit.  
 Indolui; patriamque dedi tibi, Romule, mentem.  
 Tolle preces, dixi: quod petis, arma dabunt.  
 Festa para Conso: Consus tibi cætera dicet,  
 Illo facta die cum sua sacra canes. 200  
 Intumuerè Cures, et quos dolor attingit idem;  
 Tum primum generis intulit arma socer.  
 Jamque fere raptæ matrum quoque nomen habebant:  
 Tractaque erant longa bella propinqua mora.  
 Conveniunt nuptæ dictam Junonis in ædem: 205  
 Quas inter mea sic est nurus orsa loqui:  
 O pariter raptæ, quoniam hoc commune tenemus,  
 Non ultra lente possumus esse piæ.  
 Stant acies; sed ultra dî sint pro parte rogandi,  
 Eligite. Hinc conjux, hinc pater arma tenent. 210  
 Quærendum, viduæ fieri malimus, an orbæ.  
 Consilium vobis forte piumque dabo.  
 Consilium dederat. Parent, crinemque resolvunt,  
 Mæstaque funerea corpora veste tegunt.  
 Jam stabant acies ferro mortique paratæ; 215  
 Jam lituus pugnæ signa daturus erat:  
 Cum raptæ veniunt inter patresque virosque;  
 Inque sinu natos, pignora cara, ferunt.

- Ut medium campi passis tetigere capillis;  
 In terram posito procubuere genu. 220
- Et, quasi sentirent, blando clamore nepotes  
 Tendebant ad avos brachia parva suos.
- Qui poterat, clamabat avum, tum denique visum;  
 Et qui vix poterat, posse, coactus erat.
- Tela viris animusque cadunt; gladiisque remotis 225  
 Dant soceri generis, accipiuntque, manus.
- Laudatasque tenent natas: scutoque nepotem  
 Fert avus: hic scuti dulcior usus erat.
- Inde diem, quæ prima, meas celebrare Kalendas  
 Œbalides matres non leve munus habent. 230
- An quia, committi strictis mucronibus ausæ,  
 Finierant lacrymis Martia bella suis?
- Vel, quod erat de me feliciter Iliæ mater,  
 Rite colunt matres sacra, diemque meum?
- Quid? quod hiems, adoperta gelu, nunc denique cedit;  
 Et pereunt victæ sole tepente nives. 236
- Arboribus redeunt detonsæ frigore frondes;  
 Uvidaque e tenero palmitè gemma tumet.
- Quæque diu latuit, nunc, se qua tollat in auras,  
 Fertilis occultas invenit herba vias. 240
- Nunc fecundus ager: pecoris nunc hora creandi:  
 Nunc avis in ramo tecta laremque parat.
- Tempora jure colunt Latine fecunda parentes,  
 Quarum militiam vota que partus habet.
- Adde, quod excubias ubi rex Romanus agebat, 245  
 (Qui nunc Esquilias nomina collis habet,)
- Illic a nuribus Junoni templa Latinis  
 Hac sunt, si memini, publica facta die.
- Quid moror, et variis onero tua pectora causis?  
 Eminet ante oculos, quod petis, ecce tuos. 250
- Mater amat nuptas: matris me turba frequentant.
- Hæc nos præcipue tam pia causa decet.
- Ferte deæ flores: gaudet florentibus herbis  
 Hæc dea: de tenero cingite flore caput.
- Dicite, Tu lucem nobis, Lucina, dedisti; 255  
 Dicite, Tu voto parturientis ades.

Si qua tamen gravida est, resoluta crine precetur,  
Ut solvat partus molliter illa suos.

Quis mihi nunc dicet, quare cœlestia Martis  
Arma ferant Salii, Mamuriumque canant? 260  
Nympha, mone, nemori stagnoque operata Dianæ;  
Nympha, Numæ conjux, ad tua facta veni.  
Vallis Aricinæ sylvæ præinctus opaca  
Est lacus, antiqua religione sacer.  
Hic latet Hippolytus furis distractus equorum: 265  
Unde nemo nullis illud inquitur equis.  
Licia dependent, longas velantia sepes,  
Et posita est meritæ multa tabella deæ.  
Sæpe potens voti, frontem redimita coronis,  
Fœmina lucentes portat ab urbe faces. 270  
Regna tenent fortesque manu, pedibusque fugaces:  
Et perit exemplo postmodo quisque suo.  
Defluit incerto lapidosus murmure rivus:  
Sæpe, sed exiguis haustibus, inde bibi.  
Egeria est, quæ præbet aquas, dea grata Camcœnis. 275  
Illa Numæ conjux consiliumque fuit.  
Principio nimium promptos ad bella Quirites  
Molliri placuit jure, deûmque metu.  
Inde datæ leges, ne firmior omnia posset:  
Cœptaque sunt pure tradita sacra coli. 280  
Exiit feritas, armisque potentius æquum est:  
Et cum cive pudet conseruisse manus.  
Atque aliquis, modo trux, visa jam vertitur ara;  
Vinaque dat tepidis salsaque færra focis.  
Ecce deûm genitor rutilas per nubila flammæ 285  
Spargit, et effusis æthera siccant aquis.  
Non alias missi cecidere frequentius ignes.  
Rex pavet; et vulgi pectora terror habet.  
Cui dea, Ne nimium terrere; piabile fulmen  
Est, ait, et sævi flectitur ira Jovis. 290  
Sed poterunt ritum Picus Faunusque piandi  
Prodere, Romani numen uterque soli.

Nec sine vi tradent. Adhibeto vincula captis.

Atque ita, qua possint, erudit, arte capi.

Lucus Aventino suberat niger ilicis umbra, 295

Quo posses viso dicere, Numen inest.

In medio gramen, muscoque adoperta virenti

Manabat saxo vena perennis aquæ.

Inde fere soli Faunus Picusque bibebant.

Huc venit, et fonti rex Numa mactat ovem; 300

Plenaque odorati disponit pocula Bacchi;

Cumque suis antro conditus ipse latet.

Ad solitos veniunt sylvestria numina fontes,

Et relevant multo pectora sicca mero.

Vina quies sequitur: gelido Numa prodit ab antro, 305

Vinclaque sopitas addit in arcta manus.

Somnus ut abscessit, tentando vincula pugnant

Rumpere: pugnantes fortius illa tenent.

Tum Numa: Dî nemorum, factis ignoscite nostris,

Si scelus ingenio scitis abesse meo: 310

Quoque modo possit fulmen, monstrate, piari.

Sic Numa; sic quatiens cornua Faunus ait:

Magna petis, nec quæ monitu tibi discere nostro

Fas sit. Habent fines numina nostra suos.

Di sumus agrestes, et qui dominemur in altis 315

Montibus. Arbitrium est in sua tela Jovi.

Hunc tu non poteris per te deducere cœlo:

At poteris nostra forsitan usus ope.

Dixerat hæc Faunus: par est sententia Pici.

Deme tamen nobis vincula, Picus ait. 320

Jupiter huc veniet, valida deductus ab arce.

Nubila promissi Styx mihi testis erit.

Emissi quid agant laqueis, quæ carmina dicant,

Quaque trahant superis sedibus arte Jovem;

Scire nefas homini. Nobis concessa canentur, 325

Quæque pio dici vatis ab ore licet.

Eliciunt cœlo te, Jupiter: unde minores

Nunc quoque te celebrant, Eliciumque vocant.

Constat Aventinæ tremuisse cacumina sylvæ,

Terraque subsedit pondere pressa Jovis. 330



Corda micant regis, totoque e pectore sanguis  
 Fugit, et hirsutæ diriguere comæ.  
 Ut rediit animus, Da certa piamina, dixit,  
 Fulminis, aliorum rexque paterque deum;  
 Si tua contigimus manibus donaria puris; 335  
 Hoc quoque, quod petitur, si pia lingua rogat.  
 Annuit oranti: sed verum ambage remota  
 Abdidit, et dubio terruit ore virum.  
 Cæde caput, dixit. Cui rex, Parebimus, inquit:  
 Cædenda est hortis eruta cepa meis. 340  
 Postulat hic animam: cui Numa, Piscis, ait.  
 Risit; et, his, inquit, facito mea tela procures,  
 O vir colloquio non abigende deum!  
 Sed tibi, protulerit cum totum crastinus orbem 345  
 Cynthus, imperii pignora certa dabo.  
 Dixit, et ingenti tonitru super æthera motum  
 Fertur, adorantem destituitque Numam.  
 Ille redit lætus, memoratque Quiritibus acta.  
 Tarda venit dictis difficilisque fides. 350  
 At certe credemur, ait, si verba sequatur  
 Exitus. En audi crastina, quisquis ades.  
 Protulerit terris cum totum Cynthus orbem,  
 Jupiter imperii pignora certa dabit.  
 Discedunt dubii, promissaque tarda videntur: 355  
 Dependetque fides a veniente die.  
 Mollis erat tellus, rorataque mane pruina;  
 Ante sui populus limina regis adest.  
 Prodit, et in solio medius consedit acerno.  
 Innumeri circa stantque silentque viri. 360  
 Ortus erat summo tantummodo margine Phœbus:  
 Sollicitæ mentes speque metuque pavent.  
 Constitit, atque caput niveo velatus amictu  
 Jam bene dis notas sustulit ille manus.  
 Atque ita, Tempus adest promissi muneris, inquit. 365  
 Pollicitam dictis, Jupiter, adde fidem.  
 Dum loquitur, totum jam sol emerserat orbem,  
 Et gravis ætherio venit ab axe fragor.

Ter tonuit sine nube deus, tria fulgura misit.

Credite dicenti; mira, sed acta loquor. 370

A media cœlum regione dehiscere cœpit:

Submisere oculos cum duce turba suos.

Ecce levi scutum versatum leniter aura

Decidit. A populo clamor ad astra venit.

➤ Tollit humo munus, cœsa prius ille juvenca, 375

Quæ dederat nulli colla. premenda jugo.

Idque ancile vocat, quod ab omni parte recisum est;

Quaque notes oculis, angulus omnis abest.

Tum, memor imperii sortem consistere in illo,

Consilium multæ calliditatis init. 380

Plura jubet fieri simili cœlata figura,

Error ut ante oculos insidiantis eat.

Mamurius, morum fabræne exactior artis,

Difficile est ulli dicere, clausit opus.

Cui Numa munificus, Facti pete præmia, dixit: 385

Si mea nota fides, irrita nulla petes.

Jam dederat Saliis (a saltu nomina ducunt)

Armaque, et ad certos verba canenda modos.

➤ Tum sic Mamurius: Merces mihi gloria detur, 390

Nominaque extremo carmine nostra sonent.

Inde sacerdotes operi promissa vetusto

Præmia persolvunt, Mamuriumque vocant.

Nubere si qua voles, quamvis properabitis ambo,

Differ: habent parvæ commoda magna moræ.

Arma movent pugnam, pugna est aliena maritis. 395

Condita cum fuerint, aptius omen erit.

His etiam conjux apicati cincta Dialis

Lucibus impexas debet habere comas.

Tertia nox emersa suos ubi moverit ignes,

Conditus e geminis Piscibus alter erit. 400

➤ Nam duo sunt: Austris hic est, Aquilonibus ille

Proximus. A vento nomen uterque tenet.

Cum croceis rorare genis Tithonia conjux

Cœperit, et quintæ tempora lucis aget;

- Sive est Arctophylax, sive est piger ille Bootes ; 405  
 Mergetur, visus effugietque tuos.
- At non effugiet Vindemitor. Hoc quoque causam  
 Unde trahat sidus, parva docere mora est.  
 Ampelon intonsum Satyris Nymphaque creatum  
 Fertur in Ismariis Bacchus amasse jugis. 410  
 Tradidit huic vitem pendentem frondibus ulmi ;  
 Quæ nunc de pueri nomine nomen habet.  
 Dum legit in ramo pictas temerarius uvas,  
 Decidit: amissum Liber in astra vehit.
- Sextus ubi Oceano clivosum scandit Olympum 415  
 Phœbus, et alatis æthera carpit equis ;  
 Quisquis ades, canæque colis penetralia Vestæ,  
 Cratera Iliacis thuraque pone focus.  
 Cæsaris innumeris, quem maluit ille mereri,  
 Accessit titulis pontificalis honos. 420  
 Ignibus æternis æterni numina præsumt  
 Cæsaris. Imperii pignora juncta vides.  
 De veteris Trojæ dignissima præda favilla,  
 Qua gravis Æneas tutus ab hoste fuit ;  
 Ortus ab Ænea tangit cognata sacerdos 425  
 Numina ; cognatum, Vesta, tuere caput.  
 Quos sancta fovet ille manu, bene vivitis ignes.  
 Vivite inextincti, flammaque duxque, precor.
- Una nota est Martis Nonis : sacrata quod illis  
 Templâ putant lucos Vejovis ante duos. 430  
 Romulus ut saxo lucum circumdedit alto,  
 Quilibet, huc, inquit, confuge ; tutus eris.  
 O quam de tenui Romanus origine crevit !  
 Turba vetus quam non invidiosa fuit !  
 Ne tamen ignaro novitas tibi nominis obstat, 435  
 Disce quis iste deus, curve vocetur ita.  
 Jupiter est juvenis : juveniles adspice vultus :  
 Adspice deinde manum : fulmina nulla tenet.  
 Fulmina, post ausos cœlum affectare Gigantas,  
 Sumta Jovi ; primo tempore inermis erat. 440

Ignibus Ossa novis, et Pelion altior Ossa

Arsit, et in solida fixus Olympus humo.

Stat quoque capra simul: Nymphæ pavisse feruntur

Cretides: infanti lac dedit illa Jovi.

Nunc vocor ad nomen. Vegrandia farra coloni, 445

Quæ male creverunt, vescaque parva vocant.

➔ Vis ea si verbi est; cur non ego Vejovis ædem,

Ædem non magni suspicer esse Jovis?

Jamque, ubi cæruleum variabunt sidera cœlum,

Suspice: Gorgonei colla videbis equi. 450

Creditur hic cæsæ gravida cervice Medusæ

Sanguine respersis prosiluisse júbis.

Huic supra nubes et subter sidera lapso

Cœlum pro terra, pro pede penna fuit.

Jamque indignanti nova frena receperat ore, 455

Cum levis Aonias ungula fodit aquas.

Nunc fruitur cœlo, quod pennis ante petebat:

Et nitidus stellis quinque decemque micat.

Protinus adspicies venienti nocte Coronam

Gnossida. Theseo crimine facta dea est. 460

Jam bene perjuro mutarat conjuge Bacchum,

Quæ dedit ingrato fila legenda viro.

Sorte tori gaudens, Quid flebam rustica? dixit,

Utiliter nobis perfidus ille fuit.

Interea Liber depexus crinibus Indos 465

Vincit, et Eoo dives ab orbe venit.

Inter captivas facie præstante puellas

Grata nimis Baccho filia regis erat.

Flebat amans conjux, spatiatæque littore curvo

Edidit incultis talia verba comis: 470

En iterum similes, fluctus, audite querelas!

En iterum lacrymas accipe, arena, meas!

➔ Dicebam, memini, perjure et perfide Theseu!

Ille abiit: eadem crimina Bacchus habet.

Nunc quoque, nulla viro, clamabo, fœmina credat. 475

Nomine mutato causa relata mea est.

O utinam mea sors, qua primum cœperat, isset!  
 Jamque ego præsentî tempore nulla forem!  
 Quid me desertis perituram, Liber, arenis  
 Servabas? potui dedoluisse semel. 480  
 Bacche levis, leviorque tuis, quæ tempora cingunt,  
 Frondibus; in lacrymas cognite Bacche meas;  
 Ausus es ante oculos adducta pellice nostros  
 Tam bene compositum sollicitare torum?  
 Heu ubi pacta fides? ubi, quæ jurare solebas? 485  
 Me miseram, quoties hæc ego verba loquor!  
 Thesea culpabas, fallacemque ipse vocabas:  
 Judicio peccas turpius ipse tuo.  
 Ne sciat hoc quisquam, tacitisque doloribus urar:  
 Ne toties falli digna fuisse puter. 490  
 Præcipue cupiam celari Thesea; ne te  
 Consortem culpæ gaudeat esse suæ.  
 At, puto, præposita est fusca mihi candida pellex.  
 Eveniat nostris hostibus ille color!  
 Quid tamen hoc refert? vitio tibi gratior ipso est. 495  
 Quid facis? amplexus inquinat illa tuos.  
 Bacche, fidem præsta; nec præfer amoribus ullam  
 Conjugis assuetæ semper amare virum.  
 Ceperunt matrem formosi cornua tauri;  
 Me tua: at hic laudi est, ille pudendus amor. 500  
 Ne noceat, quod amo: neque enim tibi, Bacche, nocebat,  
 Quod flammæ nobis faasus es ipse tuas.  
 Nec, quod nos uris, mirum facis. Ortus in igne  
 Diceris, et patria raptus ab igne manu.  
 Illa ego sum, cui tu solitus promittere cœlum. 505  
 Heu mihi, pro cœlo qualia dona fero!  
 Dixerat: audibat jamdudum verba querentis  
 Liber, ut a tergo forte secutus erat.  
 Occupat amplexu, lacrymasque per oscula siccatur:  
 Et, Pariter cœli summa petamus, ait. 510  
 Tu mihi juncta toro, mihi juncta vocabula sumes:  
 Jam tibi mutatæ Libera nomen erit.  
 Sintque tuæ tecum faciam monumenta coronæ,  
 Vulcanus Veneri quam dedit, illa tibi.

Dicta facit, gemmasque novem transformat in ignes. 515  
Aurea per stellas nunc micat illa novem.

Sex ubi sustulerit, totidem demerserit orbes,  
Purpureum rapido qui vehit axe diem;  
Altera gramineo spectabis Equiria campo,  
Quem Tiberis curvis in latus urget aquis. 520

Qui tamen ejecta si forte tenebitur unda,  
Cælius accipiet pulverulentus equos.  
Idibus est Annæ festum geniale Perennæ,  
Haud procul a ripis, advena Tibri, tuis.  
Plebs venit, ac virides passim disjecta per herbas 525  
Potat, et accumbit cum pare quisque sua.

Sub Jove pars durat: pauci tentoria ponunt:  
Sunt, quibus e ramis frondea facta casa est:  
Pars ibi pro rigidis calamos statuere columnis,  
Desuper extentas imposuere togas. 530

Sole tamen vinoque calent: annosque precantur,  
Quot sumant cyathos, ad numerumque bibunt.  
Invenies illic, qui Nestoris ebibat annos;

Quæ sit per calices facta Sibylla suos.  
Illic et cantant, quicquid didicere theatris: 535  
Et jactant faciles ad sua verba manus:

Et ducunt posito duras cratera choreas,  
Cultaque diffusis saltat amica comis.  
Cum redeunt, titubant; et sunt spectacula vulgo:  
Et fortunatos obvia turba vocant. 540

Occurri nuper; visa est mihi digna relatu  
Pompa: senem potum pota trahebat anus.  
Quæ tamen hæc dea sit, quoniam rumoribus errant,  
Fabula proposito nulla tacenda meo.

Arserat Æneæ Dido miserabilis igne: 545  
Arserat exstructis in sua fata rogis.

Compositusque cinis, tumulique in marmore carmen  
Hoc breve, quod moriens ipsa reliquit, erat:  
*Præbuit Æneas et causam mortis et ense:*  
*Ipsa sua Dido concidit usa manu.* 550

Protinus invadunt Numidæ sine vindice regnum ;  
 Et potitur capta Maurus Iarba domo.  
 Seque memor spretum, Thalamis tamen, inquit, Elissæ,  
 En ego, quem toties reppulit illa, fruor.  
 Diffugiunt Tyrii, quo quemque agit error, ut olim 555  
 Amisso dubiæ rege vagantur apes.  
 Tertia nudandas acceperat area messes,  
 Inque cavos ierant tertia musta lacus ;  
 Pellitur Anna domo : lacrymansque sororia linquit  
 Mœnia. Germanæ justa dat ante suæ. 560  
 Mista bibunt molles lacrymis unguenta favillæ ;  
 Vertice libatas accipiuntque comas.  
 Terque, Vale, dixit : cineres ter ad ora relatos  
 Pressit, et est illis visa subesse soror.  
 Nacta ratem comitemque fugæ pede labitur æquo, 565  
 Mœnia respiciens, dulce sororis opus.  
 Fertilis est Melite, sterili vicina Cosyræ  
 Insula, quam Libyci verberat unda freti.  
 Hanc petit, hospitio regis confisa vetusto :  
 Hospes opum dives rex ibi Battus erat. 570  
 Qui postquam didicit casus utriusque sororis,  
 Hæc, inquit, tellus quantulacunque tua est.  
 Et tamen hospitii servasset ad ultima munus ;  
 Sed timuit magnas Pygmalionis opes.  
 Signa recensuerat bis sol sua : tertius ibat 575  
 Annus, et exsulis terra petenda nova est.  
 Frater adest, belloque petit. Rex arma perosus,  
 Nos sumus imbelles, tu fuge sospes, ait.  
 Jussa fugit ; ventoque ratem committit et undis.  
 Asperior quovis æquore frater erat. 580  
 Est prope piscosos lapidosi Crathidis amnes  
 Parvus ager : Cameren incola turba vocant.  
 Illuc cursus erat. Nec longius abfuit inde,  
 Quam quantum novies mittere funda potest.  
 Vela cadunt primo, et dubia librantur ab aura. 585  
 Findite remigio, navita dixit, aquas.  
 Dumque parant torto subducere carbasa lino,  
 Pereutitur rapido puppis adunca Noto :

Inque patens æquor, frustra pugnante magistro,  
 Fertur: et ex oculis visa refugit humus. 590  
 Adsilium fluctus, imoque a gurgite pontus  
 Vertitur, et canas alveus haurit aquas.  
 Vincitur ars vento: nec jam moderator habenis  
 Utitur, at votis is quoque poscit opem.  
 Jactatur tumidas exsul Phœnissa per undas, 595  
 Humidaque opposita lumina veste tegit.  
 Tum primum Dido felix est dicta sorori,  
 Et quæcunque aliquam corpore pressit humum.  
 Figitur ad Lærens ingenti flamine littus  
 Puppis: et, expositis omnibus, hausta perit. 600  
 Jam pius Æneas regno nataque Latini  
 Auctus erat, populos miscueratque duos.  
 Littore dotali, solo comitatus Achate,  
 Secretum nudo dum pede carpit iter;  
 Adspicit errantem, nec credere sustinet Annam 605  
 Esse. Quid in Lætios illa veniret agros?  
 Dum secum Æneas: Anna est, exclamat Achates.  
 Ad nomen vultus sustulit illa suos.  
 Quo fugiat? quid agat? quos terræ quærat hiatus?  
 Ante oculos miseræ fata sororis erant. 610  
 Sensit, et alloquitur trepidam Cythereius heros:  
 Flet tamen admonitu mortis, Elissa, tuæ.  
 Anna, per hanc juro, quam quondam audire solebas  
 Tellurem fato prosperiore dari;  
 Perque deos comites, hac nuper sede locatos, 615  
 Sæpe meas illos increpuiasse moras.  
 Nec timui de morte tamen: metus abfuit iste.  
 Heu mihi! credibili fortior illa fuit.  
 Ne refer. Adspexi non illo pectore digna  
 Vulnera, Tartareas ausus adire domos. 620  
 At tu, seu ratio te nostris appulit oris,  
 Sive deus; regni commoda carpe mei.  
 Multa tibi memores, nil non debemus Elissæ.  
 Nomine grata tuo, grata sororis, eris.  
 Talia dicenti, neque enim spes altera restat, 625  
 Credidit, errores exposuitque suos.



Utque domum intravit Tyrios induta paratus,  
 Incipit Æneas; cætera turba silet:  
 Hanc tibi cur tradam, pia causa, Lavinia conjux,  
 Est mihi: consumsi naufragus hujus opes. 630  
 Orta Tyro, regnum Libyca possedit in ora:  
 Quam precor ut caræ more sororis ames.  
 Omnia promittit, falsumque Lavinia vulnus  
 Mente premit tacita, dissimulatque metus.  
 Donaque cum videat præter sua lumina ferri 635  
 Multa palam; mitti clam quoque multa putat.  
 Non tamen exactum, quid agat. Furiatiter odit,  
 Et parat insidias, et cupit ultra mori.  
 Nox erat: ante torum visa est adstare sororis  
 Squalenti Dido sanguinolenta coma; 640  
 Et, Fuge, ne dubita, mæstum fuge, dicere, tectum.  
 Sub verbum querulas impulit aura fores.  
 Exsilit; et velox humili super arva fenestra  
 Se jacit. Audacem fecerat ipse timor.  
 Quaque metu rapitur, tunica velata recincta 645  
 Currit, ut auditis territa dama lupis.  
 Corniger hanc cupidis rapuisse Numicius undis  
 Creditur, et stagnis oculuisse suis.  
 Sidonis interea magno clamore per agros  
 Quæritur. Apparent signa notæque pedum. 650  
 Ventum erat ad ripas: inerant vestigia ripis.  
 Sustinuit tacitas conscius amnis aquas.  
 Ipsa loqui visa est, Placidi sum Nympha Numici:  
 Anne perenne latens Anna Perenna vocor.  
 Protinus erratis læti vescuntur in agris, 655  
 Et celebrant largo seque diemque mero.  
 Sunt quibus hæc Luna est, quia mensibus impleat annum:  
 Pars Themis, Inachiam pars putat esse bovem.  
 Invenies, qui te Nymphen Atlantida dicant,  
 Teque Jovi primos, Anna, dedisse cibos. 660  
 Hæc quoque, quam referam, nostras pervenit ad auras  
 Fama: nec a vera dissidet illa fide.  
 Plebs vetus, et nullis etiamnum tuta tribunis,  
 Fugit, et in Sacri vertice montis erat.

- Jam quoque, quem secum tulerant, defecerat illos 665  
 Victus, et humanis usibus apta Ceres.  
 Orta suburbanis quædam fuit Anna Bovillis,  
 Pauper, sed multæ sedulitatis anus.  
 Illa, levi mitra canos redimita capillos,  
 Fingebat tremula rustica liba manu; 670  
 Atque ita per populum fumantia mane solebat  
 Dividere. Hæc populo copia grata fuit.  
 Pace domi facta signum posuere Perennæ,  
 Quod sibi defectis illa tulisset opem.  
 Nunc mihi, cur cantent, superest, obscæna puellæ, 675  
 Dicere: nam coeunt, certa que probra canunt.  
 Nuper erat dea facta; venit Gradivus ad Annam,  
 Et cum seducta talia verba facit:  
 Mense meo coleris; junxi mea tempora tecum:  
 Pendet ab officio spes mihi magna tuo. 680  
 Armifer armiferæ correptus amore Minervæ  
 Uror, et hoc longo tempore vulnus alo.  
 Effice, di studio similes coeamus in unum.  
 Conveniunt partes hæ tibi, comis anus.  
 Dixerat. Illa deum promisso ludit inani, 685  
 Et stultam dubia spem trahit usque mora.  
 Sæpius instanti, Mandata peregrinus, inquit;  
 Evicta est precibus: vix dedit illa manus.  
 Gaudet amans, thalamosque parat. Deducitur illuc  
 Anna tegens vultus, ut nova nupta, suos. 690  
 Oscula sumturus subito Mars adspicit Annam;  
 Nunc pudor elusum, nunc subit ira deum.  
 Ridet amatorem caræ nova diva Minervæ:  
 Nec res hac Veneri gratior ulla fuit.  
 Inde joci veteres obscænaque dicta canuntur: 695  
 Et juvat hanc magno verba dedisse deo.  
 Præteriturus eram gladios in principe fixos;  
 Cum sic a castis Vesta locuta focus:  
 Ne dubita meminisse: meus fuit ille sacerdos.  
 Sacrilegæ telis me petiere manus. 700  
 Ipsa virum rapui, simulacraque nuda reliqui.  
 Quæ cecidit ferro, Cæsaris umbra fuit.

Ille quidem cœlo positus Jovis atria servat,  
 Et tenet in magno templa dicata Foro.  
 At quicumque nefas ausi, prohibente deorum 705  
 Numine, polluerant pontificale caput,  
 Morte jacent merita. Testes estote Philippi,  
 Et quorum sparsis ossibus albet humus.  
 Hoc opus, hæc pietas, hæc prima elementa fuerunt  
 Cæsaris, ulcisci justa per arma patrem. 710

Postera cum teneras Aurora refecerit herbas,  
 Scorpios a prima parte videndus erit.

Tertia post Idus lux est celeberrima Baccho.  
 Bacche, fave vati, dum tua festa cano.  
 Nec referam Semelen, ad quam nisi fulmina secum 715  
 Jupiter adferret, parvus inermis eras :  
 Nec, puer ut posses maturo tempore nasci,  
 Expletum patrio corpore matris onus.  
 Sithonas, et Scythicos longum enumerare triumphos,  
 Et domitas gentes, thurifer Inde, tuas. 720  
 Tu quoque Thebæne mala præda tacebere matris :  
 Inque tuum Furiis acte, Lycurge, genu.  
 Ecce libet subitos pisces, Tyrrhenaque monstra  
 Dicere ; sed non est carminis hujus opus.  
 Carminis hujus opus, causas expromere, quare 725  
 Vilis anus populos ad sua liba vocet.  
 Ante tuos ortus aræ sine honore fuerunt,  
 Liber, et in gelidis herba reperta focis.  
 Te memorant, Gange totoque Oriente subacto,  
 Primitias magno seposuisse Jovi. 730  
 Cinnamon tu primus captivaque thura dedisti,  
 Deque triumphato viscera tosta bove.  
 Nomine ab auctoris ducunt libamina nomen,  
 Libaque, quod sacris pars datur inde focis.  
 Liba deo fiunt : succis quia dulcibus ille 735  
 Gaudet, et a Baccho mella reperta ferunt.  
 Ibat arenoso Satyris comitatus ab Hebro :  
 (Non habet ingratos fabula nostra jocos :)

- Jamque erat ad Rhodopen, Pangæaque florida ventum:  
*Æriferæ comitum concrepuere manus.* 740
- Ecce novæ coeunt volucres tinnitibus actæ:  
 Quaque movent sonitus æra, sequuntur apes.  
 Colligit errantes, et in arbore claudit inani  
 Liber: et inventi præmia mellis habet.
- Ut Satyri lævisque senex tetigere saporem, 745  
 Quærebant flavos per nemus omne favos,  
 Audit in exesa stridorem examinis ulmo,  
 Adspicit et ceras, dissimulatque senex.  
 Utque piger pandi tergo residebat aselli;  
 Applicat hunc ulmo corticibusque cavis. 750  
 Constitit ipse super ramoso stipite nixus,  
 Atque avide trunco condita mella petit.  
 Millia crabronum coeunt, et vertice nudo  
 Spicula defigunt, oraque summa notant.  
 Ille cadit præceps, et calce feritur aselli: 755  
 Inclamatque suos, auxiliumque rogat.  
 Concurrunt Satyri, turgentiaque ora parentis  
 Ridet. Percusso claudicat ille genu.  
 Ridet et ipse deus, limumque inducere monstrat.  
 Hic paret monitis, et linit ora luto. 760  
 Melle pater fruitur: liboque infusa calenti  
 Jure repertori candida mella damus.  
 Fœmina cur præstet, non est rationis opertæ.  
 Fœmineos thyrso concitat ille choros.  
 Cur anus hoc faciat, quæris; vinosior ætas 765  
 Hæc est, et gravidæ munera vitis amat.  
 Cur hedera cincta est? hedera est gratissima Baccho.  
 Hoc quoque cur ita sit, dicere nulla mora est.  
 Nysiades Nymphæ, puerum quærente noverca,  
 Hanc frondem cunis opposuere novis. 770  
 Restat, ut inveniam, quare toga libera detur  
 Lucifero pueris, candide Bacche, tuo.  
 Sive quod ipse puer semper juvenisque videris;  
 Et media est ætas inter utrumque tibi;  
 Seu quia tu pater es, patres, sua pignora, natos 775  
 Commendant curæ numinibusque tuis.

- Sive, quod es Liber, vestis quoque libera per te  
Sumitur, et vitæ liberioris iter.
- An quia, cum prisci colerent studiosius agros,  
Et patrio faceret rure senator opus ; 780  
Et caperet fasces a curvo consul aratro,  
Nec crimen duras esset habere manus :  
Rusticus ad ludos populus veniebat in Urbem ?  
Sed dñs, non studiis, ille dabatur honos.  
Luce sua ludos uvæ commentor habebat : 785  
Quos cum tædifera nunc habet ipse dea.  
Ergo, ut tironem celebrare frequentia posset,  
Visa dies dandæ non aliena togæ.  
Mite, pater, caput huc placataque cornua vertas,  
Et des ingenio vela secunda meo. 790  
Itur ad Argeos (qui sint, sua pagina dicet)  
Hæc, si commemini, præteritaque die.  
Stella Lycaoniam vergit proclivis ad Arcton  
Miluus. Hæc illa nocte videnda venit.  
Quid dederit volucris, si vis cognoscere, cælum ; 795  
Saturnus regnis ab Jove pulsus erat.  
Concitat iratus validos Titanas in arma,  
Quæque fuit fatis debita, poscit opem.  
Matre satus Terra, monstrum mirabile, taurus  
Parte sui serpens posteriore fuit. 800  
Hunc triplici muro lucis incluserat atris  
Parcarum monitu Styx violenta trium.  
Viscera qui tauri flammis adolenda dedisset,  
Sors erat, æternos vincere posse deos.  
Immolat hunc Briareus facta ex adamante securi : 805  
Et jam jam flammis exta daturus erat.  
Jupiter alitibus rapere imperat. Attulit illi  
Miluus : et meritis venit in astra suis.
- Una dies media est, et fiunt sacra Minervæ ;  
Nominaque a junctis quinque diebus habent. 810  
Sanguine prima vacat : nec fas concurrere ferro.  
Causa, quod est illa nata Minerva die.

- Altera, tresque super strata celebrantur arena.  
 Ensibus exsertis bellica læta dea est.  
 Pallada nunc pueri, teneræque ornate puellæ. 815  
 Qui bene placarit Pallada, doctus erit.  
 Pallade placata, lanam mollire puellæ  
 Discant, et plenas exonerare colos.  
 Illa etiam stantes radio percurrere telas  
 Erudit, et rarum pectine denset opus. 820  
 Hanc cole, qui maculas læsis de vestibus aufers:  
 Hanc cole, velleribus quisquis ahena paras.  
 Nec quisquam invita faciet bene vincula plantæ  
 Pallade; sit Tychio doctior ille licet.  
 Et licet antiquo manibus collatus Epeo 825  
 Sit prior; irata Pallade mancus erit.  
 Vos quoque, Phœbea morbos qui pellitis arte,  
 Munera de vestris pauca referte deæ.  
 Nec vos turba deam, censu fraudata, magistri  
 Spernite: discipulos attrahet illa novos. 830  
 Quique moves cœlum, tabulamque coloribus uris;  
 Quique facis docta mollia saxa manu.  
 Mille dea est operum; certe dea carminis illa est.  
 Si mereor, studiis adsit amica meis.  
 Cœlius ex alto qua mons descendit in æquum: 835  
 Hic ubi non plana est, sed prope plana via est;  
 Parva licet videas Captæ delubra Minervæ,  
 Quæ dea natali cœpit habere suo.  
 Nominis in dubio causa est. Capitale vocamus  
 Ingenium sollers; ingeniosa dea est. 840  
 An, quia de capitis fertur sine matre paterni  
 Vertice cum clypeo prosiluisse suo?  
 An, quia perdomitis ad nos captiva Faliscis  
 Venit? et hoc ipsum littera prisca docet.  
 An, quod habet legem, capitis quæ pendere pœnas 845  
 Ex illo jubeat furta reperta loco?  
 A quacunque trahis ratione vocabula, Pallas,  
 Pro ducibus nostris ægida semper habe.  
 Summa dies e quinque tubas lustrare canoras  
 Admonet, et forti sacrificare deæ. 850

- Nunc potes ad solem sublato dicere vultu :  
 Hic here Phrixæ vellera pressit ovis.  
 Seminibus tostis sceleratæ fraude novercæ  
 Sustulerat nullas, ut solet, herba comas.  
 Mittitur ad tripodas, certa qui sorte reportet, 855  
 Quam sterili terræ Delphicus edat opem.  
 Hic quoque corruptus cum semine nuntiat Helles  
 Et juvenis Phrixi funera sorte peti.  
 Usque recusantem cives, et tempus, et Ino  
 Compulerant regem jussa nefanda pati ; 860  
 Et soror, et Phrixus, velati tempora vitis  
 Stant simul ante aras, junctaque fata gemunt.  
 Adspicit hos, ut forte pependerit æthere, mater,  
 Et ferit attonita pectora nuda manu ;  
 Inque draconigenam nimbis comitantibus urbem 865  
 Desilit, et natos eripit inde suos.  
 Utque fugam capiant, aries nitidissimus auro  
 Traditur. Ille vehit per freta longa duos.  
 Dicitur infirma cornu tenuisse sinistra  
 Fœmina, cum de se nomina fecit aquæ. 870  
 Pæne simul periit, dum vult succurrere lapsæ,  
 Frater, et extentas porrigit usque manus.  
 Flebat, ut amissa gemini consorte pericli,  
 Cæruleo junctam nescius esse deo.  
 Littoribus tactis aries fit sidus : at hujus 875  
 Pervenit in Colchas aurea lana domos.
- Tres ubi Luciferos veniens præmiserit Eos,  
 Tempora nocturnis æqua diurna feres.
- Inde quater pastor saturos ubi clauserit hædos,  
 Canuerint herbæ rore recente quater ; 880  
 Janus adorandus, cumque hoc Concordia mitis,  
 Et Romana Salus, araque Pacis erit.
- Luna regit menses. Hujus quoque tempora mensis  
 Finit Aventino Luna colenda jugo.

## LIBER QUARTUS.

ALMA, fave vati, geminorum mater Amorum.  
Ad vatem vultus rettulit illa suos.  
Quid tibi, ait, mecum? certe majora canebas.  
Num vetus in molli pectore vulnus habes?  
Scis, dea, respondi, de vulnere: risit: et æther 5  
Protinus ex illa parte serenus erat.  
Saucius, an sanus, numquid tua signa reliqui?  
Tu mihi propositum, tu mihi semper opus.  
Qua decuit, primis sine crimine lusimus annis:  
Nunc teritur nostris area major equis. 10  
Tempora cum causis, Annalibus eruta priscis,  
Lapsaque sub terras, orta que signa cano.  
Venimus ad quartum, quo tu celeberrima, mensem.  
Et vatem et mensem scis, Venus, esse tuos.  
Mota Cytheriaca leviter mea tempora myrto 15  
Contigit, et, Cœptam perfice, dixit, opus.  
Sensimus; et subito causæ patuere dierum.  
Dum licet, et spirant flamina, navis eat.  
Si qua tamen pars te de Fastis tangere debet,  
Cæsar, in Aprili, quo tenearis, habes. 20  
Hic ad te magna descendit imagine mensis,  
Et fit adoptiva nobilitate tuus.  
Hoc pater Iiades, cum longum scriberet annum,  
Vidit, et auctores rettulit ipse suos.  
Ut que fero Marti primam dedit ordine sortem, 25  
Quod sibi nascenti proxima causa fuit;  
Sic Venerem, gradibus multis in gente repertam,  
Alterius voluit mensis habere locum.  
Principiumque sui generis, revolutaque quærens  
Sæcula, cognatos venit ad usque deos. 30



- Dardanon Electra nesciret Atlantide cretum?  
 Scilicet Electran concubuisse Jovi?  
 Hujus Erichthonius: Tros est generatus ab illo:  
 Assaracon creat hic: Assarusque Capyn.  
 Proximus Anchisen, cum quo commune parentis 35  
 Non dedignata est nomen habere Venus.  
 Hinc satus Æneas, pietas spectata per ignes,  
 Sacra, patremque humeris, altera sacra, tulit.  
 Venimus ad felix aliquando nomen Iuli,  
 Unde domus Teucros Julia tangit avos. 40  
 Postumus huic, qui, quod sylvis fuit ortus in altis,  
 Sylvius in Latia gente vocatus erat.  
 Isque, Latine, tibi pater est: subit Alba Latinum:  
 Proximus est titulis Epytos, Alba, tuis.  
 Ille dedit Capii recidiva vocabula Trojæ: 45  
 Et tuus est idem, Calpete, factus avus.  
 Cumque patris regnum post hunc Tiberinus haberet,  
 Dicitur in Tuscæ gurgite mersus aquæ.  
 Jam tamen Agrippam genitum, Remulumque nepotem  
 Viderat: in Remulum fulmina missa ferunt. 50  
 Venit Aventinus post hos: locus inde vocatus;  
 Mons quoque. Post illum tradita regna Procæ.  
 Quem sequitur diri Numitor germanus Amuli.  
 Iliæ cum Lauso de Numitore sati.  
 Ense cadit patruo Lausus: placet Iliæ Marti; 55  
 Teque parit, gemino juncte Quirine Remo.  
 Ille suos semper Venerem Martemque parentes  
 Dixit, et emeruit vocis habere fidem.  
 Neve secuturi possent nescire nepotes,  
 Tempora dis generis continuata dedit. 60  
 Sed Veneris mensem Graio sermone notatum  
 Auguror: a spumis est dea dicta maris.  
 Nec tibi sit mirum Graio rem nomine dici:  
 Itala nam tellus Græcia major erat.  
 Venerat Evander plena cum classe suorum: 65  
 Venerat Alcides, Graius uterque genus.  
 Hospes Aventinis armentum pavit in herbis  
 Claviger: et tanto est Albula pota deo.

- Dux quoque Neritius. Testes Læstrygones exstant,  
 Et quod adhuc Circes nomina littus habet. 70  
 Et jam Telegoni, jam mœnia Tiburis udi  
 Stabant, Argolicæ quod posuere manus.  
 Venerat Atridæ fatis agitatus Halesus;  
 A quo se dictam terra Falisca putat.  
 Adjice Trojanæ suasorem Antenora pacis, 75  
 Et generum CEniden, Appule Daune, tuum.  
 Serus ab Iliacis, et post Antenora, flammis  
 Attulit Æneas in loca nostra deos.  
 Hujus erat Solymus Phrygia comes exsul ab Ida,  
 A quo Sulmonis mœnia nomen habent; 80  
 Sulmonis gelidi, patriæ, Germanice, nostræ.  
 Me miserum, Scythico quam procul illa solo est!  
 Ergo ego tam longe? sed supprime, Musa, querelas:  
 Non tibi sunt mæsta sacra canenda lyra.  
 Quo non livor abit? sunt qui tibi mensis honorem 85  
 Eripuisse velint, invideantque, Venus.  
 Nam, quia ver aperit tunc omnia, densaque cedit  
 Frigoris asperitas, fetaque terra patet:  
 Aprilem memorant ab aperto tempore dictum:  
 Quem Venus injecta vindicat alma manu. 90  
 Illa quidem totum dignissima temperat orbem:  
 Illa tenet nullo regna minora deo:  
 Juraque dat cœlo, terræ, natalibus undis;  
 Perque suos initus continet omne genus.  
 Illa deos omnes (longum enumerare) creavit: 95  
 Illa satis causas arboribusque dedit:  
 Illa rudes animos hominum contraxit in unum,  
 Et docuit jungi cum pare quemque sua.  
 Quid genus omne creat volnerum, nisi blanda voluptas?  
 Nec coeunt pecudes, si levis absit amor. 100  
 Cum mare trux aries cornu decertat: at idem  
 Frontem dilectæ lædere parcit ovis.  
 Deposita taurus sequitur feritate juvencam,  
 Quem toti saltus, quem nemus omne tremit.  
 Vis eadem, lato quodcunque sub æquore vivit, 105  
 Servat, et innumeris piscibus implet aquas.

Prima feros habitus homini detraxit: ab illa  
     Venerunt cultus mundaque cura sui.  
 Primus amans carmen vigilatum nocte negata  
     Dicitur ad clausas concinuisse fores. 110  
 Eloquiumque fuit duram exorare puellam:  
     Proque sua causa quisque disertus erat.  
 Mille per hanc artes motæ: studioque placendi,  
     Quæ latuere prius, multa reperta ferunt.  
 Hanc quisquam titulo mensis spoliare secundi 115  
     Audeat? a nobis sit procul iste furor.  
 Quid? quod ubique potens, templisque frequentibus  
     aucta,  
     Urbe tamen nostra jus dea majus habet?  
 Pro Troja, Romane, tua Venus arma ferebat,  
     Cum genuit teneram cuspide læsa manum: 120  
 Cœlestesque duas Trojano iudice vicit;  
     Ah! nolim victas hoc meminisse deas!  
 Assaracique nurus dicta est; ut scilicet olim  
     Magnus Iuleos Cæsar haberet avos.  
 Nec Veneri tempus, quam ver, erat aptius ullum. 125  
     Vere nitent terræ; vere remissus ager.  
 Nunc herbæ rupta tellure cacumina tollunt;  
     Nunc tumido gemmas cortice palmes agit.  
 Et formosa Venus formoso tempore digna est:  
     Utque solet, Marti continuata suo. 130  
 Vere monet curvas materna per æquora puppes  
     Ire, nec hibernas jam timuisse minas.  
 Rite deam Latiae colitis matresque nurusque,  
     Et vos, quis vittæ longaque vestis abest.  
 Aurea marmoreo redimicula solvite collo; 135  
     Demite divitias: tota lavanda dea est.  
 Aurea siccato redimicula reddite collo;  
     Nunc alii flores, nunc nova danda rosa est.  
 Vos quoque sub viridi myrto jubet illa lavari:  
     Causaque cur jubeat (discite) certa subest. 140  
 Lattore siccabat rorantes nuda capillos.  
     Viderunt Satyri, turba proterva, deam.

Sensit, et opposita texit sua corpora myrto.

Tuta fuit facto: vosque referre jubet.

Discite nunc, quare Fortunæ thura Virili 145

Detis eo, calida qui locus humet aqua.

Accipit ille locus posito velamine cunctas,

Et vitium nudi corporis omne videt.

Ut tegat hoc, celetque viros, Fortuna Virilis

Præstat, et hoc parvo thure rogata facit. 150

Nec pigeat niveo tritum cum lacte papaver

Sumere, et expressis mella liquata favis.

Cum primum cupido Venus est deducta marito,

Hoc bibit. Ex illo tempore nupta fuit.

Supplicibus verbis illam placate: sub illa 155

Et forma, et mores, et bona fama manet.

Roma pudicitia proavorum tempore lapsa est:

Cumæam, veteres, consuluistis anum.

Templa jubet Veneri fieri; quibus ordine factis,

Inde Venus verso nomina corde tenet. 160

Semper ad Æneadas placido, pulcherrima, vultu

Respice, totque tuas, diva, tuere nurus.

Dum loquor, elatæ metuendus acumine caudæ

Scorpios in virides præcipitatur aquas.

Nox ubi transierit, cœlumque rubescere primo 165

Cœperit, et tactæ rore querentur aves;

Semustamque facem vigilata nocte viator

Ponet, et ad solitum rusticus ibit opus;

Pleiades incipiunt humeros relevare paternos:

Quæ septem dici, sex tamen esse solent. 170

Seu quod in amplexum sex hinc venere deorum;

Nam Steropen Marti concubuisse ferunt:

Neptuno Halcyonen, et te, formosa Celæno:

Maian, et Electran, Taygetenque Jovi:

Septima mortali Merope tibi, Sisyphæ, nupsit. 175

Pœnitet; et facti sola pudore latet.

Sive quod Electra Trojæ spectare ruinas

Non tulit, ante oculos opposuitque manum.

- Ter sine perpetuo cœlum versetur in axe;  
 Ter jungat Titan, terque resolvat equos; 180  
 Protinus inflexo Berecynthia tibia cornu  
 Flabit, et Idææ festa Parentis erunt.  
 Ibunt semimares, et inania tympana tudent,  
 Æraque tinnitus ære repulsa dabunt.  
 Ipsa sedens molli comitum cervice feretur 185  
 Urbis per medias exululata vias.  
 Scena sonat, ludique vocant. Spectate, Quirites;  
 Et fora Marte suo litigiosa vacent.  
 Quærere multa libet: sed me sonus æris acuti  
 Terret, et horrendo lotos adunca sono. 190  
 Da, dea, quas sciter, doctas, Cybeleia, neptes.  
 Audit; et has curæ jussit adesse meæ.  
 Pandite mandati memores, Heliconis alumnæ,  
 Gaudeat assiduo cur dea magna sono.  
 Sic ego; sic Erato: Mensis Cythereius illi 195  
 Cessit, quod teneri nomen Amoris habet.  
 Reddita Saturno sors hæc erat: Optime regum,  
 A nato sceptris excutiere tuis.  
 Ille suam metuens, ut quæque erat edita, prolem  
 Devorat, immersam visceribusque tenet. 200  
 Sæpe Rhea quæsta est toties fecunda, nec unquam  
 Mater; et indoluit fertilitate sua.  
 Jupiter ortus erat. Pro magno teste vetustas  
 Creditur. Acceptam parce movere fidem.  
 Veste latens saxum cœlesti viscere sedit. 205  
 Sic genitor fatis decipiendus erat.  
 Ardua jamdudum resonat tinnitibus Ide,  
 Tutus ut infanti vagiat ore puer.  
 Pars clypeos rudibus, galeas pars tundit inanes:  
 Hoc Curetes habent, hoc Corybantes opus. 210  
 Res latuit patrem: priscique imitamina facti  
 Æra deæ comites raucaque terga movent.  
 Cymbala pro galeis, pro scutis tympana pulsant:  
 Tibia dat Phrygios, ut dedit ante, modos.  
 Desierat. Cœpi: Cur huic genus acre leones 215  
 Præbent insolitas ad juga curva jubas?

Desieram. Cœpit: Feritas mollita per illam

Creditur: id curru testificata suo est.

At cur turrata caput est ornata corona?

An Phrygiis turres urbibus illa dedit? 220

Annuit. Unde venit, dixi, sua membra secandi

Impetus? Ut tacui, Pieris orsa loqui:

Phryx puer in sylvis facie spectabilis Attis

Turrigeram casto vinxit amore deam.

Hunc sibi servari voluit, sua templa tueri: 225

Et dixit, Semper fac puer esse velis.

Ille fidem jussis dedit; et, Si mentiar, inquit,

Ultima, qua fallam, sit Venus illa mihi.

Fallit; et in Nympha Sagaritide desinit esse,

Quod fuit. Hinc pœnas exigit ira deæ. 230

Naida vulneribus succidit in arbore factis;

Illa perit: fatum Naidos arbor erat.

Hic furit; et, credens thalami procumbere tectum,

Effugit, et cursu Dindyma summa petit.

Et modo, Tolle faces; Remove, modo, verbera, clamat.

Sæpe Palæstinas jurat adesse deas. 236

Ille etiam saxo corpus laniavit acuto,

Longaque in immundo pulvere tracta coma est.

Voxque fuit, Merui: meritas dem sanguine pœnas.

Ah pereant partes, quæ nocuere mihi! 240

Ah pereant! dicebat adhuc. Onus inguinis aufert;

Nullaque sunt subito signa relicta viri.

Venit in exemplum furor hinc, mollesque ministri

Cædunt jactatis vilia membra comis.

Talibus Aoniæ facunda voce Camœnæ 245

Reddita quæsiti causa furoris erat.

Hoc quoque, dux operis, moneas precor, unde petita

Venerit; an nostra semper in urbe fuit?

Dindymon, et Cybelen, et amœnam fontibus Iden

Semper, et Iliacas Mater amavit opes. 250

Cum Trojam Æneas Italos portaret in agros,

Est dea sacriferas pæne secuta rates.

Sed nondum fatis Latio sua numina posci

Senserat: assuetis substiteratque locis.

- Post, ut Roma potens opibus jam sæcula quinque 255  
 Vidit, et edomito sustulit orbe caput:  
 Carminis Euboici fatalia verba sacerdos  
 Inspicit. Inspectum tale fuisse ferunt:  
 Mater abeat; Matrem jubeo, Romane, requiras.  
 Cum veniet, casta est accipienda manu. 260  
 Obscuræ sortis patres ambagibus errant:  
 Quæve parens absit, quove petenda loco.  
 Consulitur Pæan; Divûmque arcessite matrem,  
 Inquit: in Idæo est invenienda jugo.  
 Mittuntur proceres. Phrygiæ tum scepra tenebat 265  
 Attalus; Ausoniis rem negat ille viris.  
 Mira canam: longo tremuit cum murmure tellus;  
 Et sic est adytis diva locuta suis:  
 Ipsa peti volui: ne sit mora: mitte volentem.  
 Dignus Roma locus, quo deus omnis eat. 270  
 Ille soni terrore pavens, Proficiscere, dixit;  
 Nostra eris; in Phrygios Roma refertur avos.  
 Protinus innumeræ cædunt pineta secures  
 Illa, quibus fugiens Phryx pius usus erat.  
 Mille manus coeunt, et picta coloribus ustis 275  
 Cœlestum matrem concava puppis habet.  
 Illa sui per aquas fertur tutissima nati,  
 Longaque Phryxæ stagna sororis adit:  
 Rhœteumque rapax, Sigeaque littora transit:  
 Et Tenedon, veteres Eetionis opes. 280  
 Cyclades excipiunt, Lesbo post terga relicta:  
 Quaque Carysteis frangitur unda vadis.  
 Transit et Icarium, lapsas ubi perdidit alas  
 Icarus, et vastæ nomina fecit aquæ.  
 Tum læva Creten, dextra Pelopeidas undas 285  
 Deserit: et Veneri sacra Cythera petit.  
 Hinc mare Trinacrium, candens ubi tingere ferrum  
 Brontesque, et Steropes, Acmonidesque solent:  
 Æquoraque Afra legit, Sardoaque regna sinistris  
 Prospicit a remis, Ausoniamque tenet. 290  
 Ostia contigerat, qua se Tiberinus in altum  
 Dividit, et campo liberiore natat.

- Omnis eques, mixtaque gravis cum plebe senatus,  
 Obvius ad Tusci fluminis ora venit.  
 Procedunt pariter matres, natæque, nurusque; 295  
 Quæque colunt sanctos virginitate focos.  
 Sedula fune viri contento brachia lassant;  
 Vix subit adversas hospita navis aquas.  
 Sicca diu tellus fuerat: sitis usserat herbas:  
 Sedit limoso pressa carina vado: 300  
 Quisquis adest operi, plus quam pro parte laborat;  
 Adjuvat et fortes voce sonante manus.  
 Illa velut medio stabilis sedet insula ponto.  
 Attoniti monstro stantque paventque viri.  
 Claudia Quinta genus Clauso referebat ab alto; 305  
 Nec facies impar nobilitate fuit.  
 Casta quidem; sed non et credita. Rumor iniquus  
 Læserat, et falsi criminis acta rea est.  
 Cultus, et ornatis varie prodisse capillis,  
 Obfuit, ad rigidos promtaque lingua senes. 310  
 Conscia mens recti famæ mendacia risit:  
 Sed nos in vitium credula turba sumus.  
 Hæc ubi castarum processit ab agmine matrum,  
 Et manibus puram fluminis hausit aquam;  
 Ter caput irrorat, ter tollit in æthera palmas. 315  
 Quicumque adspiciunt, mente carere putant.  
 Submissoque genu, vultus in imagine divæ  
 Figit, et hos edit crine jacente sonos:  
 Supplicis, alma, tuæ, genitrix fecunda deorum,  
 Accipe sub certa conditione preces. 320  
 Casta negor. Si tu damnas, meruisse fatebor.  
 Morte luam pœnas iudice victa dea.  
 Sed si crimen abest, tu nostræ pignora vitæ  
 Re dabis, et castas casta sequere manus.  
 Dixit; et exiguo funem conamine traxit. 325  
 Mira, sed et scena testificata loquar.  
 Mota dea est; sequiturque ducem, laudatque sequendo.  
 Index lætitiæ fertur in astra sonus.  
 Fluminis ad flexum veniunt: Tiberina priores  
 Ostia dixerunt, unde sinister abit. 330



- Nox aderat: querno religant a stipite funem,  
 Dantque levi somno corpora functa cibo.
- Lux aderat: querno solvunt a stipite funem:  
 Ante tamen posito thura dedere foco.
- Ante coronatam puppim sine labe juvencam 335  
 Mactarunt, operum conjugique rudem.
- Est locus, in Tiberin qua lubricus influit Almo,  
 Et nomen magno perdit ab amne minor.
- Illic purpurea canus cum veste sacerdos  
 Almonis Dominam sacraque lavit aquis. 340
- Exululant comites, furiosaque tibia flatur;  
 Et feriunt molles taurea terga manus.
- Claudia præcedit læto celeberrima vultu,  
 Credita vix tandem teste pudica dea.
- Ipsa sedens plastro porta est invecta Capena: 345  
 Sparguntur junctæ flore recente boves.
- Nasica accepit: templi tunc exstitit auctor.  
 Augustus nunc est: ante Metellus erat.
- Substitit hic Erato. Mora fit, si cætera quæram.  
 Dic, inquam, parva cur stipe quærat opes? 350
- Contulit æs populus, de quo delubra Metellus  
 Fecit, ait. Dandæ mos stipis inde manet.
- Cur vicibus factis ineant convivia, quæro,  
 Tum magis, indictas concelebrentque dapes.
- Quod bene mutarit sedem Berecynthia, dixit, 355  
 Captant mutatis sedibus omen idem.
- Institeram, quare primi Megalesia ludi  
 Urbe forent nostra: cum dea (sensit enim):
- Illa deos, inquit, peperit. Cessere parenti,  
 Principiumque dati mater honoris habet. 360
- Cur igitur Gallos, qui se excidere, vocamus,  
 Cum tanto Phrygia Gallica distet humus?
- Inter, ait, viridem Cybelen altasque Celænas  
 Amnis it insana, nomine Gallus, aqua.
- Qui bibit inde, furit. Procul hinc discedite, quis est  
 Cura bonæ mentis: qui bibit inde, furit. 366
- Non pudet herbosum, dixi, posuisse moretum  
 In Dominæ mensis? an sua causa subest?

Lacte mero veteres usi memorantur, et herbis,  
 Sponte sua si quas terra ferebat, ait. 370  
 Candidus elisæ miscetur caseus herbæ;  
 Cognoscat priscos ut dea prisca cibos.  
 Postera cum cœlo motis Pallantias astris  
 Fulserit, et niveos Luna levarit equos;  
 Qui dicet, Quondam sacrata est colle Quirini 375  
 Hac Fortuna die Publica; verus erit.

Tertia lux, memini, ludis erat. At mihi quidam  
 Spectanti senior, contiguusque loco,  
 Hæc, ait, illa dies, Libycis qua Cæsar in oris  
 Perfida magnanimi contudit arma Jubæ. 380  
 Dux mihi Cæsar erat, sub quo meruisse tribunus  
 Glorior. Officio præfuit ille meo.  
 Hanc ego militia sedem, tu pace parasti,  
 Inter bis quinos usus honore viros.  
 Plura locuturi subito seducimur imbre; 385  
 Pendula cœlestes Libra movebat aquas.  
 Ante tamen, quam summa dies spectacula sistat,  
 Ensifer Orion æquore mersus erit.

Proxima victricem cum Romam inspexerit Eos,  
 Et dederit Phœbo stella fugata locum; 390  
 Circus erit pompa celebr numeroque deorum:  
 Primaque ventosis palma petetur equis.  
 Hi Cereris ludi: non est opus indice causæ.  
 Sponte deæ munus promeritumque patet.  
 Messis erant primis virides mortalibus herbæ, 395  
 Quas tellus nullo sollicitante dabat.  
 Et modo carpebant vivaci cespite gramen;  
 Nunc epulæ tenera fronde cacumen erant.  
 Postmodo glans nata est. Bene erat jam glande reperta,  
 Duraque magnificas quercus habebat opes. 400  
 Prima Ceres homini, ad meliora alimenta vocato,  
 Mutavit glandes utiliore cibo.  
 Illa jugo tauros collum præbere coegit:  
 Tum primum soles eruta vidit humus.

- Æs erat in pretio: chalybeia massa latebat. 405  
 Heu quam perpetuo debuit illa tegi!  
 Pace Ceres læta est. At vos optate, coloni,  
 Perpetuam pacem, perpetuumque Ducem.  
 Farra deæ, micæque licet salientis honorem  
 Detis, et in veteres thurea grana focos. 410  
 Et, si thura aberunt, unctas accendite tædas.  
 Parva bonæ Cereri, sint modo casta, placent.  
 A bove succincti cultros removete ministri.  
 Bos aret: ignavam sacrificate suem.  
 Apta jugo cervix non est ferienda securi. 415  
 Vivat, et in dura sæpe laboret humo.  
 Exigit ipse locus, raptus ut virginis edam.  
 Plura recognosces; pauca docendus eris.  
 Terra tribus scopulis vastum procurrit in æquor  
 Trinacris, a positu nomen adepta loci. 420  
 Grata domus Cereri. Multas ibi possidet urbes;  
 In quibus est culto fertilis Henna solo.  
 Frigida cœlestum matres Arethusa vocarat.  
 Venerat ad sacras et dea flava dapes.  
 Filia, consuetis ut erat comitata puellis, 425  
 Errabat nudo per sua prata pede.  
 Valle sub umbrosa locus est, adspergine multa  
 Humidus ex alto desilientis aquæ.  
 Tot fuerant illic, quot habet natura, colores:  
 Pictaque dissimili flore nitebat humus. 430  
 Quam simul adspexit; Comites, accedite, dixit,  
 Et mecum vestros flore replete sinus.  
 Præda puellares animos oblectat inanis;  
 Et non sentitur sedulitate labor.  
 Hæc implet lento calathos e vimine textos: 435  
 Hæc gremium, laxos degravat illa sinus.  
 Illa legit calthas: huic sunt violaria curæ;  
 Illa papavereas subsecat ungue comas.  
 Has, hyacinthe, tenes: illas, amarante; moraris:  
 Pars thyma, pars casiam, pars meliloton amant: 440  
 Plurima lecta rosa est; et sunt sine nomine flores.  
 Ipsa crocos tenues, liliaque alba legit.

- Carpendi studio paullatim longius itur ;  
 Et dominam casu nulla secuta comes.  
 Hanc videt, et visam patruus velociter aufert ; 445  
 Regnaque cæruleis in sua portat equis.  
 Illa quidem clamabat, Io, carissima mater,  
 Auferor ; ipsa suos abscideratque sinus.  
 Panditur interea Diti via ; jamque diurnum  
 Lumen inassueti vix patiuntur equi. 450  
 At chorus æqualis, cumulatis flore canistris,  
 Persephone, clamant, ad tua dona veni !  
 Ut clamata silet, montes ululatus implent,  
 Et feriunt mæsta pectora nuda manu.  
 Attonita est plangere Ceres ; modo venerat Hennam :  
 Nec mora, Me miseram, filia, dixit, ubi es ? 456  
 Mentis inops rapitur, quales audire solemus  
 Threicias passis Mænadas ire comis.  
 Ut vitulo mugit sua mater ab ubere raptō,  
 Et quærit fetus per nemus omne suos : 460  
 Sic dea : nec retinet gemitus, et concita cursu  
 Fertur, et e campis incipit, Henna, tuis.  
 Inde puellaris nacta est vestigia plantæ,  
 Et pressam noto pondere vidit humum.  
 Forsitan illa dies errori summa fuisset, 465  
 Si non turbassent signa reperta sues.  
 Jamque Leontinos, Amenanaque flumina cursu  
 Præterit, et ripas, herbifer Aci, tuas :  
 Præterit et Cyanen, et fontem lenis Anapi :  
 Et te, vorticibus non adeunde Gela. 470  
 Liquerat Ortygien, Megareaque, Pantagienque :  
 Quaque Symætheas accipit æquor aquas :  
 Antraque Cyclopum, positis exusta caminis,  
 Quique locus curvæ nomina falcis habet :  
 Himeraque, et Didymen, Acragantaque, Tauromenon-  
 que, 475  
 Sacrorumque Melan pascua læta boum.  
 Hinc Camerinan adit, Thapsonque, et Heloria Tempe :  
 Quaque patet Zephyro semper apertus Eryx.

- Jamque Peloriaden, Lilybæaque, jamque Pachynon  
 Lustrarat, terræ cornua prima suæ. 480
- Quacunq̄ue ingreditur, miseris loca cuncta querelis  
 Implet, ut amissum cum gemit ales Ityn.  
 Perque vices modo, Persephone, modo, Filia, clamat.  
 Clamat, et alternis nomen utrumque ciet.  
 Sed neque Persephone Cererem, neque filia matrem  
 Audit; et alternis nomen utrumque perit. 486
- Unaque, pastorem vidisset an arva colentem,  
 Vox erat, Hac gressus siqua puella tulit?  
 Jam color unus inest rebus, tenebrisque teguntur  
 Omnia: jam vigiles conticuere canes. 490
- Alta jacet vasti super ora Typhoeos Ætne,  
 Cujus anhelatis ignibus ardet humus.  
 Illic accendit geminas pro lampade pinus:  
 Hinc Cereris sacris nunc quoque tæda datur.  
 Est specus exesi structura pumicis asper, 495  
 Non homini regio, non adeunda feræ:  
 Quo simul ac venit, frenatos curribus angues  
 Jungit, et æquoreas sicca pererrat aquas.  
 Effugit et Syrtes, et te, Zancleæ Charybdi:  
 Et vos, Nissæi, naufraga monstra, canes: 500  
 Adriacumque patens late, bimaremque Corinthon.  
 Sic venit ad portus, Attica terra, tuos.  
 Hic primum sedit gelido mæstissima saxo.  
 Illud Cecropidæ nunc quoque triste vocant.  
 Sub Jove duravit multis immota diebus, 505  
 Et lunæ patiens, et pluvialis aquæ.  
 Fors sua cuique loco est. Quo nunc Cerealis Eleusin,  
 Dicitur hoc Celei rura fuisse senis.  
 Ille domum glandes excussa que mora rubetis  
 Portat, et arsuris arida ligna focis. 510  
 Filia parva duas redigebat rupe capellas;  
 Et tener in cunis filius æger erat.  
 Mater, ait virgo, (mota est dea nomine matris,)  
 Quid facis in solis incomitata jugis?  
 Restitit et senior, quamvis onus urget, et orat, 515  
 Tecta suæ subeat quantulacunque cassæ.

*Illa negat: (simularat anum, mitraque capillos*

*Presserat;)* instanti talia dicta refert:

*Sospes eas, semperque parens; mihi filia rapta est.*

*Heu melior quanto sors tua sorte mea!* 520

*Dixit: et, ut lacrymæ, (neque enim lacrymare deorum est,)*

*Decidit in tepidos lucida gutta sinus.*

*Flent pariter molles animis virgoque senexque:*

*E quibus hæc justî verba fuere senis:*

*Sic tibi, quam raptam quereris, sit filia sospes;* 525

*Surge, nec exiguæ despice tecta casæ.*

*Cui dea, Duc, inquit; scisti, qua cogere posses:*

*Seque levat saxo, subsequiturque senem.*

*Dux comiti narrat, quam sit sibi filius æger,*

*Nec capiat somnos, invigiletque malis.* 530

*Illa soporiferum, parvos initura penates,*

*Colligit agresti lene papaver humo.*

*Dum legit, oblito fertur gustasse palato,*

*Longamque imprudens exsoluisse famem.*

*Quæ quia principio posuit jejunia noctis,* 535

*Tempus habent Mystæ sidera visa cibi.*

*Limen ut intravit, luctus videt omnia plena:*

*Jam spes in puero nulla salutis erat.*

*Matre salutata (mater Metanira vocatur)*

*Tangere dignata est os puerile suo.* 540

*Pallor abit, subitæque vigent in corpore vires.*

*Tantus cœlesti venit ab ore vigor.*

*Tota domus læta est, hoc est, materque paterque*

*Nataque: tres illi tota fuere domus.*

*Mox epulas ponunt, liquefacta coagula lacte,* 545

*Pomaque, et in teneris aurea mella favis.*

*Abstinet alma Ceres, somnique papavera causas*

*Dat tibi cum tepido lacte bibenda, puer.*

*Noctis erat medium, placidique silentia somni;*

*Triptolemmum gremio sustulit illa suo:* 550

*Terque manu permulsit eum, tria carmina dixit,*

*Carmina mortali non referenda sono.*

*Inque foco pueri corpus vivente favilla*

*Obruit, humanum purget ut ignis onus.*

- Excutitur somno stulte pia mater; et amens, 555  
 Quid facis? exclamat; membraque ab igne rapit.  
 Cui dea, Dum non es, dixit, scelerata fuisti:  
 Irrita materno sunt mea dona metu.  
 Iste quidem mortalis erit; sed primus arabit,  
 Et seret, et culta præmia tollet humo. 560  
 Dixit, et egrediens nubem trahit, inque dracones  
 Transit, et aligero tollitur axe Ceres.  
 Sunion expositum, Piræaque tuta recessu  
 Linqvit, et in dextrum quæ jacet ora latus.  
 Hinc init Ægæum, quo Cycladas adspicit omnes: 565  
 Ioniumque rapax Icariumque legit:  
 Perque urbes Asiæ longum petit Hellespontum:  
 Diversumque locis alta pererrat iter.  
 Nam modo thurilegos Arabas, modo despicit Indos:  
 Hinc Libys, hinc Meroe siccaque terra subest. 570  
 Nunc adit Hesperios, Rhenum, Rhodanumque,  
 Padumque,  
 Teque future parens, Tibri, potentis aquæ.  
 Quo feror? immensum est erratas dicere terras:  
 Præteritus Cereri nullus in orbe locus.  
 Errat et in cælo: liquidique immunia ponti 575  
 Alloquitur gelido proxima signa polo.  
 Parrhasides stellæ, namque omnia nosse potestis,  
 Æquoreas nunquam cum subeatis aquas:  
 Persephonen miseræ natam monstrate parenti.  
 Dixerat. Huic Helice talia verba refert: 580  
 Crimine nox vacua est. Solem de virgine rapta  
 Consule, qui late facta diurna videt.  
 Sol auditus, Quam quæris, ait, ne vana labores,  
 Nupta Jovis fratri tertia regna tenet.  
 Questa diu secum sic est affata Tonantem: 585  
 Maximaque in vultu signa dolentis erant:  
 Si memor es, de quo mihi sit Proserpina nata,  
 Dimidium curæ debet habere tuæ.  
 Orbe pererrato, sola est injuria facti  
 Cognita; commissi præmia raptor habet. 590

At neque Persephone digna est prædone marito,

Nec gener hoc nobis more parandus erat.

Quid gravius victore Gyge captiva tulissem,

Quam nunc, te cœli sceptrâ tenente, tuli?

Verum impune ferat: nos hæc patiamur inultæ. 595

Reddat, et emendet facta priora novis.

Jupiter hanc lenit, factumque excusat amore;

Nec gener est nobis ille pudendus, ait.

Non ego nobilior. Posita est mihi regia cœlo,

Possidet alter aquas, alter inane Chaos. 600

Sed si forte tibi non est mutabile pectus,

Statque semel juncti rumpere vincla tori;

Hoc quoque tentemus, siquidem jejuna remansit;

Sin minus, inferni conjugis uxor erit.

Tartara jussus adit sumptis Caduciferâlis: 605

Speque redit citius, visaque certa refert.

Rapta tribus, dixit, solvit jejunia granis,

Punica quæ lento cortice poma tegunt.

Haud secus indoluit, quam si modo rapta fuisset,

Mæsta parens; longa vixque refecta mora est. 610

Atque ita, Nec nobis cœlum est habitabile, dixit:

Tænaria recipi me quoque valle jube.

Et factura fuit; pactus nisi Jupiter esset,

Bis tribus ut cœlo mensibus illa foret.

Tum demum vultumque Ceres animumque recepit;

Imposuitque suæ spicea sarta comæ. 616

Largaque provenit cessatis messis in arvis,

Et vix congestas area cepit opes.

Alba decent Cererem: vestes Cerealibus albas

Sumite: nunc pulli velleris usus abest. 620

Occupat Apriles Idus cognomine Victor

Jupiter: hac illi sunt data templa die.

Hæc quoque, ni fallor, populo dignissima nostro

Atria Libertas cœpit habere sua.

Luce secutura tutos pete, navita, portus:

625

Ventus ab occasu grandine mistus erit.



Scilicet, ut fuerit, tamen hac Mutinensia Cæsar  
 Grandine militia contudit arma sua.  
 Tertia post Veneris cum lux surrexerit Idus,  
 Pontifices, forda sacra litate bove. 630  
 Forda ferens bos est fecundaque, dicta ferendo:  
 Hinc etiam fetus nomen habere putant.  
 Nunc gravidum pecus est: gravidæ nunc semine terræ.  
 Telluri plenæ victima plena datur.  
 Pars cadit arce Jovis: ter denas Curia vaccas 635  
 Accipit, et largo sparsa cruore madet.  
 Ast ubi visceribus vitulos rapuere ministri,  
 Sectaque fumosis exta dedere focus;  
 Igne cremat vitulos, quæ natu maxima virgo est,  
 Luce Palis populos perget ut ille cinis. 640  
 Rege Numa, fructu non respondente labori,  
 Irrita decepti vota colentis erant.  
 Nam modo siccus erat gelidis Aquilonibus annus,  
 Nunc ager assidua luxuriabat aqua.  
 Sæpe Ceres primis dominum fallebat in herbis: 645  
 Et levis obsesso stabat avena solo:  
 Et pecus ante diem partus edebat acerbos:  
 Agnaque nascendo sæpe necabat ovem.  
 Sylva vetus, nullaque diu violata securi,  
 Stabat, Mænalia sacra relicta deo. 650  
 Ille dabat tacitis animo responsa quieto  
 Noctibus. Hic geminas rex Numa mactat oves.  
 Prima cadit Fauno; leni cadit altera Somno.  
 Sternitur in duro vellus utrumque solo.  
 Bis caput intonsum fontana spargitur unda; 655  
 Bis sua faginea tempora fronde premit.  
 Usus abest Veneris: nec fas animalia mensis,  
 Ponere: nec digitis annulus ullus inest.  
 Veste rudi tectum supra nova vellera corpus  
 Ponit, adorato per sua verba deo. 660  
 Interea placidam redimita papavere frontem  
 Nox venit, et secum somnia nigra trahit.  
 Faunus adest; oviumque premens pede vellera duro,  
 Edidit a dextro talia dicta toro:

Morte boum tibi, rex, tellus placanda duarum: 665

Det sacris animas una necata duas.

Excutitur terrore quies; Numa visa revolvit,

Et secum ambages cæcaque jussa refert.

Expedit errantem nemori gratissima conjux,

Et dixit, Gravidæ posceris exta bovis. 670

Extâ bovis dantur gravidæ: felicior annus

Provenit, et fructum terra pecusque ferunt.

Hanc quondam Cytherea diem properantius ire

Jussit, et ætherios præcipitavit equos;

Ut titulum imperii quamprimum luce sequenti 675

Augusto juveni prospera bella darent.

Sed jam præteritas quartus tibi Lucifer Idus

Respicit. Hac Hyades Dorida nocte petunt.

Tertia post Hyadas cum lux erit orta remotas,

Carcere partitos Circus habebit equos. 680

Cur igitur missæ vinctis ardentia tædis

Terga ferant vulpes, causa docenda mihi.

Frigida Carseoli, nec olivis apta ferendis

Terra, sed ad segetes ingeniosus ager.

Hac ego Pelignos, natalia rura, petebam, 685

Parva, sed assiduis humida semper aquis.

Hospitis antiqui solitas intravimus ædes:

Demserat emeritis jam juga Phœbus equis.

Is mihi multa quidem, sed et hæc, narrare solebat,

Unde meum præsens instrueretur opus: 690

Hoc, ait, in campo (campumque ostendit) habebat

Rus breve cum duro parca colona viro.

Ille suam peragebat humum; sive usus aratri,

Sive cavæ falcis, sive bidentis erat.

Hæc modo verrebbe stantem tibicine villam: 695

Nunc matris plumis ova fovenda dabat.

Aut virides malvas, aut fungos colligit albos,

Aut humilem grato calfacit igne focum.

Et tamen assiduis exercet brachia telis;

Adversumque minas frigoris arma parat. 700

- Filius hujus erat primo lascivus in ævo,  
 Addideratque annos ad duo lustra duos.  
 Is capit extremi vulpem sub valle salicti:  
 Abstulerat multas illa cohortis aves.  
 Captivam stipula fœnoque involvit, et ignes 705  
 Admovet. Urentes effugit illa manus.  
 Qua fugit, incendit vestitos messibus agros:  
 Damnosis vires ignibus aura dabat.  
 Factum abiit: monumenta manent. Nam vivere captam  
 Nunc quoque lex vulpem Carseolana vetat. 710  
 Utque luat pœnas gens hæc, Cerealibus ardet:  
 Quoque modo segetes perdidit, ipsa perit.
- Postera cum veniet terras visura patentes  
 Memnonis in roseis lutea mater equis;  
 E duce lanigeri pecoris, qui prodidit Hellen, 715  
 Sol abit: egresso victima major adest.  
 Vacca sit an taurus, sive est cognoscere promptum:  
 Pars prior apparet; posteriora latent.  
 Seu tamen est taurus, sive est hoc fœmina signum,  
 Junone invita munus amoris habet. 720  
 Nox abiit, oriturque Aurora. Palilia poscor.  
 Non poscor frustra, si favet alma Pales.  
 Alma Pales, faveas pastoria sacra canenti,  
 Prosequor officio si tua festa pio.  
 Certe ego de vitulo cinerem, stipulasque fabales, 725  
 Sæpe tuli plena, februa casta, manu.  
 Certe ego transilui positas ter in ordine flammæ,  
 Virgaque rotatas laurea misit aquas.  
 Mota dea est, operique favet. Navalibus exit  
 Puppis: habent ventos jam mea vela suos. 730  
 I pete virginea, populus, suffimen ab ara:  
 Vesta dabit. Vestæ munere purus eris.  
 Sanguis equi suffimen erit, vitulique favilla:  
 Tertia res, duræ culmen inane fabæ.  
 Pastor, oves saturas ad prima crepuscula lustra. 735  
 Uda prius spargat, virgaque verrat humum.

Frondibus et fixis decorentur ovilia ramis,  
 Et tegat ornatas longa corona fores.  
 Cærulei fiant vivo de sulfure fumi,  
 Tactaque fumanti sulfure balet ovis. 740  
 Ure mares oleas, tædamque, herbasque Sabinas,  
 Et crepet in mediis laurus adusta focis.  
 Libaque de milia milii fiscella sequatur :  
 Rustica præcipue est hoc dea læta cibo.  
 Adde dapes mulctramque suas : dapibusque resectis 745  
 Sylvicolam tepido lacte precare Palen.  
 Consule, dic, pecori pariter pecorisque magistris :  
 Effugiat stabulis noxa repulsa meis.  
 Sive sacro pavi, sedive sub arbore sacra ;  
 Pabulaque in bustis inscia carpsit ovis : 750  
 Seu nemus intravi vetitum, nostrisve fugatæ  
 Sunt oculis Nymphæ, semicaperve deus :  
 Seu mea falx ramo lucum spoliavit opaco,  
 Unde data est ægræ fiscina frondis ovi :  
 Da veniam culpæ : nec, dum degrandinat, obsit 755  
 Agresti Fauno supposuisse pecus.  
 Nec noceat turbasse lacus. Ignoscite, Nymphæ,  
 Mota quod obscuras ungula fecit aquas.  
 Tu, dea, pro nobis fontes fontanaque placa  
 Numina, tu sparsos per nemus omne deos. 760  
 Nec Dryadas, nec nos videamus labra Dianæ,  
 Nec Faunum, medio cum premit arva die.  
 Pelle procul morbos. Valeant hominesque gregesque :  
 Et valeant vigiles, provida turba, canes.  
 Neve minus multas redigam, quam mane fuerunt ; 765  
 Neve gemam referens vellera rapta lupo.  
 Absit iniqua fames. Herbæ, frondesque supersint :  
 Quæque lavent artus, quæque hibantur, aquæ.  
 Ubera plena premam. Referat mihi caseus æra ;  
 Dentque viam liquido vimina rara sero. 770  
 Sitque salax aries ; conceptaque semina conjux  
 Reddat ; et in stabulo multa sit agna meo.  
 Lanaque proveniat, nullas læsura puellas,  
 Mollis, et ad teneras quamlibet apta manus.

- Quæ precor, eveniant: et nos faciamus ad annum 775  
 Pastorum dominæ grandia liba Pali.  
 His dea placanda est: hæc tu conversus ad ortus  
 Dic ter, et in vivo perlue rore manus.  
 Tum licet apposita, veluti crateræ, càmella,  
 Lac niveum potes, purpureamque sâpam: 780  
 Moxque per ardentès stipulæ crepitantis acervos  
 Trajicias celeri strenua membra pede.  
 Expositus mos est. Moris mihi restat origo.  
 Turba facit dubium, cœptaque nostra tenet.  
 Omnia purgat edax ignis, vitiumque metallis 785  
 Excoquit: idcirco cum duce purgat oves.  
 An, quia cunctarum contraria semina rerum  
 Sunt duo discordes, ignis et unda, dei;  
 Junxerunt elementa patres, aptumque putarunt  
 Ignibus et sparsa tangere corpus aqua? 790  
 An, quod in his vitæ causa est: hæc perdidit exul:  
 His nova fit conjux; hæc duo magna putant?  
 Vix equidem credo; sunt qui Phaethonta referri  
 Credant, et nimias Deucalionis aquas.  
 Pars quoque, cum saxis pastores saxa ferirent, 795  
 Scintillam subito prosiluisse ferunt.  
 Prima quidem periit; stipulis excepta secunda est.  
 Hoc argumenti flamma Palilis habet.  
 An magis hunc morem pietas Æneia fecit,  
 Innocuum victo cui dedit ignis iter? 800  
 Hoc tamen est vero propius, cum condita Roma est,  
 Transferri jussos in nova tecta Lares;  
 Mutantesque domum tectis agrestibus ignem  
 Et cessaturæ supposuisse casæ;  
 Per flammas saluisse pecus, saluisse colonos? 805  
 Quod fit natali nunc quoque, Roma, tuo.  
 Ipse locus causas vati facit. Urbis origo  
 Venit: ades festis, magne Quirine, tuis.  
 Jam luerat pœnas frater Numitoris, et omne  
 Pastorum gemino sub duce vulgus erat. 810  
 Contrahere agrestes, et mœnia ponere utrique  
 Convenit. Ambigitur mœnia ponat uter.

- Nil opus est, dixit, certamine, Romulus, ullo:  
 Magna fides avium est: experiamur aves.  
 Res placet. Alter adit nemorosi saxa Palati; 815  
 Alter Aventinum mane cacumen init.  
 Sex Remus, hic volucres bis sex videt ordine; pacto  
 Statur: et arbitrium Romulus urbis habet.  
 Apta dies legitur, quæ mœnia signet aratro.  
 Sacra Palis suberant: inde movetur opus. 820  
 Fossa fit ad solidum: fruges jaciuntur in ima,  
 Et de vicino terra petita solo.  
 Fossa repletur humo, plenæque imponitur ara,  
 Et novus accenso fungitur igne focus.  
 Inde premens stivam designat mœnia sulco: 825  
 Alba jugum niveo cum bove vacca tulit.  
 Vox fuit hæc regis: Condenti, Jupiter, urbem,  
 Et genitor Mavors, Vestaque mater ades;  
 Quosque pium est adhibere deos, advertite cuncti:  
 Auspicibus vobis hoc mihi surgat opus. 830  
 Longa sit huic ætas, dominæque potentia terræ:  
 Sitque sub hac oriens occiduusque dies.  
 Ille precabatur. Tonitru dedit omina lævo  
 Jupiter: et lævo fulmina missa polo.  
 Angurio læti jaciunt fundamina cives; 835  
 Et novus exiguo tempore murus erat.  
 Hoc Celer urget opus, quem Romulus ipse vocarat;  
 Sintque, Celer, curæ, dixerat, ista tuæ.  
 Neve quis aut muros, aut factam vomere fossam  
 Transeat; audentem talia dede neci. 840  
 Quod Remus ignorans, humiles contemnere muros  
 Cœpit, et, His populus, dicere, tutus erit?  
 Nec mora, transiluit. Rutro Celer occupat ausum.  
 Ille premit duram sanguinolentus humum.  
 Hæc ubi rex didicit; lacrymas introrsus obortas 845  
 Devorat, et clausum pectore vulnus habet.  
 Flere palam non vult, exemplaue fortia servat:  
 Sicque meos muros transeat hostis, ait.  
 Dat tamen exsequias: nec jam suspendere fletum  
 Sustinet; et pietas dissimulata patet. 850

- Osculaque applicuit posito suprema feretro :  
 Atque ait, Invito frater adempte, vale.  
 Arsurosque artus unxit: fecere, quod ille,  
 Faustulus, et mæstas Acca soluta comas.  
 Tum juvenem nondum facti flere Quirites. 855  
 Ultima plorato subdita flamma rogo est.  
 Urbs oritur (quis tunc hoc ulli credere posset?)  
 Victorem terris impositura pedem.  
 Cuncta regas: et sis magno sub Cæsare semper:  
 Sæpe etiam plures nominis hujus habe. 860  
 Et quoties steteris domito sublimis in orbe,  
 Omnia sint humeris inferiora tuis.
- Dicta Pales nobis: idem Vinalia dicam.  
 Una tamen media est inter utramque dies.  
 Numina vulgares Veneris celebrate puellæ. 865  
 Multa professorum quæstibus apta Venus.  
 .Poscite thure dato formam, populique favorem;  
 Poscite blanditias, dignaque verba joco.  
 Cumque sua dominæ date grata sisymbria myrto,  
 Textaque composita juncea vincla rosa. 870  
 Templâ frequentari Collinæ proxima portæ  
 Nunc decet: a Siculo nomina colle tenent.  
 Utque Syracusas Arethusidas abstulit armis  
 Claudius, et bello te quoque cepit, Eryx:  
 Carmine vivacis Venus est translata Sibyllæ; 875  
 Inque suæ stirpis maluit urbe coli.  
 Cur igitur Veneris festum Vinalia dicant,  
 Quæritis, et quare sit Jovis ista dies?  
 Turnus, an Æneas Latîæ gener esset Amata,  
 Bellum erat. Etruscas Turnus adoptat opes. 880  
 Clarus erat, sumtisque ferox Mezentius armis:  
 Et vel equo magnus, vel pede major erat.  
 Quem Rutuli Turnusque suis adsciscere tentant  
 Partibus. Hæc contra dux ita Tuscus ait:  
 Stat mihi non parvo virtus mea. Vulnere testor, 885  
 Armaque, quæ sparsi sanguine sæpe meo.

Qui petis auxilium, non grandia divide mecum

Præmia, de lacubus proxima musta tuis.

Nulla mora est operæ. Vestrum dare, vincere nostrum  
est.

Quam velit Æneas ista negata mihi! 890

Annuerant Rutuli: Mezentius induit arma:

Induit Æneas; alloquiturque Jovem.

Hostica Tyrrheno vota est vindemia regi:

Jupiter, e Latio palmitè musta feras.

Vota valent meliora; cadit Mezentius ingens, 895

Atque indignanti pectore plangit humum.

Venerat Auctumnus calcatis sordidus uvis:

Redduntur merito debita vina Jovi.

Dicta dies hinc est Vinalia. Jupiter illam

Vindicat, et festis gaudet inesse suis. 900

Sex ubi, quæ restant, luces Aprilis habebit,

In medio cursu tempora veris erunt:

Et frustra pecudem quæres Athamantidos Helles:

Signaque dant imbres: exoriturque Canis.

Hac mihi Nomento Romam cum luce redirem, 905

Obstitit in media candida pompa via.

Flamen in antiquæ lucum Robiginis ibat,

Extæ canis flammis, exta daturus ovis.

Protinus accessi, ritus ne nescius essem.

Edidit hæc Flamen verba, Quirine, tuus: 910

Aspera Robigo, parcas Cerealibus herbis;

Et tremat in summa læve cacumen humo.

Tu sata sideribus cœli nutrita secundi

Crescere, dum fiant falcibus apta, sinas.

Vis tua non levis est. Quæ tu frumenta notasti, 915

Mæstus in amissis illa colonus habet.

Nec venti tantum Cereri nocuere, nec imbres;

Nec sic marmoreo pallet adusta gelu;

Quantum, si culmos Titan incalfacit udos.

Tum locus est iræ, diva timenda, tuæ. 920

Parce precor, scabrasque manus a messibus aufer;

Neve noce cultis: posse nocere sat est.



- Nec teneras segetes, sed durum amplectere ferrum,  
 Quodque potest alios perdere, perde prior.  
 Uttilius gladios et tela nocentia carpes. 925  
 Nil opus est illis: otia mundus agit.  
 Sarcula nunc, durusque bidens, et vomer aduncus,  
 Ruris opes niteant: inquinet arma situs.  
 Conatusque aliquis vagina ducere ferrum,  
 Adstrictum longa sentiat esse mora. 930  
 At tu ne viola Cererem: semperque colonus  
 Absenti possit solvere vota tibi.  
 Dixerat. A dextra villis mantele solutis,  
 Cumque meri patera thuris acerra fuit.  
 Thura focis vinumque dedit, fibrasque bidentis, 935  
 Turpiaque obscænæ (vidimus) exta canis.  
 Tum mihi, Cur detur sacris nova victima, quæris?  
 Quæsieram: causam percipe, Flamen ait:  
 Est Canis, Icarium dicunt, quo sidere moto  
 Tosta sitit tellus, præcipiturque seges. 940  
 Pro cane sidereo canis hic imponitur aræ:  
 Et, quare pereat, nil nisi nomen habet.
- Cum Phrygis Assaraci Titania fratre relicto  
 Sustulit immenso ter jubar orbe suum;  
 Mille venit variis florum dea nexa coronis: 945  
 Scena joci morem liberioris habet.  
 Exit et in Maias sacrum Florale Kalendas.  
 Tunc repetam: nunc me grandius urget opus.  
 Aufert Vesta diem: cognato Vesta recepta est  
 Limine: sic justis constituere senes. 950  
 Phœbus habet partem; Vestæ pars altera cessit:  
 Quod superest illis, tertius ipse tenet.  
 State Palatinæ laurus, prætextaque quercu  
 Stet domus. Æternos tres habet una Deos.
-

## LIBER QUINTUS.

---

QUÆRITIS, unde putem Maio data nomina mensi?  
Non satis est liquido cognita causa mihi,  
Ut stat, et incertus, qua sit sibi, nescit, eundum,  
Cum videt ex omni parte viator iter:  
Sic, quia posse datur diversas reddere causas, 5  
Qua ferar, ignoro: copiaque ipsa nocet.  
Dicite, quæ fontes Aganippidos Hippocrenes  
Grata Medusæ signa tenetis equi.  
Dissensere deæ; quarum Polyhymnia cœpit  
Prima: silent aliæ, dictaque mente notant. 10  
Post Chaos, ut primum data sunt tria corpora mundo,  
Inque novas species omne recessit opus;  
Pondere terra suo subsedit, et æquora traxit:  
At cælum levitas in loca summa tulit.  
Sol quoque cum stellis nulla gravitate retentus, 15  
Et vos Lunares exsiluistis equi.  
Sed neque terra diu cælo, nec cætera Phœbo  
Sidera cedebant: par erat omnis honos.  
Sæpe aliquis solio, quod tu, Saturne, tenebas,  
Ausus de media plebe sedere deus: 20  
Et latus Oceano quisquam deus advena junxit:  
Tethys et extremo sæpe recepta loco est.  
Donec Honor, placidoque decens Reverentia vultu  
Corpora legitimis imposuere toris.  
Hinc sata Majestas; hos est dea censa parentes: 25  
Quaque die partu est edita, magna fuit.  
Nec mora: consedit medio sublimis Olympo,  
Aurea, purpureo conspicienda sinu.  
Consedere simul Pudor et Metus. Omne videres  
Numen ad hanc vultus composuisse suos. 30

- Protinus intravit mentes suspectus honorum :  
 Fit pretium dignis ; nec sibi quisque placet.  
 Hic status in cœlo multos permansit in annos,  
 Dum senior fatis excidit arce deus.
- Terra feros partus, immania monstra, Gigantas 35  
 Edidit, ausuros in Jovis ire domum.
- Mille manus illis dedit, et pro cruribus angues :  
 Atque ait, In magnos arma movete deos.  
 Exstruere hi montes ad sidera summa parabant,  
 Et magnum bello sollicitare Jovem. 40
- Fulmina de cœli jaculatus Jupiter arce  
 Vertit in auctores pondera vasta suos.
- His bene Majestas armis defensa deorum  
 Restat : et ex illo tempore firma manet.
- Assidet illa Jovi : Jovis est fidissima custos : 45  
 Et præstat sine vi sceptrâ tenenda Jovi.
- Venit et in terras : coluerunt Romulus illam  
 Et Numa : mox alii, tempore quisque suo.
- Ille patres in honore pio matresque tætur :  
 Ille comes pueris virginibusque venit. 50
- Ille datos fasces commendat, eburque curule :  
 Ille coronatis alta triumphat equis.
- Finierat voces Polyhymnia. Dicta probarunt  
 Clioque, et curvæ scita Thalia lyræ.
- Excipit Uranie ; fecere silentia cunctæ ; 55  
 Et vox audiri nulla, nisi illa, potest.
- Magna fuit quondam capitis reverentia cani,  
 Inque suo pretio ruga senilis erat.
- Martis opus juvenes animosaque bella gerebant,  
 Et pro diis aderant in statione suis. 60
- Viribus illa minor, nec habendis utilis armis,  
 Consilio patriæ sæpe ferebat opem.
- Nec nisi post annos patuit tunc Curia seros :  
 Nomen et ætatis mite senatus erat.
- Jura dabat populo senior : finitaque certis 65  
 Legibus est ætas, unde petatur honos.
- Et medius juvenum, non indignantibus ipsis,  
 Ibat : et interior, si comes unus erat.

Verba quis auderet coram sene digna rubore  
 Dicere? censuram longa senecta dabat. 70  
 Romulus hoc vidit, selectaque pectora patres  
 Dixit. Ad hos urbis summa relata novæ.  
 Hinc sua majores posuisse vocabula Maio  
 Tangor, et ætati consuluisse suæ.  
 Et Numitor dixisse potest, Da, Romule, mensem 75  
 Hunc senibus; nec avum sustinuisse nepos.  
 Nec leve præpositi pignus successor honoris  
 Junius, a juvenum nomine dictus, habet.  
 Tum sic, neglectos hedera redimita capillos,  
 Prima sui cœpit Calliopea chori: 80  
 Duxerat Oceanus quondam Titanida Tethyn,  
 Qui terram liquidis, qua patet, ambit aquis.  
 Hinc sata Pleione cum cœlifero Atlante  
 Jungitur, ut fama est, Pleiadasque parit.  
 Quarum Maia suas forma superasse sorores 85  
 Traditur, et summo concubuisse Jovi.  
 Hæc enixa jugo cupressiferae Cyllenes,  
 Ætherium volucris qui pede carpit iter.  
 Arcades hunc, Ladonque rapax, et Mænalos ingens  
 Rite colunt, Luna credita terra prior. 90  
 Exsul ab Arcadiis Latios Evander in agros  
 Venerat, impositos attuleratque deos.  
 Hic, ubi nunc Roma est orbis caput, arbor et herbæ,  
 Et paucæ pecudes, et casa rara fuit.  
 Quo postquam ventum; Consistite, præscia mater, 95  
 Nam locus imperii rus erit istud, ait.  
 Et matri et vati paret Nonacrius heros,  
 Inque peregrina constitit hospes humo.  
 Sacraque multa quidem, sed Fauni prima bicornis  
 Has docuit gentes, alipedisque dei. 100  
 Semicaper, coleris cinctutis, Faune, Lupercis,  
 Cum lustrant celebres vellera secta vias.  
 At tu materno donasti nomine mensem,  
 Inventor curvæ, furibus apte, fidis.  
 Nec pietas hæc prima tua est: septena putaris, 105  
 Pleiadum numerum, fila dedisse lyræ.

- Hæc quoque desierat; laudata est voce sororum.  
 Quid faciam? turbæ pars habet omnis idem.  
 Gratia Pieridum nobis æqualiter adsit;  
 Nullaque laudetur plusve minusve mihi. 110
- Ab Jove surgat opus. Prima mihi nocte videnda  
 Stella est in cunas officiosa Jovis.  
 Nascitur Oleniæ signum pluviale Capellæ:  
 Illa dati cælum præmia lactis habet.  
 Nais Amalthea, Cretæa nobilis Ida, 115  
 Dicitur in sylvis occuluisse Jovem.  
 Huic fuit hædorum mater formosa duorum  
 Inter Dictæos conspicienda greges;  
 Cornibus aeriis, atque in sua terga recurvis;  
 Ubere, quod nutrix posset habere Jovis. 120  
 Lac dabat illa deo; sed fregit in arbore cornu,  
 Truncaque dimidia parte decoris erat.  
 Sustulit hoc Nymphæ, cinctumque recentibus herbis,  
 Et plenum pomis ad Jovis ora tulit.  
 Ille, ubi res cæli tenuit, solioque paterno 125  
 Sedit, et invicto nil Jove majus erat;  
 Sidera nutricem, nutricis fertile cornu  
 Fecit; quod dominæ nunc quoque nomen habet.  
 Præstitibus Maiæ Laribus videre Kalendæ  
 Aram constitui, signaque parva deûm. 130  
 Voverat illa quidem Curius: sed multa vetustas  
 Destruit, et saxo longa senecta nocet.  
 Causa tamen positi fuerat cognominis illis,  
 Quod præstant oculis omnia tuta suis.  
 Stant quoque pro nobis, et præsumt mœnibus Urbis, 135  
 Et sunt præsentés, auxiliumque ferunt.  
 At canis ante pedes, saxo fabricatus eodem,  
 Stabat. Quæ standi cum Lare caussa fuit?  
 Servat uterque domum: domino quoque fidus uterque:  
 Compita grata deo; compita grata cani. 140  
 Exagitant et Lar et turba Diania fures:  
 Pervigilantque Lares, pervigilantque canes.

- Bina gemellorum quærebam signa deorum,  
 Viribus annosæ facta caduca moræ:  
 Mille Lares, Geniumque ducis, qui tradidit illos, 145  
 Urbs habet; et vici numina trina colunt.  
 Quo feror? Augustus mensis mihi carminis hujus  
 Jus dabit. Interea Diva canenda Bona est.  
 Est moles nativa: loco res nomina fecit.  
 Appellant saxum: pars bona montis ea est. 150  
 Huic Remus institerat frustra, quo tempore fratri  
 Prima Palatinæ signa dedistis aves.  
 Tempa Patres illic, oculos exosa viriles,  
 Leniter acclivi constituere jugo.  
 Dedicat hæc veteris Clausorum nominis hæres, 155  
 Virgineo nullum corpore passa virum.  
 Livia restituit; ne non imitata maritum  
 Esset, et ex omni parte secuta virum.
- Postera cum roseam pulsas Hyperionis astris  
 In matutinis lampada tollit equis: 160  
 Frigidus Argestes summas mulcebit aristas,  
 Candidaque a Calabris vela dabuntur aquis.  
 At simul inducunt obscura crepuscula noctem,  
 Pars Hyadum toto de grege nulla latet.  
 Ora micant Tauri septem radiantia flammis, 165  
 Navita quas Hyadas Graius ab imbre vocat.  
 Pars Bacchum nutrisse putat: pars credidit esse  
 Tethyos has neptes, Oceanique senis.  
 Nondum stabat Atlas, humeros oneratus Olympo,  
 Cum satus est forma conspiciendus Hyas. 170  
 Hunc stirps Oceani maturis nisibus Æthra  
 Edidit, et Nymphas; sed prior ortus Hyas.  
 Dum nova lanugo, pavidos formidine cervos  
 Terret, et est illi præda benigna lepus.  
 At postquam virtus annis adolevit, in apros 175  
 Audet, et hirsutas cominus ire feras.  
 Dumque petit latebras fetæ catulosque lænæ,  
 Ipse fuit Libycæ præda cruenta feræ.

- Mater Hyan, et Hyan mæstæ flereve sorores,  
 Cervicemque polo suppositurus Atlas. 180
- Victus uterque parens tamen est pietate sororum.  
 Illa dedit cælum: nomina fecit Hyas.
- Mater, ades, florum, ludis celebranda jocosis:  
 Distuleram partes mense priore tuas. 7
- Incipis Aprili: transis in tempora Maii. 185  
 Alter te fugiens, cum venit alter, habet.
- Cum tua sint, cedantque tibi confinia mensum,  
 Convenit in laudes ille vel iste tuas.
- Circus in hunc exit, clamataque palma theatris:  
 Hoc quoque cum Circi munere carmen eat. 190
- Ipsa doce quæ sis: hominum sententia fallax.  
 Optima tu proprii nominis auctor eris.
- Sic ego; sic nostris respondit diva rogatis;  
 Dum loquitur, vernas efflat ab ore rosas:
- Chloris eram, quæ Flora vocor. Corrupta Latino 195  
 Nominis est nostri littera Græca sono.
- Chloris eram, Nymphæ campi felicis, ubi audis  
 Rem fortunatis ante fuisse viris.
- Quæ fuerit mihi forma, grave est narrare modestæ:  
 Sed generum matri reperit illa deum. 200
- Ver erat: errabam. Zephyrus conspexit; abibam:  
 Insequitur; fugio. Fortior ille fuit.
- Et dederat fratri Boreas jus omne rapinas,  
 Ausus Erechthea præmia ferre domo.
- Vim tamen emendat dando mihi nomina nuptæ: 205  
 Inque meo non est ulla querela toro.
- Vere fruor semper: vere est nitidissimus annus.  
 Arbor habet frondes, pabula semper humus.
- Est mihi fecundus dotalibus hortus in agris:  
 Aura fovet: liquidæ fonte rigatur aquæ. 210
- Hunc meus implevit generoso flore maritus:  
 Atque ait, Arbitrium tu, dea, floris habe.
- Sæpe ego digestos volui numerare colores,  
 Nec potui. Numero copia major erat.
- Roscida cum primum foliis excussa pruina est, 215  
 Et variæ radiis intepuere comæ;

Conveniunt pictis incinctæ vestibus Horæ,  
 Inque leves calathos munera nostra legunt.  
 Protinus arripiant Charites, nectuntque coronas,  
 Sertaque, coelestes implicitura comas. 220  
 Prima per immensas sparsi nova semina gentes :  
 > Unius tellus ante coloris erat.  
 Prima Therapsæo feci de sanguine florem :  
 Et manet in folio scripta querela suo.  
 Tu quoque nomen habes cultos, Narcisse, per hortos:  
 Infelix, quod non alter et alter eras! 226  
 Quid Crocon, aut Attin referam, Cinyraque creatum,  
 De quorum per me vulnere surgit honor?  
 Mars quoque, si nescis, per nostras editus artes.  
 Jupiter hoc ut adhuc nesciat, usque precor. 230  
 Sancta Jovem Juno, nata sine matre Minerva,  
 Officio doluit non eguisse suo.  
 Ibat, ut Oceano quereretur facta mariti;  
 Restitit ad nostras fessa labore fores.  
 Quam simul adspexi; Quid te, Saturnia, dixi, 235  
 Attulit? exponit, quem petat, illa locum.  
 Addidit et causam. Verbis solabar amicis.  
 Non, inquit, verbis cura levanda mea est,  
 Si pater est factus neglecto conjugis usu  
 Jupiter, et nomen solus utrumque tenet; 240  
 Cur ego desperem fieri sine conjuge mater,  
 Et parere intacto, dammodo casta, viro?  
 Omnia tentabo latis medicamina terris,  
 Et freta, Tartareos excutiamque sinus.  
 Vox erat in cursu: vultum dubitantis habebam. 245  
 Nescio quid, Nymphæ, posse videris, ait.  
 Ter volui promittere opem, ter lingua retenta est :  
 Ira Jovis magni causa timoris erat.  
 Fer, precor, auxilium, dixit; celabitur auctor :  
 Et Stygiæ numen testificatur aquæ. 250  
 Quod petis, Olenis, inquam, mihi missus ab arvis  
 Flos dabit. Est hortis unicus ille meis.  
 Qui dabat, Hoc, dixit, sterilem quoque tange juvencam ;  
 Mater erit. Tetigi; nec mora, mater erat.



- Protinus hærentem decerpsi pollice florem. 255  
 Tangitur, et tacto concipit illa sinu.  
 Jamque gravis Thracen, et læva Propontidos intrat:  
 Fitque potens voti; Marsque creatus erat.  
 Qui memor accepti per me natalis, Habeto  
 Tu quoque Romulea, dixit, in urbe locum. 260  
 Forsitan in teneris tantum mea regna coronis  
 Esse putes. Tangunt numen et arva meum.  
 Si bene floruerint segetes, erit area dives.  
 Si bene floruerit vinea, Bacchus erit.  
 Si bene floruerint oleæ, nitidissimus annus: 265  
 Pomaque proventum temporis hujus habent.  
 Flore semel læso pereunt viciæque fabæque,  
 Et pereunt lentæ, advena Nile, tuæ.  
 Vina quoque in magnis operose condita cellis  
 Florent; et nebulæ dolia summa tegunt. 270  
 Mella meum munus. Volucres ego mella daturas  
 Ad violam, et cytisos, et thyma cana voco.  
 Nos quoque idem facimus, tunc cum juvenilibus annis  
 Luxuriant animi, corporaque ipsa vigent.  
 Talia dicentem tacitus mirabar. At illa, 275  
 Jus tibi discendi, si qua requiris, ait.  
 Dic, dea, ludorum, respondi, quæ sit origo.  
 Vix bene desieram; rettulit illa mihi.  
 Cætera luxuriæ nondum instrumenta vigeabant;  
 Aut pecus, aut latam dives habebat humum. 280  
 Hinc etiam locuples, hinc ipsa pecunia dicta est.  
 Sed jam de vetito quisque parabat opes.  
 Venerat in morem populi depascere saltus:  
 Idque diu licuit, pœnaque nulla fuit.  
 Vindice servabat nullo sua publica vulgus: 285  
 Jamque in privato pascere inertis erat.  
 Plebis ad ædiles delata licentia talis  
 Publicios: animus defuit ante viris.  
 Rem populus recipit: mulctam subiere nocentes.  
 Vindicibus laudi publica cura fuit. 290  
 Muleta data est ex parte mihi: magnoque favore  
 Victores ludos instituere novos.

- Parte locant clivum, qui tunc erat ardua rupes.  
 Utile nunc iter est, Publiciumque vocant.  
 Annua credideram spectacula facta: negavit: 295  
 Addidit et dictis altera verba suis.  
 Nos quoque tangit honos: festis gaudemus et aris,  
 Turbaque cœlestes ambitiosa sumus.  
 Sæpe deos aliquis peccando fecit iniquos,  
 Et pro delictis hostia blanda fuit. 300  
 Sæpe Jovem vidi, cum jam sua mittere vellet  
 Fulmina, thure dato sustinuisse manum.  
 At si negligimur, magnis injuria pœnis  
 Solvitur, et justum præterit ira modum.  
 Respice Thestiaden; flammis absentibus arsit. 305  
 Causa est, quod Phœbes ara sine igne fuit.  
 Respice Tantaliden; eadem dea vela tenebat.  
 Virgo est; et spretos bis tamen ulta focos.  
 Hippolyte infelix, velles coluisse Dionen,  
 Cum consternatis diripereris equis! 310  
 Longa referre mora est correctæ obliviam damnis.  
 Me quoque Romani præteriere patres.  
 Quid facerem? per quod fierem manifesta doloris?  
 Exigerem nostræ qualia damna notæ?  
 Excidit officium tristi mihi. Nulla tuebar 315  
 Bura, nec in pretio fertilis hortus erat.  
 Lilia deciderant: violas arere videres,  
 Filaque punicei languida facta croci.  
 Sæpe mihi Zephyrus, Dotes corrumpere noli  
 Ipsa tuas, dixit: dos mihi vilis erat. 320  
 Florebant oleæ: venti nocuere protervi.  
 Florebant segetes; grandine læsa Ceres.  
 In spe vitis erat; cœlum nigrescit ab Austris,  
 Et subita frondes decutiuntur aqua.  
 Nec volui fieri, nec sum crudelis in ira: 325  
 Cura repellendi sed mihi nulla fuit.  
 Convenerunt patres: et, si bene floreat annus,  
 Numinibus nostris annua festa vovent.  
 Annuimus voto. Consul cum consule ludos  
 Postumio Lænas persolvere mihi. 330

Quærere conabar, quare lascivia major  
 His foret in ludis, liberiorque jocus:  
 Sed mihi succurrit, numen non esse severum,  
 Aptaque deliciis munera ferre deam.  
 Tempora sutilibus cinguntur tota coronis, 335  
 Et latet injecta splendida mensa rosa.  
 Ebrius incinctis philyra conviva capillis  
 Saltat, et imprudens vertitur arte meri.  
 Ebrius ad durum formosæ limen amicæ  
 Cantat. Habent unctæ mollia sarta comæ. 340  
 Nulla coronata peraguntur seria fronte;  
 Nec liquidæ vinctis flore bibuntur aquæ.  
 Donec eras mistus nullis, Acheloe, racemis,  
 Gratia sumendæ non erat ulla rosæ.  
 Bacchus amat flores: Baccho placuisse coronam, 345  
 Ex Ariadnæo sidere nosse potes.  
 Scena levis decet hanc; non est, mihi credite, non est  
 Illa cothurnatas inter habenda deas.  
 Turba quidem cur hos celebret meretricia ludos,  
 Non ex difficili causa petita subest. 350  
 Non est de tetricis, non est de magna professis:  
 Vult sua plebeio sacra patere choro.  
 Et monet ætatis specie, dum floreat, uti;  
 Contemni spinam, cum cecidere rosæ.  
 Cur tamen, ut dantur vestes Cerealibus albæ, 355  
 Sic hæc est cultu versicolore decens?  
 An quia maturis albescit messis aristis,  
 Et color et species floribus omnis inest?  
 Annuit; et motis flores cecidere capillis:  
 Accidere in mensas ut rosa missa solet. 360  
 Lumina restabant; quorum me causa latebat,  
 Cum sic errores abstulit illa meos.  
 Vel quia purpureis collucent floribus agri,  
 Lumina sunt nostros visa decere dies:  
 Vel quia nec flos est hebeti, nec flamma, colore, 365  
 Atque oculos in se splendor uterque trahit:  
 Vel quia deliciis nocturna licentia nostris  
 Convenit. A vero tertia causa venit.

- Est breve præterea, de quo mihi quærere restat,  
Si liceat, dixi. Dixit et illa, Licet. 370
- Cur tibi pro Libycis clauduntur rete lænis  
Imbelles capræ, sollicitusque lepus?  
Non sibi, respondit, sylvas cessisse, sed hortos,  
Arvaque pugnaci non adeunda feræ.
- Omnia finierat: tenues secessit in auras. 375  
Mansit odor: posses scire fuisse deam.  
Floreat ut toto carmen Nasonis in ævo,  
Sparge, precor, donis pectora nostra tuis.
- Nocte minus quarta promet sua sidera Chiron  
Semivir, et flavi corpore mixtus equi. 380  
Pelion Hæmonia mons est obversus in Austros:  
Summa virent pinu: cætera quercus habet.  
Phillyrides tenuit. Saxo stant antra vetusto,  
Quæ justum memorant incoluisse senem.  
Ille manus, olim missuras Hectora leto, 385  
Creditur in lyricis detinuisse modis.  
Venerat Alcides exacta parte laborum;  
Jussaque restabant ultima pæne viro.  
Stare simul casu Trojæ duo fata videres:  
Hinc puer Æacides, hinc Jove natus erat. 390  
Excipit hospitio juvenem Philyreius heros:  
Et causam adventus hic rogat, ille docet.  
Perspicit interea clavam spoliūque leonis:  
Virque, ait, his armis, armaque digna viro!  
Nec se, quin horrens auderent tangere setis 395  
Vellus, Achilleæ continuere manus.  
Dumque senex tractat squalentia tela venenis,  
Excidit, et lævo fixa sagitta pede est.  
Ingemuit Chiron, traxitque e corpore ferrum:  
Et gemit Alcides, Hæmoniusque puer. 400  
Ipse tamen lectas Pagasæis collibus herbas  
Temperat, et varia vulnera mulcet ope.  
Virus edax superabat opem: penitusque recepta  
Ossibus, et toto corpore pestis erat.  
Sanguine Centauri Lernææ sanguis Echidnæ 405  
Mixtus ad auxilium tempora nulla dabat.

Stabat, ut ante patrem, lacrymis perfusus Achilles:

Sic flendus Peleus, si moreretur, erat.

Sæpe manus ægras manibus fingebat amicis;

Morum, quos fecit, præmia doctor habet. 410

Oscula sæpe dedit; dixit quoque sæpe jacenti,

Vive, precor, nec me, care, relinque, pater.

Nona dies aderat; cum tu, justissime Chiron,

Bis septem stellis corpora cinctus eras.

Hunc Lyra curva sequi cuperet; sed idonea nondum

Est via. Nox aptum tertia tempus erit. 416

Scorpius in cælo, cum cras lucescere Nonas

Dicimus, a media parte notandus erit.

Hinc ubi protulerit formosa ter Hesperus ora,

Ter dederint Phœbo sidera victa locum; 420

Ritus erit veteris, nocturna Lemuria, sacri;

Inferias tacitis Manibus illa dabunt.

Annus erat brevior; nec adhuc pia februa norant,

Nec tu dux mensum, Jane biformis, eras.

Jam tamen extincto cineri sua dona ferebant, 425

Compositique nepos busta piabat avi.

Mensis erat Maius, majorum nomine dictus,

Qui partem prisca nunc quoque moris habet.

Nox ubi jam media est, somnoque silentia præbet,

Et canis, et variæ conticuistis aves; 430

Ille memor veteris ritus, timidusque deorum,

Surgit: habent gemini vincula nulla pedes.

Signaque dat digitis medio cum pollice junctis,

Occurrat tacito ne levis umbra sibi.

Terque manus puras fontana perluit unda; 435

Vertitur, et nigras accipit ore fabas:

Aversusque jacet: sed dum jacet, Hæc ego mitto;

His, inquit, redimo meque meosque fabis.

Hoc novies dicit, nec respicit. Umbra putatur

Colligere, et nullo terga vidente sequi. 440

Rursus aquam tangit, Temesæaque concrepat æra:

Et rogat, ut tectis exeat umbra suis.

- Cum dixit novies, Manes exite paterni;  
 Respicit, et pure sacra peracta putat.  
 Dicta sit unde dies, quæ nominis exstet origo, 445  
 Me fugit. Ex aliquo est invenienda deo.  
 Pleiade nate, mone, virga venerande potenti:  
 Sæpe tibi Stygii regia visa Jovis.  
 Venit adoratus Caducifer. Accipe causam  
 Nominis; ex ipso cognita causa deo est. 450  
 Romulus ut tumulto fraternas condidit umbras,  
 Et male veloci justa soluta Remo;  
 Faustulus infelix, et passis Acca capillis  
 Spargebant lacrymis ossa perusta suis.  
 Inde domum redeunt sub prima crepuscula mæsti, 455  
 Utque erat, in duro procubuerè toro.  
 Umbra cruenta Remi visa est adsistere lecto,  
 Atque hæc exiguo murmure verba loqui:  
 En ego dimidium vestri parsque altera voti,  
 Cernite, sim qualis; qui modo qualis eram! 460  
 Qui modo, si volucres habuissem regna jubentes,  
 In populo potui maximus esse meo.  
 Nunc elapsa rogi flammis, et inanis imago,  
 Hæc est ex illo forma relicta Remo.  
 Heu ubi Mars pater est? si vos modo vera locuti, 465  
 Uberaque expositis ille ferina dedit.  
 Quem lupa servavit, manus hunc temeraria civis  
 Perdidit. O quanto mitior illa fuit!  
 Sæve Celer, crudelem animam per vulnera reddas:  
 Utquæ ego, sub terras sanguinolentus eas. 470  
 Noluit hoc frater. Pietas æqualis in illo est.  
 Quod potuit, lacrymas in mea fata dedit.  
 Hunc vos per lacrymas, per vestra alimenta rogate,  
 Ut celebrem festo signet honore diem.  
 Mandantem amplecti cupiunt, et brachia tendunt: 475  
 Lubrica prensantes effugit umbra manus.  
 Ut secum fugiens somnos abduxit imago,  
 Ad regem voces fratris uterque ferunt.  
 Romulus obsequitur, lucemque Remuria dixit  
 Illam, qua positis justa feruntur avis. 480

Aspera mutata est in lenem tempore longo  
 Littera, quæ toto nomine prima fuit.  
 Mox etiam Lemures animas dixere silentum;  
 Is verbi sensus, vis ea vocis erat.  
 Fana tamen veteres illis clausere diebus, 485  
 Ut nunc ferali tempore aperta vides.  
 Nec viduæ tædis eadem, nec virginis apta  
 Tempora. Quæ nupsit, non diuturna fuit.  
 Hac quoque de causa, si te proverbia tangunt,  
 Mense malas Maio nubere vulgus ait. 490  
 Sed tamen hæc tria sunt sub eodem tempore festa  
 Inter se nullo continuata die.

Quorum si mediis Bœotum Oriona quæres,  
 Falsus eris. Signi causa canenda mihi.  
 Jupiter, et lato qui regnat in æquore frater, 495  
 Carpebant socias, Mercuriusque, vias.  
 Tempus erat, quo versa jugo referuntur aratra,  
 Et pronum saturæ lac bibit agnus ovis.  
 Forte senex Hyrieus, angusti cultor agelli,  
 Hos videt, exiguam stabat ut ante casam. 500  
 Atque ita, Longa via est, nec tempora longa supersunt,  
 Dixit, et hospitibus janua nostra patet.  
 Addidit et vultum verbis, iterumque rogavit.  
 Parent promissis; dissimulantque deos.  
 Tecta senis subeunt, nigro deformia fumo: 505  
 Ignis in extremo stipite parvus erat.  
 Ipse genu posito flammam exsuscitat aura,  
 Et promit quassas comminuitque faces.  
 Stant calices: minor inde fabas, olus alter habebant:  
 Et fumant testu pressus uterque suo. 510  
 Dumque mora est, tremula dat vina rubentia dextra.  
 Accipit æquoreus pocula prima deus.  
 Quæ simul exhaustit; Da, nunc bibat ordine, dixit,  
 Jupiter. Audito palluit ille Jove.  
 Ut rediit animus; cultorem pauperis agri 515  
 Immolat, et magno torret in igne bovem.

- Quæque puer quondam primis diffuderat annis,  
 Prodit fumoso condita vina cado.
- Nec mora: flumineam lino celantibus ulvam,  
 Sic quoque non altis, incubuere toris. 520
- Nunc dape, nunc posito mensæ nituere Lyæo.  
 Terra rubens crater, pocula fagus erant.
- Verba fuere Jovis; Si quid fert impetus, opta:  
 Omne feres. Placidi verba fuere senis:  
 Cara fuit conjux, prima mihi cara juvena 525  
 Cognita: nunc ubi sit quæritis? urna tegit.
- Huic ego juratus, vobis in verba vocatis,  
 Conjugio, dixi, sola fruire meo.
- Et dixi, et servo. Sed enim diversa voluntas  
 Est mihi: nec conjux, et pater esse volo. 530
- Annuerunt omnes: omnes ad terga juvenci  
 Constiterant. Pudor est ulteriora loqui.  
 Tum superinjecta texere madentia terra.  
 Jamque decem menses, et puer ortus erat.
- Hunc Hyrieus, quia sic genitus, vocat Uriona. 535  
 Perdedit antiquum littera prima sonum.
- Creverat immensum: comitem sibi Delia sumsit;  
 Ille deæ custos, ille satelles erat.
- Verba movent iras non circumspecta deorum.  
 Quam nequeam, dixit, vincere, nulla fera est. 540
- Scorpion immisit Tellus. Fuit impetus illi  
 Curva gemelliparæ spicula ferre deæ.
- Obstitit Orion. Latona nitentibus astris  
 Addidit, et, Meriti præmia, dixit, habe.
- Sed quid et Orion, et cætera sidera mundo 545  
 Cedere festinant, noxque coarctat iter?  
 Quid solito citius liquido jubar æquore tollit  
 Candida, Lucifero præveniente, dies?  
 Fallor? an arma sonant? non fallimur: arma sonabant.  
 Mars venit; et veniens bellica signa dedit. 550
- Ultor ad ipse suos cælo descendit honores,  
 Templaque in Augusto conspicienda Foro.



Et deus est ingens, et opus. Debebat in urbe  
 Non aliter nati Mars habitare sui.  
 Digna giganteis hæc sunt delubra tropæis: 555  
 Hinc fera Gradivum bella movere decet:  
 Seu quis ab Eoo nos impius orbe lacesset,  
 Seu quis ab occiduo sole domandus erit.  
 Prospicit Armipotens operis fastigia summi,  
 Et probat invictos summa tenere deos. 560  
 Prospicit in foribus diversæ tela figuræ,  
 Armaque terrarum milite victa suo.  
 Hinc videt Ænean oneratum pondere sacro,  
 Et tot Iuleæ nobilitatis avos.  
 Hinc videt Iliaden humeris ducis arma ferentem, 565  
 Claraque dispositis acta subesse viris.  
 Spectat et Augusto prætextum nomine templum,  
 Et visum, lecto Cæsare, majus opus.  
 Voverat hoc juvenis tunc, cum pia sustulit arma.  
 A tantis Princeps incipiendus erat. 570  
 Ille manus tendens, hinc stanti milite justo,  
 Hinc conjuratis, talia dicta dedit;  
 Si mihi bellandi pater est, Vestæque sacerdos  
 Auctor, et ulcisci numen utrumque paro;  
 Mars, ades, et satia scelerato sanguine ferrum: 575  
 Stetque favor causa pro meliore tuus.  
 Templa feres, et, me victore, vocaberis Ultor.  
 Voverat; et fuso lætus ab hoste redit.  
 Nec satis est meruisse semel cognomina Marti:  
 Persequitur Parthi signa retenta manu. 580  
 Gens fuit et campis, et equis, et tuta sagittis,  
 Et circumfuis in via fluminibus.  
 Addiderant animos Crassorum funera genti;  
 Cum periit miles, signaque, duxque simul.  
 Signa, decus belli, Parthus Romana tenebat, 585  
 Romanæque aquilæ signifer hostis erat.  
 Isque pudor mansisset adhuc, nisi fortibus armis  
 Cæsaris Ansoniæ protegerentur opes.  
 Ille notas veteres, et longi dedecus ævi  
 Sustulit. Agnorunt signa recepta suos. 590

Quid tibi nunc solitæ mitti post terga sagittæ,  
 Quid loca, quid rapidi profuit usus equi?  
 Parthe, refers aquilas: victos quoque porrigis arcus.  
 Pignora jam nostri nulla pudoris habes.  
 Rite deo templumque datum, nomenque bis ulto; 595  
 Et meritis votis debita solvit honos.  
 Sollennes ludos Circo celebrate, Quirites:  
 Non visa est fortem scena decere deum.

Pleiadas adspicies omnes, totumque sororum  
 Agmen, ubi ante Idus nox erit una super. 600  
 Tum mihi non dubiis auctoribus incipit æstas,  
 Et tepidi finem tempora veris habent.

Idibus ora prior stellantia tollere Taurum  
 Indicat: huic signo fabula nota subest.  
 Præbuit, ut taurus, Tyriæ sua terga puellæ 605  
 Jupiter, et falsa cornua fronte tulit;  
 Illa jubam dextra, læva retinebat amictus;  
 Et timor ipse novi causa decoris erat.  
 Aura sinus implet: flavos movet aura capillos;  
 Sidoni, sic fueras adspicienda Jovi. 610  
 Sæpe puellares subducit ab æquore plantas,  
 Et metuit tactus assilientis aquæ:  
 Sæpe deus prudens tergum demittit in undas,  
 Hæreat ut collo fortius illa suo.  
 Littoribus tactis stabat sine cornibus ullis 615  
 Jupiter, inque deum de bove versus erat.  
 Taurus init cælum. Te, Sidoni, Jupiter implet:  
 Parsque tuum terræ tertia nomen habet.  
 Hoc alii signum Phariam dixere juvencam,  
 Quæ bos ex homine est, ex bove facta dea. 620  
 Tum quoque priscorum virgo simulacra virorum  
 Mittere roboreo scirpea ponte solet.  
 Corpora post decies senos qui credidit annos  
 Missa neci, sceleris crimine damnat avos.  
 Fama vetus: tum cum Saturnia terra vocata est, 625  
 Talia fatidici dicta fuere dei:

Falcifero libata seni duo corpora, gentes,  
 Mittite, quæ Tuscis excipiantur aquis.  
 Donec in hæc venit Tiryntius arva, quotannis  
 Tristia Leucadio sacra peracta modo. 630  
 Illum stramineos in aquam misisse Quirites;  
 Herculis exemplo corpora falsa jaci.  
 Pars putat, ut ferrent juvenes suffragia soli,  
 Pontibus infirmos præcipitasse senes.  
 Tibri, doce verum: tua ripa vetustior Urbe. 635  
 Præcipium ritus tu bene nosse potes.  
 Tibris arundiferum medio caput extulit alveo,  
 Raucaque dimovit talibus ora sonis:  
 Hæc loca desertas vidi sine mœnibus herbas:  
 Pascebat sparsos utraque ripa boves. 640  
 Et quem nunc gentes Tiberin noruntque timentque,  
 Tunc etiam pecori despiciendus eram.  
 Arcadis Evandri nomen tibi sæpe refertur:  
 Ille meas remis advena torsit aquas.  
 Venit et Alcides turba comitatus Achiva. 645  
 Albula, si memini, tunc mihi nomen erat.  
 Excipit hospitio juvenem Pallantius heros:  
 Et tandem Caco debita pœna venit.  
 Victor abit, secumque boves, Erytheida prædam,  
 Abstrahit. At comites longius ire negant. 650  
 Magnaque pars horum desertis venerat Argis:  
 Montibus his ponunt spemque Laremque suum.  
 Sæpe tamen patriæ dulci tanguntur amore,  
 Atque aliquis moriens hoc breve mandat opus:  
 Mittite me in Tiberin; Tiberinis vectus ut undis 655  
 Littus ad Inachium pulvis inanis eam.  
 Displicet hæredi mandati cura sepulcri;  
 Mortuus Ausonia conditur hospes humo.  
 Scirpea pro domino in Tiberin jactatur imago,  
 Ut repetat Graias per freta longa domos. 660  
 Hactenus: ut vivo subiit rorantia saxo  
 Antra, leves cursum sustinuistis aqua.

- Clare nepos Atlantis, ades, quem montibus olim  
 Edidit Arcadiis Pleiās una Jovi;
- Pacis et armorum superis imisque deorum 665  
 Arbiter, alato qui pede carpis iter;
- Læte lyræ pulsu, nitida quoque læte palæstra:  
 Quo didicit culte lingua favente loqui.
- Templa tibi posuere patres spectantia Circum 670  
 Idibus. Ex illo est hæc tibi festa dies.
- Te, quicumque suas profitetur vendere merces,  
 Thure dato, tribuas ut sibi lucra, rogat.
- Est aqua Mercurii portæ vicina Capenæ:  
 Si juvat expertis credere, numen habet.
- Huc venit incinctus tunicas mercator, et urna 675  
 Purus suffita, quam ferat, haurit aquam.
- Uda fit hinc laurus: lauro sparguntur ab uda  
 Omnia, quæ dominos sunt habitura novos.
- Spargit et ipse suos lauro rorante capillos,  
 Et peragit solita fallere voce preces. 680
- Ablue præteriti perjuriam temporis, inquit;  
 Ablue præterita perfida verba die.
- Sive ego te feci testem, falsove citavi  
 Non audituri numina magna Jovis;
- Sive deum prudens alium divamve fefelli; 685  
 Abstulerint celeres improba dicta Noti.
- Et pereant veniente die perjuriam nobis;  
 Nec curent superi, si qua locutus ero.
- Da modo lucra mihi, da facto gaudia lucro;  
 Et face, ut emtori verba dedisse juvet. 690
- Talia Mercurius poscentem ridet ab alto,  
 Se memor Ortygias surripuisse boves.
- At mihi pande, precor, tanto meliora petenti,  
 In Geminos ex quo tempore Phœbus eat.
- Cum totidem de mense dies superesse videbis, 695  
 Quot sunt Herculei facta laboris, ait.
- Dic, ego respondi, causam mihi sideris hujus.  
 Causam facundo prodidit ore deus:

- Abstulerant raptas Phœben Phœbesque sororem  
 Tyndaridæ fratres, hic eques, ille pugil. 700  
 Bella parant, repetuntque suas et frater et Idas,  
 Leucippo fieri pactus uterque gener.  
 His amor, ut repetant, illis, ut reddere nolint,  
 Suadet; et ex causa pugnat uterque pari.  
 Effugere CEBalidæ cursu potuere sequentes; 705  
 Sed visum celeri vincere turpe fuga.  
 Liber ab arboribus locus est, apta area pugnæ.  
 Constiterant illic: nomen Aphidna loco.  
 Pectora trajectus Lynceo Castor ab ense  
 Non expectato vulnere pressit humum. 710  
 Ultor adest Pollux, et Lyncea perforat hasta,  
 Qua cervix humeros continuata premit.  
 Ibat in hunc Idas, vixque est Jovis igne repulsus:  
 Tela tamen dextræ fulmine rapta negant.  
 Jamque tibi cœlum, Pollux, sublime patebat; 715  
 Cum, Mea, dixisti, percipe verba, Pater.  
 Quod mihi das uni, cœlum partire duobus:  
 Dimidium toto munere majus erit.  
 Dixit, et alterna fratrem statione redemit:  
 Utile sollicitæ sidus uterque rati. 720  
 Ad Janum redeat, qui quærit, Agonia quid sint;  
 Quæ tamen in fastis hoc quoque tempus habent.  
 Nocte sequente diem canis Erigoneius exit.  
 Est alio signi reddita causa loco.  
 Proxima Vulcani lux est; Tubilustria dicunt. 725  
 Lustrantur puræ, quas facit ille, tubæ.  
 Quatuor inde notis locus est; quibus ordine lectis  
 Vel mos sacrorum, vel Fuga Regis inest.  
 Nec te prætereo, populi Fortuna potentis  
 Publica, cui templum luce sequente datum. 730  
 Hanc ubi dives aquis acceperit Amphitrite,  
 Grata Jovi fulvæ rostra videbis avis.  
 Auferet ex oculis veniens Aurora Boöten:  
 Continuaque die sidus Hyantis erit.

## LIBER SEXTUS.

Hic quoque mensis habet dubias in nomine causas :  
Quæ placeant, positis omnibus, ipse leges.  
Facta canam; sed erunt, qui me finxisse loquantur,  
Nullaque mortali numina visa putent.  
Est deus in nobis: agitante calescimus illo. 5  
Impetus hic sacræ semina mentis habet.  
Fas mihi præcipue vultus vidisse deorum;  
Vel quia sum vates; vel quia sacra cano.  
Est nemus arboribus densum, secretus ab omni  
Voce locus, si non obstreperetur aquis. 10  
Hic ego quærebam, cœpti quæ mensis origo  
Esset, et in cura nominis hujus eram.  
Ecce deas vidi; non quas præceptor arandi  
Viderat, Ascræas cum sequeretur oves;  
Nec quas Priamides in aquosæ vallibus Idæ 15  
Contulit: ex illis sed tamen una fuit.  
Ex illis fuit una, sui germana mariti.  
Hæc erat, agnovi, quæ stat in arce Jovis.  
Horrueram, tacitoque animum pallore fatebar;  
Cum dea, quos fecit, sustulit ipsa metus. 20  
Namque ait: O vates, Romani conditor anni,  
Ause per exiguos magna referre modos;  
Jus tibi fecisti numen cœleste videndi,  
Cum placuit numeris condere festa. tuis.  
Ne tamen ignores, vulgique errore traharis; 25  
Junius a nostro nomine nomen habet.  
Est aliquid nupsisse Jovi, Jovis esse sororem.  
Fratre magis, dubito, glorier, anne viro.  
Si genus adspicitur, Saturnum prima parentem  
Feci. Saturni sors ego prima fui. 30

- A patre dicta meo quondam Saturnia Roma est:  
 Hæc illi a cœlo proxima terra fuit.
- Si torus in pretio est, dicor matrona Tonantis;  
 Junctaque Tarpeio sunt mea templa Jovi.
- An potuit Maio pellex dare nomina mensi? 35  
 Hic honor in nobis invidiosus erit?  
 Cur igitur regina vocor, princepsque dearum?  
 Aurea cur dextræ sceptrâ dedere mæs?
- An faciant mensem lucea, Lucinaque ab illis  
 Dicar, et a nullo nomina mense traham? 40  
 Tum me pœniteat posuisse fideliter iras  
 In genus Electræ, Dardaniamque domum.
- Causa duplex iræ. Rapto Ganymede dolebam;  
 Forma quoque Idæo iudice victa mea est.
- Pœniteat, quod non foveo Carthaginis arces; 45  
 Cum mea sint illo currus et arma loco.  
 Pœniteat Sparten, Argosque, measque Mycenas,  
 Et veterem Latio supposuisse Samon.
- Adde senem Tatium, Junonicolasque Faliscos,  
 Quos ego Romanis succubuisse tuli. 50  
 Sed neque pœniteat; nec gens mihi carior ulla est.  
 Hic colar, hic teneam cum Jove templa meo.
- Ipse mihi Mavors, Commendo mœnia, dixit,  
 Hæc tibi: tu pollens urbe nepotis eris.
- Dicta fides sequitur. Centum celebramur in aris: 55  
 Nec levior quovis est mihi mensis honor.  
 Nec tamen hunc nobis tantummodo præstat honorem  
 Roma: suburbani dant mihi munus idem.
- Inspice, quos habeat nemoralis Aricia fastos,  
 Et populus Laurens, Lanuviumque meum: 60  
 Est illic mensis Junonius. Inspice Tibur,  
 Et Prænestinæ mœnia sacra deæ:
- Junonale leges tempus. Nec Romulus illas  
 Condidit; at nostri Roma nepotis erat.
- Finierat Juno. Respeximus. Herculis uxor 65  
 Stabat; et in vultu signa dolentis erant.  
 Non ego, si toto mater me cedere cœlo  
 Jusserit, invita matre morabor, ait.

- Nunc quoque non luctor de nomine temporis hujus.  
 Blandior, et partes pæne rogantis ago; 70  
 Remque mei juris malim tenuisse precando:  
 Et faveas causæ forsitan ipse meæ.  
 Aurea possedit socio Capitolia templo  
 Mater, et ut debet, cum Jove summa tenet.  
 At decus omne mihi contingit origine mensis. 75  
 Unicus est, de quo sollicitamur, honor.  
 Quid grave, si titulum mensis, Romane, dedisti  
 Herculis uxori, posteritasque memor?  
 Hæc quoque terra aliquid debet mihi nomine magni  
 Conjugis. Huc captas appulit ille boves. 80  
 Hic male defensus flammis et dote paterna  
 Cacus Aventinam sanguine tinxit humum.  
 Ad propiora vocor. Populum digessit ab annis  
 Romulus, in partes distribuitque duas.  
 Hæc dare consilium, pugnare paratior illa est: 85  
 Hæc ætas bellum suadet, at illa gerit.  
 Sic statuit, mensesque nota secrevit eadem.  
 Junius est juvenum; qui fuit ante, senum.  
 Dixit; et in litem studio certaminis issent;  
 Atque ira pietas dissimulata foret. 90  
 Venit Apollinea longas Concordia lauro  
 Nexa comas, placidi numen opusque Ducis.  
 Hæc ubi narravit Tatium, fortemque Quirinum,  
 Binaque cum populis regna coisse suis;  
 Et lare communi soceros generosque receptos; 95  
 His nomen junctis Junius, inquit, habet.  
 Dicta triplex causa est. At vos ignoscite, divæ:  
 Res est arbitrio non dirimenda meo.  
 Ite pares a me. Perierunt iudice formæ  
 Pergama: plus lædunt, quam juvet una, duæ. 100  
 Prima dies tibi, Carna, datur. Dea cardinis hæc est.  
 Numine clausa aperit, claudit aperta suo.  
 Unde datas habeat vires, obscurior ævo  
 Fama; sed e nostro carmine certus eris.  
 Adjacet antiqui Tiberino lucus Helerni: 105  
 Pontifices illuc nunc quoque sacra ferunt.



Inde sata est Nymphæ, Cranen dixere priores,  
 Nequicquam multis sæpe petita procis.  
 Rura sequi, jaculisque feras agitare solebat,  
 Nodosasque cava tendere valle plagas. 110  
 Non habuit pharetram; Phœbi tamen esse sororem  
 Credebant. Nec erat, Phœbe, pudenda tibi.  
 Huic aliquis juvenum dixisset amantia verba;  
 Reddebat tales protinus illa sonos:  
 Hæc loca lucis habent nimis, et cum luce pudoris. 115  
 Si secreta magis ducis in antra, sequor.  
 Credulus antra subit. Frutices hæc nacta resistit,  
 Et latet, et nullo est invenienda loco.  
 Viderat hanc Janus; visæque cupidine captus  
 Ad duram verbis mollibus usus erat. 120  
 Nympha jubet quæri de more remotius antrum;  
 Utque comes sequitur, destituitque ducem.  
 Stulta, videt Janus, quæ post sua terga gerantur.  
 Nil agis, en! latebras respicit ille tuas.  
 Nil agis, en! dixi. Nam te sub rupe latentem 125  
 Occupat amplexu; speque potitus ait:  
 Jus pro concubitu nostro tibi cardinis esto.  
 Hoc pretium positæ virginitatis habe.  
 Sic fatus, virgam, qua tristes pellere posset  
 A foribus noxas (hæc erat alba) dedit. 130  
 Sunt avidæ volucres; non quæ Phineia mensis  
 Gutturæ fraudabant; sed genus inde trahunt.  
 Grande caput, stantes oculi, rostra apta rapinæ:  
 Canities pennis, unguibus hamus inest.  
 Nocte volant, puerosque petunt nutricis egentes, 135  
 Et vitiant cunis corpora rapta suis.  
 Carpere dicuntur lactentia viscera rostris,  
 Et plenum potō sanguine guttur habent.  
 Est illis strigibus nomen: sed nominis hujus  
 Causa, quod horrenda stridere nocte solent. 140  
 Sive igitur nascuntur aves, seu carmine fiunt,  
 Næniaque in volucres Marsa figurat anus;  
 In thalamos venere Procæ. Proca natus in illis  
 Præda recens avium quinque diebus erat.

- Pectoraque exsorbent avidis infantia linguis. 145  
 At puer infelix vagit, opemque petit.  
 Territa voce sui nutrix accurrit alumni,  
 Et rigido sectas invenit ungue genas.  
 Quid faceret? color oris erat, qui frondibus olim  
 Esse solet seris, quas nova læsit hiems. 150  
 Pervenit ad Cranen, et rem docet. Illa, Timorem  
 Pone; tuus sospes, dixit, alumnus erit.  
 Venerat ad cunas: flebant materque paterque:  
 Sistite vos lacrymas, ipsa medebor, ait.  
 Protinus arbutea postes ter in ordine tangit 155  
 Fronde; ter arbutea limina fronde notat.  
 Spargit aquis aditus, (et aquæ medicamen habebant,)  
 Extaque de porca cruda bimestre tenet.  
 Atque ita, Noctis aves, extis puerilibus, inquit,  
 Parcite: pro parvo victima parva cadit. 160  
 Cor pro corde, precor, pro fibris sumite fibras.  
 Hanc animam vobis pro meliore damus.  
 Sic ubi libavit, prosecta sub æthere ponit,  
 Quique sacris adsunt, respicere illa vetat.  
 Virgaque Janalis de spina ponitur alba, 165  
 Qua lumen thalamis parva fenestra dabat.  
 Post illud nec aves cunas violasse feruntur;  
 Et rediit puero, qui fuit ante, color.  
 Pinguis cur illis gustentur larda Kalendis,  
 Mixtaque cum calido sit faba farre, rogas? 170  
 Prisca dea est, aliturque cibus, quibus ante solebat;  
 Nec petit adscitas luxuriosa dapes.  
 Piscis adhuc illi populo sine fraude natabat:  
 Ostreaque in conchis tuta fuere suis.  
 Nec Latium norat, quam præbet Ionia dives, 175  
 Nec, quæ Pygmæo sanguine gaudet, avem:  
 Et præter pennas nihil in pavone placebat:  
 Nec tellus captas miserat ante feras.  
 Sus erat in pretio: cæssa sue festa colebant.  
 Terra fabas tantum, duraque farrâ dabat. 180  
 Quæ duo mixta simul sextis quicumque Kalendis  
 Ederit, huic lædi viscera posse negant.

- Arce quoque in summa Junoni templa Monetæ  
 Ex voto memorant facta, Camille, tuo.  
 Ante domus Manli fuerat, qui Gallica quondam 185  
 A Capitolino reppulit arma Jove.  
 Quam bene, di magni! pugna cecidisset in illa  
 Defensor solii, Jupiter alte, tui!  
 Vixit, ut occideret damnatus crimine regni.  
 Hunc illi titulum longa senecta dabat. 190  
 Lux eadem Marti festa est, quem prospicit extra  
 Appositum Tectæ porta Capena viæ.  
 Te quoque, Tempestas, meritam delubra fatemur,  
 Cum pæne est Corsis obruta classis aquis.  
 Hæc hominum monumenta patent. Si quæritis astra,  
 Tunc oritur magni præpes adunca Jovis. 196
- Postera lux Hyadas, Taurinæ cornua frontis,  
 Evocat: et multa terra madescit aqua.
- Mane ubi bis fuerit, Phoebusque iteraverit ortus,  
 Factaque erit posito rore bis uda seges; 200  
 Hac sacrata die Tusco Bellona duello  
 Dicitur; et Latio prospera semper adest.  
 Appius est auctor, Pyrrho qui pace negata  
 Multum animo vidit; lumine captus erat.  
 Prospicit a templo summum brevis area Circum. 205  
 Est ibi non parvæ parva columna notæ.  
 Hinc solet hasta manu belli prænuntia mitti,  
 In regem et gentes cum placet arma capi.
- Altera pars Circi custode sub Hercule tuta est;  
 Quod deus Euboico carmine munus habet. 210  
 Muneris est tempus, qui Nonas Lucifer ante est.  
 Si titulos quæris; Sulla probavit opus.
- Quærebam, Nonas Sanco Fidione referrem,  
 An tibi, Semo pater: cum mihi Sancus ait:  
 Cuicumque ex illis dederis, ego munus habebō. 215  
 Nomina trina fero: sic voluere Cures.

Hunc igitur veteres donarunt æde Sabini,  
Inque Quirinali constituere jugo.

Est mihi, sitque, precor, nostris diuturnior annis,  
Filia: qua felix sospite semper ero. 220

Hanc ego cum vellem genero dare, tempora tædis  
Apta requirebam, quæque cavenda forent.

Tum mihi post sacras monstratur Junius Idus  
Utilis et nuptis, utilis esse viris.

Primaque pars hujus thalamis aliena reperta est. 225  
Nam mihi sic conjux sancta Dialis ait:

Donec ab Iliaca placidus purgamina Vesta  
Detulerit flavis in mare Tibris aquis;

Non mihi detonsos crines depectere buxo,  
Non ungues ferro subsecuisse licet; 230

Non tetigisse virum; quamvis Jovis ille sacerdos,  
Quamvis perpetua sit mihi lege datus.

Tu quoque ne propera: melius tua filia nubet,  
Ignea cum pura Vesta nitebit humo.

Tertia post Nonas remove Lycaona Phœbe 235  
Fertur: et a tergo non habet Ursa metum.

Tunc ego me memini ludos in gramine Campi  
Adspicere: et didici, lubrice Tibri, tuos.

Festa dies illis, qui lina madentia ducunt,  
Quique tegunt parvis æra recurva cibis. 240

Mens quoque numen habet. Menti delubra videmus  
Vota metu belli, perfide Pœne, tui.

Pœne, rebellaras: et leto consulis omnes  
Attoniti Mauras pertimuere manus.

Spem metus expulerat; cum Menti vota senatus 245  
Suscipit; et melior protinus illa venit.

Adspicit instantes mediis sex lucibus Idus  
Illa dies, qua sunt vota soluta deæ.

Vesta, fave: tibi nunc operata resolvimus ora;  
Ad tua si nobis sacra venire licet. 250

- In prece totus eram. Cœlestia numina sensi,  
 Lætaque purpurea luce refulsit humus.  
 Non equidem vidi (valeant mendacia vatum)  
 Te, dea; nec fueras adspicienda viro.  
 Sed quæ nescieram, quorumque errore tenebar, 255  
 Cognita sunt, nullo præcipiente, mihi.  
 Dena quater memorant habuisse Palilia Romam,  
 Cum flammæ custos æde recepta sua est.  
 Regis opus placidi, quo non metuentius ullum  
 Numinis ingenium terra Sabina tulit. 260  
 Quæ nunc sere vides, stipula tunc tecta videres:  
 Et paries lento vimine textus erat.  
 Hic locus exiguus, qui sustinet atria Vestæ,  
 Tunc erat intonsi regia magna Numæ.  
 Forma tamen templi, quæ nunc manet, ante fuisse 265  
 Dicitur: et formæ causa probanda subest.  
 Vesta eadem est, quæ Terra: subest vigil ignis utrique;  
 Significant sedem terra focusque suam.  
 Terra pilæ similis, nullo fulcimine nixa,  
 Aere subjecto tam grave pendet onus. 270  
 Ipsa volubilitas libratum sustinet orbem:  
 Quique premat partes, angulus omnis abest.  
 Cumque sit in media rerum regione locata,  
 Et tangat nullum plusve minusve latus;  
 Ni convexa foret, parti vicinior esset: 275  
 Nec medium terram mundus haberet onus.  
 Arte Syracosia suspensus in aere clauso  
 Stat globus, immensi parva figura poli.  
 Et quantum a summis, tantum secessit ab imis  
 Terra. Quod ut fiat, forma rotunda facit. 280  
 Par facies templi: nullus procurrit in illo  
 Angulus. A pluvio vindicat imbre tholus.  
 Cur sit virgineis, quæris, dea culta ministris?  
 Inveniam causas hac quoque parte suas.  
 Ex Ope Junonem memorant Cereremque creatas 285  
 Semine Saturni: tertia Vesta fuit.  
 Utraque nupserunt; ambæ peperisse feruntur:  
 De tribus impatiens restitit una viri.

- Quid mirum, virgo si virgine læta ministra  
 Admittit castas in sua sacra manus? 290  
 Nec tu aliud Vestam, quam vivam intellige flammam;  
 Nataque de flamma corpora nulla vides.  
 Jure igitur virgo est, quæ semina nulla remittit,  
 Nec capit: et comites virginitatis habet.  
 Esse diu stultus Vestæ simulacra putavi: 295  
 Mox didici curvo nulla subesse tholo.  
 Ignis inextinctus templo celatur in illo.  
 Effigiem nullam Vesta, nec ignis, habent.  
 Stat vi terra sua: vi stando Vesta vocatur.  
 Causaque par Graii nominis esse potest. 300  
 At focus a flammis, et quod fovet omnia, dictus:  
 Qui tamen in primis ædibus ante fuit.  
 Hinc quoque vestibulum dici reor: inde precando  
 Affamur Vestam, quæ loca prima tenes.  
 Ante focos olim longis considerare scamnis 305  
 Mos erat, et mensæ credere adesse deos.  
 Nunc quoque, cum fiunt antiquæ sacra Vacunæ,  
 Ante Vacunales stantque sedentque focos.  
 Venit in hos annos aliquid de more vetusto:  
 Fert missos Vestæ pura patella cibos. 310  
 Ecce coronatis panis dependet asellis,  
 Et velant scabras florida sarta molas.  
 Sola prius furnis torrebant farra coloni;  
 Et Fornacali sunt sua sacra deæ.  
 Suppositum cineri panem focus ipse parabat; 315  
 Strataque erat tepido tegula quassa solo.  
 Inde focum servat pistor, dominamque focorum,  
 Et quæ pumiceas versat asella molas.  
 Præteream, referamne tuum, rubicunde Priape,  
 Dedecus? est multi fabula plena joci. 320  
 Turrigera frontem Cybele redimita corona  
 Convocat æternos ad sua festa deos.  
 Convocat et Satyros, et rustica numina Nymphas.  
 Silenus, quamvis nemo vocarat, adest.  
 Nec licet, et longum est epulas narrare deorum: 325  
 In multo nox est pervigilata mero.

Hi temere errabant in opacæ vallibus Idæ;  
 Pars jacet, et molli gramine membra levat.  
 Hi ludunt, hos somnus habet: pars brachia nectit,  
 Et viridem celeri ter pede pulsat humum. 330  
 Vesta jacet, placidamque capit segura quietem,  
 Sicut erat positum cespite fulta caput.  
 At ruber hortorum custos Nymphasque deasque  
 Captat, et errantes fertque refertque pedes.  
 Adspicit et Vestam, dubium, Nymphamne putarit, 335  
 An scierit Vestam: scisse sed ipse negat.  
 Spem capit obscænam, furtimque accedere tentat,  
 Et fert suspensos corde micante gradus.  
 Forte senex, quo vectus erat, Silenus asellum  
 Liquerat ad ripas lene sonantis aquæ. 340  
 Ibat, ut inciperet, longi deus Hellesponti,  
 Intempestivo cum rudit ille sono.  
 Territa voce gravi surgit dea. Convolat omnis  
 Turba. Per infestas effugit ille manus.  
 Lampsacos hoc animal solita est mactare Priapo: 345  
 Apta asini flammis indicis exta damus.  
 Quem tu, diva memor, de pane monilibus ornas.  
 Cessat opus: vacuæ conticuere molæ.  
 Nomine, quam pretio, celebratior arce Tonantis,  
 Dicam, Pistoris quid velit ara Jovis. 350  
 Cincta premebantur truncibus Capitolia Gallis:  
 Fecerat obsidio jam diuturna famem.  
 Jupiter, ad solium superis regale vocatis,  
 Incipe, ait Marti. Protinus ille refert:  
 Scilicet ignotum est, quæ sit fortuna meorum, 355  
 Et dolor hic animi voce querentis eget?  
 Si tamen, ut referam breviter mala juncta pudori,  
 Exigis; Alpino Roma sub hoste jacet.  
 Hæc est, cui fuerat promissa potentia rerum,  
 Jupiter? hanc terris impositurus eras? 360  
 Jamque suburbanos, Etruscaque contudit arma;  
 Spes erat in cursu: nunc lare pulsa suo est.  
 Vidimus ornatos ærata per atria picta  
 Veste triumphales occubuisse senes.

- Vidimus Iliacæ transferri pignora Vestæ 365  
 Sede. Putant aliquos scilicet esse deos.  
 At si respicerent, qua vos habitatis in arce,  
 Totque domos vestras obsidione premi;  
 Nil opis in cura scirent superesse deorum,  
 Et data sollicita thura perire manu. 370  
 Atque utinam pugnæ pateat locus! arma capessant;  
 Et, si non poterunt exsuperare, cadant.  
 Nunc inopes victus, ignavaque fata timentes,  
 Monte suo clausos barbara turba premit.  
 Tum Venus, et lituo pulcher trabeaque Quirinus, 375  
 Vestaque pro Latio multa locuta suo.  
 Publica, respondit, cura est pro mœnibus istis,  
 Jupiter: et pœnas Gallia victa dabit.  
 Tu modo, quæ desunt fruges, superesse putentur,  
 Effice: nec sedes desere, Vesta, tuas. 380  
 Quodcunque est Cereris solidæ, cava machina frangat,  
 Mollitamque manu duret in igne focus.  
 Jusserat, et fratris virgo Saturnia jussis  
 Annuit; et mediæ tempora noctis erant.  
 Jam ducibus somnum dederat labor. Increpat illos 385  
 Jupiter, et sacro, quid velit, ore docet:  
 Surgite, et in medios de summis arcibus hostes  
 Mittite, quam minime perdere vultis, opem.  
 Somnus abit: quæruntque novis ambagibus acti,  
 Perdere quam nolint, et jubeantur, opem. 390  
 Ecce Ceres visa est. Jaciunt Cerealia dona.  
 Jacta super galeas scutaque longa sonant.  
 Posse fame vinci spes excidit. Hoste repulso  
 Candida Pistori ponitur ara Jovi.  
 Forte revertēbar festis Vestalibus illac, 395  
 Qua nova Romano nunc Via juncta foro est.  
 Huc pede matronam vidi descendere nudo:  
 Obstupui, tacitus sustinuique gradum.  
 Sensit anus vicina loci; jussumque sedere  
 Alloquitur, quatiens, voce tremente, caput. 400  
 Hoc, ubi nunc fora sunt, udæ tenuere paludes,  
 Amne redundatis fossa madebat aquis.



Curtius ille lacus, siccas qui sustinet aras,  
 Nunc solida est tellus, sed lacus ante fuit.  
 Qua Velabra solent in Circum ducere pompas, 405  
 Nil præter salices cassaque canna fuit.  
 Sæpe suburbanas rediens conviva per undas  
 Cantat, et ad nautas ebria verba jacit.  
 Nondum conveniens diversis iste figuris  
 Nomen ab averso ceperat amne deus. 410  
 Hic quoque lucus erat, juncis et arundine densus,  
 Et pede velato non adeunda palus.  
 Stagna recesserunt, et aquas sua ripa coercet,  
 Siccaque nunc tellus; mos tamen inde manet.  
 Reddiderat causam. Valeas, anus optima, dixi; 415  
 Quod superest ævi molle sit omne tui.  
 Cætera jam pridem didici puerilibus annis;  
 Non tamen idcirco prætereunda mihi.  
 Mœnia Dardanides nuper nova fecerat Ius:  
 Ius adhuc Asiæ dives habebat opes. 420  
 Creditur armiferæ signum coeleste Minervæ  
 Urbis in Iliacæ desiluisse juga.  
 Cura videre fuit: vidi templumque locumque.  
 Hoc superest illi: Pallada Roma tenet.  
 Consulitur Smintheus: lucoque obscurus opaco 425  
 Hos non mentito reddidit ore sonos:  
 Ætheriam servate deam; servabitis urbem:  
 Imperium secum transferet illa loci.  
 Servat, et inclusam summa tenet Ius in arce;  
 Curaque ad hæredem Laomedonta venit. 430  
 Sub Priamo servata parum. Sic ipsa volebas,  
 Ex quo iudicio forma revicta tua est.  
 Seu genus Adrasti, seu furtis aptus Ulixes,  
 Seu pius Æneas, eripuisse datur;  
 Auctor in incerto: res est Romana; tuetur 435  
 Vesta, quod assiduo lumine cuncta videt.  
 Heu quantum timuere patres, quo tempore Vesta  
 Arsit, et est adytis obruta pæne suis!  
 Flagrabant sancti sceleratis ignibus ignes,  
 Mixtaque erat flammæ flamma profana pisæ. 440

- Attonitæ flebant demisso crine ministræ:  
 Abstulerat vires corporis ipse timor.  
 Provolat in medium, et magna, Succurrite, voce,  
 Non est auxilium flere, Metellus ait.  
 Pignora virgineis fatalia tollite palmis: 445  
 Non ea sunt voto, sed rapienda manu.  
 Me miserum! dubitatis? ait. Dubitare videbat,  
 Et pavidas posito procubuisse genu.  
 Haurit aquas: tollensque manus, Ignoscite, dixit,  
 Sacra: vir intrabo non adeunda viro. 450  
 Si scelus est, in me commissi poena redundet.  
 Sit capitis damno Roma soluta mei.  
 Dixit, et irrupit: factum dea rapta probavit,  
 Pontificisque sui munere tuta fuit.  
 Nunc bene lucetis sacræ sub Cæsare flammæ: 455  
 Ignis in Iliacis nunc erit, estque, focus.  
 Nullaque dicetur vittas temerasse sacerdos  
 Hoc duce, nec viva defodietur humo.  
 Sic incesta perit; quia quam violavit, in illam  
 Conditur: et Tellus Vestaque numen idem est. 460  
 Tum sibi Callaico Brutus cognomen ab hoste  
 Fecit, et Hispanam sanguine tinxit humum.  
 Scilicet interdum miscentur tristia lætis;  
 Ne populum toto pectore festa juvent.  
 Crassus ad Euphraten aquilas, natumque, suosque 465  
 Perdidit: et leto est ultimus ipse datus.  
 Parthe, quid exultas? dixit dea; signa remittes:  
 Quique necem Crassi vindicet, ultor erit.
- At simul auritis violæ demuntur asellis,  
 Et Cereris fruges aspera saxa terunt; 470  
 Navita puppe sedens, Delphina videbimus, inquit,  
 Humida cum pulso nox erit orta die.
- Jam, Phryx, a nupta quereris, Tithone, relinqui,  
 Et vigil Eois Lucifer exit aquis.  
 Ite, bonæ matres, (vestrum Matralia festum,) 475  
 Flavaque Thebanæ reddite liba deæ.

- Pontibus et magno juncta est celeberrima Circo  
 Area, quæ posito de bove nomen habet.  
 Hac ibi luce ferunt Matutæ sacra parenti  
 Sceptriferas Servi templa dedisse manus. 480  
 Quæ dea sit; quare famulas a limine templi  
 Arceat (arceat enim) libaque tosta petat;  
 Bacche, racemiferos hedera redimite capillos,  
 Si domus illa tua est, dirige vatis opus.  
 Arserat obsequio Semele Jovis. Accipit Ino 485  
 Te, puer, et summa sedula nutrit ope.  
 Intumuit Juno, rapta quod pellice natum  
 Educet. At sanguis ille sororis erat.  
 Hinc agitur furiis Athamas et imagine falsa,  
 Tuque cadis patria, parve Learche, manu. 490  
 Mæsta Learcheas mater tumulaverat umbras,  
 Et dederat miseris omnia justa rogis.  
 Hæc quoque, funestos ut erat laniata capillos,  
 Prosilit, et cunis te, Melicerta, rapit.  
 Est spatio contracta brevi, freta bina repellit, 495  
 Unaque pulsatur terra duabus aquis.  
 Huc venit insanis natum complexa lacertis,  
 Et secum e celso mittit in alta jugo.  
 Excipit illæsos Panope, centumque sorores,  
 Et placido lapsu per sua regna ferunt. 500  
 Nondum Leucothee, nondum puer ille Palæmon  
 Vorticibus densis Tibridis ora tenent.  
 Lucus erat: dubium Semelæ Stimulæne vocetur;  
 Mænadas Ausonias incoluisse ferunt.  
 Quærit ab his Ino, quæ gens foret. Arcadas esse 505  
 Audit, et Evandrum scepra tenere loci.  
 Dissimulata deam Latias Saturnia Bacchas  
 Instimulat fictis insidiosa sonis:  
 O nimium faciles, o toto pectore captæ,  
 Non venit hæc nostris hospes amica choris. 510  
 Fraude petit, sacrique parat cognoscere ritum.  
 Quo possit pœnas pendere, pignus habet.  
 Vix bene desierat; complent ululatibus auras  
 Thyiades, effusis per sua colla comis;

- Injiciuntque manus, puerumque revellere pugnant. 515  
 Quos ignorat adhuc, invocat illa deos:  
 Dique, virique loci, miseræ succurrite matri.  
 Clamor Aventini saxa propinqua ferit.  
 Appulerat ripæ vaccas Cætæus Iberas.  
 Audit; et ad vocem concitus urget iter. 520  
 Herculis adventu, quæ vim modo ferre parabant,  
 Turpia fœmineæ terga dedere fugæ.  
 Quid petis hinc, (cognorat enim,) matertera Bacchi?  
 An numen, quod me, te quoque vexat, ait?  
 Illa docet partim; partim præsentia nati 525  
 Continet: et furiis in scelus isse pudet.  
 Bumor, ut est velox, agitatis pervolat alis:  
 Estque frequens, Ino, nomen in ore tuum.  
 Hospita Carmentis fidos intrasse penates  
 Diceris, et longam deposuisse famem. 530  
 Liba sua properata manu Tegeæa sacerdos  
 Traditur in subito cocta dedisse foco.  
 Nunc quoque liba juvant festis Matralibus illam.  
 Rustica sedulitas gratior arte fuit.  
 Nunc, ait, o vates, venientia fata resigna, 535  
 Qua licet: hospitii hoc, precor, adde meis.  
 Parva mora est: cœlum vates ac numina sumit;  
 Fitque sui toto pectore plena dei.  
 Vix illam subito posses cognoscere; tanto  
 Sanctior, et tanto, quam modo, major erat. 540  
 Læta canam: gaude defuncta laboribus, Ino!  
 Dixit, et huic populo dextera semper ades!  
 Numen eris pelagi: natum quoque pontus habebit.  
 In nostris aliud sumite nomen aquis.  
 Leucothee Graiis, Matuta vocabere nostris. 545  
 In portus nato jus erit omne tuo.  
 Quem nos Portunum, sua lingua Palæmona dicet.  
 Ite, precor, nostris æquus uterque locis.  
 Annuerant: promissa fides: posuere labores.  
 Nomina mutarunt: hic deus, illa dea est. 550  
 Cur vetet ancillas accedere, quæritis? odit.  
 Principiumque odii, si sinat ipsa, canam.

- Una ministrarum solita est, Cadmei, tuarum  
 Sæpe sub amplexus conjugis ire tui.  
 Improbus hanc Athamas furtim dilexit: ab illa 555  
 Comperit agricolis semina tosta dari.  
 Ipsa quidem fecisse negat, sed fama recepit.  
 Hoc est, cur odio sit tibi serva manus.  
 Non tamen hanc pro stirpe sua pia mater adoret:  
 Ipsa parum felix visa fuisse parens. 560  
 Alterius prolem melius mandabitis illi:  
 Utilior Baccho quam fuit ipsa suis.  
 Hanc tibi, Quo properas, memorant dixisse, Rutili?  
 Luce mea Marso consul ab hoste cades.  
 Exitus accessit verbis, flumenque Tolenum 565  
 Purpureo mixtis sanguine fluxit aquis.  
 Proximus annus erat: Pallantide cæsus eadem  
 Didius hostiles ingeminavit opes.  
 Lux eadem, Fortuna, tua est, auctorque, locusque.  
 Sed superinjectis quis latet æde togis? 570  
 Servius est: hoc constat enim; sed causa latendi  
 Discrepat, et dubium me quoque mentis habet.  
 Dum dea furtivos timide profitetur amores,  
 Cœlestemque homini concubuisse pudet;  
 (Arsit enim magno correpta cupidine regis, 575  
 Cæcaque in hoc uno non fuit illa viro;)  
 Nocte domum parva solita est intrare fenestra:  
 Unde Fenestellæ nomina porta tenet.  
 Nunc pudet, et vultus velamine celat amatos:  
 Oraque sunt multa regia tecta toga. 580  
 An magis est verum, post Tulli funera plebem  
 Confusam placidi morte fuisse ducis?  
 Nec modus ullus erat: crescebat imagine luctus,  
 Donec eam positis occuluere togis.  
 Tertia causa mihi spatium majore canenda est; 585  
 Nos tamen adductos intus agemus equos.  
 Tullia, conjugio, sceleris mercede, peracto,  
 His solita est dictis exstimulare virum:  
 Quid juvat esse pares, te nostræ cæde sororis,  
 Meque tui fratris, si pia vita placet? 590

Vivere debuerant et vir meus, et tua conjux,  
 Si nullum ausuri majus eramus opus.  
 Et caput et regnum facio dotale parentis.  
 Si vir es, i, dictas exige dotis opes!  
 Regia res scelus est. Socero cape regna necato, 595  
 Et nostras patrio sanguine tinge manus.  
 Talibus instinctus solio privatus in alto  
 Sederat. Attonitum vulgus ad arma ruit.  
 Hinc cruor, hinc cædes: infirmaque vincitur ætas.  
 Sceptra gener socero rapta Superbus habet. 600  
 Ipse sub Esquilii, ubi erat sua regia, cæsus  
 Concidit in dura sanguinolentus humo.  
 Filia, carpento patrios initura penates,  
 Ibat per medias alta feroxque vias.  
 Corpus ut adspexit, lacrymis auriga profusus 605  
 Restitit. Hunc tali corripit illa sono:  
 Vadis? an exspectas pretium pietatis amarum?  
 Duc, inquam, invitas ipsa per ora rotas.  
 Certa fides facti: dictus Sceleratus ab illa  
 Vicus, et æterna res ea pressa nota. 610  
 Post tamen hoc ausa est templum, monumenta parentis,  
 Tangere: mira quidem, sed tamen acta loquar.  
 Signum erat in solio residens sub imagine Tulli:  
 Dicitur hoc oculis opposuisse manum.  
 Et vox audita est, Vultus abscondite nostros, 615  
 Ne natæ videant ora nefanda meæ.  
 Veste data tegitur; vetat hanc Fortuna moveri;  
 Et sic e templo est ipsa locuta suo:  
 Ore revelato qua primum luce patebit  
 Servius, hæc positi prima pudoris erit. 620  
 Parcite, matronæ, vetitas attingere vestes:  
 Sollenni satis est voce movere preces:  
 Sitque caput semper Romano tectus amictu,  
 Qui rex in nostra septimus urbe fuit.  
 Arserat hoc templum: signo tamen ille pepercit 625  
 Ignis: opem nato Mulciber ipse tulit.  
 Namque pater Tulli Vulcanus, Oeresia mater,  
 Præsignis facie, Corniculana fuit.

- Hanc secum Tanaquil, sacris de more paratis,  
 Jussit in ornatum fundere vina focum. 630
- Hic inter cineres obscæni forma virilis  
 Aut fuit, aut visa est; sed fuit illa magis.  
 Jussa loco captiva fovet. Conceptus ab illa  
 Servius a cœlo semina gentis habet.
- Signa dedit genitor, tum cum caput igne corusco 635  
 Contigit, inque coma flammeus arsit apex.  
 Te quoque magnifica, Concordia, dedicat æde  
 Livia, quam caro præstitit illa viro.
- Disce tamen, veniens ætas, ubi Livia nunc est  
 Porticus, immensæ tecta fuisse domus. 640
- Urbis opus domus una fuit: spatiumque tenebat,  
 Quo brevius muris oppida multa tenent.  
 Hæc æquata solo est, nullo sub crimine regni,  
 Sed quia luxuria visa nocere sua.
- Sustinuit tantas operum subvertere moles, 645  
 Totque suas hæres perdere Cæsar opes.  
 Sic agitur censura, et sic exempla parantur;  
 Cum vindex, alios quod monet, ipse facit.
- Nulla nota est veniente die, quam dicere possim.  
 Idibus Invicto sunt data templa Jovi. 650
- Et jam Quinquatrus jubeor narrare minores.  
 Nunc ades o cœptis, flava Minerva, meis.  
 Cur vagus incedit tota tibicen in Urbe?  
 Quid sibi personæ, quid stola longa, volunt?  
 Sic ego; sic posita Tritonia cuspide dixit: 655  
 (Pace velim doctæ verba referre deæ:)
- Temporibus veterum tibicinis usus avorum  
 Magnus, et in magno semper honore fuit.  
 Cantabat fanis, cantabat tibia ludis,  
 Cantabat mæstis tibia funeribus. 660
- Dulcis erat mercede labor: tempusque secutum,  
 Quod subito Graiæ frangeret artis opus.  
 Adde quod Ædilis, pompam qui funeris irent,  
 Artifices solos jusserat esse decem.
- Exsilio mutant Urbem, Tiburque recedunt; 665  
 (Exsilium quodam tempore Tibur erat.)

- Quæritur in scena cava tibia; quæritur aris;  
 Ducit supremos nœnia nulla toros.  
 Servierat quidam, quantolibet ordine dignus,  
 Tibure: sed longo tempore liber erat. 670  
 Rure dapes parat ille suo, turbamque canoram  
 Convocat. Ad festas convenit illa dapes.  
 Nox erat; et vinis oculique animique natabant:  
 Cum præcomposito nuntius ore venit:  
 Atque ita, Quid cessas convivia solvere? dixit: 675  
 Auctor vindictæ jam venit ecce tuæ.  
 Nec mora; convivæ valido titubantia vino  
 Membra movent: dubii stantque labantque pedes.  
 At dominus, Discedite, ait: plastroque morantes  
 Sustulit. In plastro scirpea lata fuit. 680  
 Alliciunt somnos tempus, motusque, merumque;  
 Potaque se Tibur turba redire putat.  
 Jamque per Esquillas Romanam intraverat urbem,  
 Et mane in medio plaustra fuere foro.  
 Plautius, ut possent specie numeroque senatum 685  
 Fallere, personis imperat ora tegi.  
 Admissetque alios: et, ut hunc tibicina cœtum  
 Augeat, in longis vestibus ire jubet.  
 Sic reduces bene posse tegi: ne forte notentur  
 Contra collegæ jussa redisse sui. 690  
 Res placuit: cultuque novo libet Idibus uti,  
 Et canere ad veteres verba jocosa modos.  
 Hæc ubi perdocuit, Superest mihi discere, dixi,  
 Cur sit Quinquatrus illa vocata dies.  
 Martius, inquit, agit tali mea nomine festa: 695  
 Estque sub inventis hæc quoque turba meis.  
 Prima terebrato per rara foramina buxo,  
 Ut daret, effeci, tibia longa sonos.  
 Vox placuit: liquidis faciem referentibus undis  
 Vidi virgineas intumuisse genas. 700  
 Ars mihi non tanti est; valeas, mea tibia, dixi.  
 Excipit abjectam cespite ripa suo.  
 Inventam Satyrus primum miratur: at usum  
 Nescit, et inflatam sentit habere sonum.



Et modo dimittit digitis, modo concipit auras : 705  
 Jamque inter Nymphas arte superbus erat.  
 Provocat et Phœbum. Phœbo superante pependit:  
 Cæsa recesserunt a cute membra sua.  
 Sum tamen inventrix auctorque ego carminis hujus.  
 Hoc est cur nostros ars colat ista dies. 710

Tertia lux veniet, qua tu, Dodoni Thyene,  
 Stabis Agenorei fronte videnda bovis.  
 Hæc est illa dies, qua tu purgamina Vestæ,  
 Tibi, per Etruscas in mare mittis aquas.

Si qua fides ventis, Zephyro date carbasa, nantæ; 715  
 Cras veniet vestris ille secundus aquis.

At pater Heliadum radios ubi tinxerit undis,  
 Et cinget geminos stella serena polos;  
 Tollet humo validos proles Hyriæ lacertos:  
 Continua Delphin nocte videndus erit. 720  
 Scilicet hic olim Volscos Æquosque fugatos  
 Viderat in campis, Algida terra, tuis.  
 Unde suburbano clarus, Tuberte, triumpho,  
 Vectus es in niveis, Postume, victor equis.

Jam sex et totidem luces de mense supersunt; 725  
 Huic unum numero tu tamen adde diem:  
 Sol abit e Geminis, et Cancri signa rubescunt:  
 Cœpit Aventina Pallas in arce coli.

Jam tua, Laomedon, oritur nurus, orta que noctem  
 Pellit, et e pratis uda pruina fugit. 730  
 Reddita, quisquis is est, Summano templa feruntur,  
 Tum cum Romanis, Pyrrhe, timendus eras.

Hanc quoque cum patriis Galatæa receperit undis,  
 Plenaque securæ terra quietis erit;  
 Surgit humo juvenis, telis afflatus avitis, 735  
 Et gemino nexas porrigit angue manus.

Notus amor Phædræ, nota est injuria Thesei :

Devovit natum credulus ille suum.

Non impune pius juvenis Trœzena petebat.

Dividit obstantes pectore taurus aquas. 740

Solliciti terrentur equi, frustra que retenti

Per scopulos dominum duraque saxa trahunt.

Exciderat curru, lorisque morantibus artus

Hippolytus lacero corpore raptus erat :

Reddideratque animam, multum indignante Diana. 745

Nulla, Coronides, causa doloris, ait.

Namque pio juveni vitam sine vulnere reddam ;

Et cedent arti tristia fata meæ.

Gramina continuo oculis depromit eburnis :

Profuerunt Glauci manibus illa prius ; 750

Tunc, cum observatas augur descendit in herbas,

Usus et auxilio est anguis ab angue dato.

Pectora ter tetigit, ter verba salubria dixit :

Depositum terra sustulit ille caput.

Lucus eum, nemorisque sui Dictynna recessu 755

Celat : Aricino Virbius ille lacu.

At Clymenus Clotho que dolent, hæc, fila reneri,

Hic, fieri regni jura minora sui.

Jupiter, exemplum veritus, direxit in illum

Fulmina, qui nimis moverat artis opem. 760

Phœbe, querebaris. Deus est : placare parenti ;

Propter te, fieri quod vetat, ipse facit.

Non ego te, quamvis properabis vincere, Cæsar,

Si vetet auspiciam, signa movere velim.

Sint tibi Flaminius Traaimena que littora testes, 765

Per volucres æquos multa monere deos.

Tempora si veteris quæris temeraria damni,

Quartus ab extremo mense bis ille dies.

Postera lux melior. Superat Masinissa Syphacem ;

Et cecidit telis Hasdrubal ipse suis. 770

Tempora labuntur, tacitisque senescimus annis,

Et fugiunt, freno non remorante, dies.

- Quam cito venerunt Fortunæ Fortis honores!  
 Post septem luces Junius actus erit.  
 Ite, deam læti Fortem celebrate, Quirites: 775  
 In Tiberis ripa munera regis habet.  
 Pars pede, pars etiam celeri decurrite cymba;  
 Nec pudeat potos inde redire domum.  
 Ferte coronatæ juvenum convivia lintres,  
 Multaque per medias vina bibantur aquas. 780  
 Plebs colit hanc, quia, qui posuit, de plebe fuisse  
 Fertur, et ex humili sceptrâ tulisse loco.  
 Convenit et servis, serva quia Tullius ortus  
 Constituit dubiæ templa propinqua deæ.
- Ecce suburbana rediens male sobrius æde 785  
 Ad stellas aliquis talia verba jactat:  
 Zona latet tua nunc, et cras fortasse latebit:  
 Dehinc erit, Orion, adspicienda mihi.  
 At si non esset potus, dixisset eadem  
 Venturum tempus solstitiale die. 790
- Lucifero subeunte Lares delubra tulerunt,  
 Hic ubi fit docta multa corona manu.  
 Tempus idem Stator ædis habet, quam Romulus olim  
 Ante Palatini condidit ora jugi.
- Tot restant de mense dies, quot nomina Parcis, 795  
 Cum data sunt trabæ templa, Quirine, tuæ.
- Tempus Iuleis cras est natale Kalendis:  
 Pierides, cæptis addite summa meis.  
 Dicite, Pierides, quis vos adjunxerit isti,  
 Cui dedit invitas victa noverca manus. 800  
 Sic ego; sic Clio: Clari monumenta Philippi  
 Adspicis, unde trahit Marcia casta genus;  
 Marcia, sacrificio deductum nomen ab Anco,  
 In qua par facies nobilitate sua.  
 Par animo quoque forma suo respondet in illa: 805  
 Et genus, et facies, ingeniumque simul.

Nec quod laudamus formam, tam turpe putaris;  
Laudamus magnas hac quoque parte deas.  
Nupta fuit quondam matertera Cæsaris illi.  
O decus, o sacra fœmina digna domo! 810  
Sic cecinit Clio: doctæ adsensere sorores.  
Annuit Alcides, increpuitque lyram.

FINIS.

LONDON:  
SAVILL AND EDWARDS, PRINTERS,  
CHANDOS STREET.

Vertical line of text on the left side of the page.

# DEPARTMENT OF

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...


...

...

...

...

...





Lo 10.227

Fasti.

Widener Library

006397481



3 2044 085 212 975